

Namo tassa bhagavato arahato sammāsambuddhassa

## Saṃyuttanikāye

### Saḷāyatanavagga-aṭṭhakathā

#### 1. Saḷāyatanasaṃyuttaṃ

##### 1. Aniccavaggo

##### 1. Ajjhattāniccasuttavaṇṇanā

1. Saḷāyatanavaggassa paṭhame **cakkhūnti** dve cakkhūni – nāṇacakkhu ceva maṃsacakkhu ca. Tattha **nāṇacakkhu** pañcavidhaṃ – buddhacakkhu, dhammacakkhu, samantacakkhu, dibbacakkhu, paññācakkhūti. Tesu buddhacakkhu nāma āsayānusayañāṇaṇceva indriyaparopariyattañāṇaṇca, yaṃ – “buddhacakkhunā lokaṃ volokento”’ti (mahāva. 9; ma. ni. 1.283; 2.338) āgataṃ. Dhammacakkhu nāma heṭṭhimā tayo maggā tīṇi ca phalāni, yaṃ – “virajaṃ vītamalaṃ dhammacakkhuṃ udapādī”’ti (mahāva. 16; ma. ni. 2.395) āgataṃ. Samantacakkhu nāma sabbaññutaññāṇaṇaṃ, yaṃ – “pāsādamāruyha samantacakkhū”’ti (mahāva. 8; ma. ni. 1.282; 2.338) āgataṃ. Dibbacakkhu nāma ālokapharaṇena uppannaṃ nāṇaṇaṃ, yaṃ – “dibbena cakkhunā visuddhenā”’ti (pārā. 13; ma. ni. 2.341) āgataṃ. Paññācakkhu nāma catusaccaparicchadakañāṇaṇaṃ, yaṃ – “cakkhuṃ udapādī”’ti (sa. ni. 5.1081; mahāva. 15) āgataṃ.

**Maṃsacakkhupi** duvidhaṃ – sasambhāracakkhu, pasādacakkhūti. Tesu yvāyaṃ akkhikūpake akkhipaṭalehi parivārito maṃsapiṇḍo, yattha catasso dhātuyo vaṇṇagandharasoḷā sambhavo jīvitāṃ bhāvo cakkhupasādo kāyapasādoti saṅkhepato terasa sambhārā honti. Vitthārato pana catasso dhātuyo vaṇṇagandharasoḷā sambhavoti ime nava catusamuṭṭhānavasena chattimsa, jīvitāṃ bhāvo cakkhupasādo kāyapasādoti ime kamasamuṭṭhānā tāva cattāroti cattārīsa sambhārā honti. Idaṃ sasambhāracakkhu nāma. Yaṃ panettha setamaṇḍalaparicchinnena kaṇhamaṇḍalena parivārite diṭṭhimaṇḍale sanniviṭṭhaṃ rūpadassanasamatthaṃ pasādamaṭṭhaṃ, idaṃ pasādacakkhu nāma. Tassa tato paresaṇca sotādīnaṃ vitthārakathā visuddhimagge vuttāva.

Tattha yadidaṃ pasādacakkhu, taṃ gahetvā bhagavā – **cakkhuṃ, bhikkhave, aniccanti**ādīmāha. Tattha – “catūhi kāraṇehi aniccaṃ udayabbayavantatāyā”’tiādīnā nayena vitthārakathā heṭṭhā pakāsītāyeva. **Sotampi** pasādasotameva adhippetāṃ, tathā **ghānājivhākāyā. Manoti** tebhūmakasammasanacāraccitaṃ. Iti idaṃ suttaṃ chasu ajjhattikāyatanesu tīṇi lakkhaṇāni dassetvā kathite bujjanakānaṃ ajjhāsayaena vuttaṃ.

##### 2-3. Ajjhattadukkhassuttādivaṇṇanā

2-3. Dutiyāṃ dve lakkhaṇāni, tatiyāṃ ekalakkhaṇaṃ dassetvā kathite bujjanakānaṃ ajjhāsayaena vuttaṃ. Sesāni pana tehi sallakkhitāni vā ettakeneva vā sallakkhessantīti.

##### 4-6. Bāhirāniccasuttādivaṇṇanā

4-6. Catutthe **rūpagandharasaphoṭṭhabbā** catusamuṭṭhānā, **saddo** dvisamuṭṭhāno, **dhammāti** tebhūmakadhammārammaṇaṃ. Idampi bāhiresu chasu āyatanesu tilakkhaṇaṃ dassetvā kathite bujjanakānaṃ vasena vuttaṃ. Pañcame chaṭṭhe ca dutiyatatiyesu vuttasadisova nayo.

## 7-12. Ajjhattāniccātītānāgatasuttādivaṇṇanā

7-12. Sattamādīni atītānāgatesu cakkhādīsū aniccalakkhaṇādīni sallakkhetvā paccuppannesu balavagāhena kilamantānaṃ vasena vuttāni. Sesam sabbattha heṭṭhā vuttanayamevāti.

Aniccavaggo paṭhamo.

### 2. Yamakavaggo

#### 1-4. Paṭhamapubbesambodhasuttādivaṇṇanā

13-16. Yamakavaggassa paṭhamadutiyesu **ajjhattikānanti** ajjhatajjhattavasena ajjhattikānaṃ. So pana nesaṃ ajjhattikabhāvo chandarāgassa adhimattabalavatāya veditabbo. Manussānañhi antogharaṃ viya cha ajjhattikāyatanāni, gharūpacāraṃ viya cha bāhirāyatanāni. Yathā nesaṃ puttadāradhanadhaññapuṇṇe antoghare chandarāgo adhimattabalavā hoti, tattha kassaci pavisitūṃ na denti, appamattena bhājanasaddamattenāpi ‘kiṃ eta’nti? Vattāro bhavanti. Evamevaṃ chasu ajjhattikesu āyatanesu adhimattabalavachandarāgoti. Iti imāya chandarāgabalavatāya tāni ‘ajjhattikāni’ti vuttāni. Gharūpacāre pana no tathā balavā hoti, tattha carante manussepi catuppadānīpi na sahasā nivārenti. Kiñcāpi na nivārenti, anicchantā pana pasupacchimattampi gahitūṃ na denti. Iti nesaṃ tattha na adhimattabalavachandarāgo hoti. Rūpādīsūpi tattheva na adhimattabalavachandarāgo, tasmā tāni ‘bāhirāni’ti vuttāni. Vitthārato pana ajjhattikabāhirakathā visuddhimagge vuttāva. Sesam dvīsūpi suttesu heṭṭhā vuttanayameva. Tathā tatiyacatutthesu.

#### 5-6. Paṭhamanoceassādasuttādivaṇṇanā

17-18. Pañcame **nissaṭṭi** nikkhantā. **Visaṇṇuttā**ti nosaṃyuttā. **Vippamuttā**ti no adhimuttā **vimariyādīkatena cetasā**ti nimmariyādīkatena cetasā. Yañhi kilesajātāṃ vā vaṭṭāṃ vā appahīnaṃ hoti, tena sekhānaṃ cittaṃ samariyādīkataṃ nāma. Yaṃ pahīnaṃ, tena vimariyādīkataṃ. Idha pana sabbaso kilesānañceva vaṭṭassa ca pahīnattā vimariyādīkatena kilesavaṭṭamariyādaṃ atikkantena cittena vihariṃsūti attho. Chaṭṭhepi eseva nayo. Chasūpi panetesu suttesu catusaccameva kathitanti veditabbaṃ.

#### 7-10. Paṭhamābhīnandasuttādivaṇṇanā

19-22. Sattamādīsū catūsū vaṭṭavivaṭṭameva kathitaṃ. Anupubbakathā pana nesaṃ heṭṭhā vuttanayeneva veditabbāti.

Yamakavaggo dutiyo.

### 3. Sabbavaggo

#### 1. Sabbasuttavaṇṇanā

23. Sabbavaggassa paṭhame **sabbaṃ vo, bhikkhavi**ti sabbaṃ nāma catubbidhaṃ – sabbasabbaṃ, āyatanaṃ sabbaṃ, sakkāyasabbaṃ, padesasabbanti. Tattha –

‘‘Na tassa addiṭṭhamidhaatthi kiñci,  
Atho aviññātamajānitabbaṃ;  
Sabbā abhiññāsi yadatthi neyyaṃ,  
Tathāgato tena samantacakkhū’’ti. (mahāni. 156; cūḷani. dhotakamāṇavapucchāniddeho 32;  
paṭi. ma. 1.121) –

Idaṃ sabbasabbaṃ nāma. “Sabbam vo, bhikkhave, desessāmi, taṃ suṇāthā”ti (saṃ. ni. 4.24) idaṃ āyatanasabbaṃ nāma. “Sabbadhammāmulāpariyāyaṃ vo, bhikkhave, desessāmi”ti (ma. ni. 1.1) idaṃ sakkāyasabbaṃ nāma. “Sabbadhammesu vā pana paṭhamasamannāhāro uppajjati cittaṃ mano mānasam...pe... tajjāmanodhātū”ti idaṃ padesasabbaṃ nāma. Iti pañcārammaṇamattaṃ padesasabbaṃ. Tebhūmakadhammā sakkāyasabbaṃ. Catubhūmakadhammā āyatanasabbaṃ. Yaṃkiñci neyyaṃ sabbasabbaṃ. Padesasabbaṃ sakkāyasabbaṃ na pāpuṇāti, sakkāyasabbaṃ āyatanasabbaṃ na pāpuṇāti, āyatanasabbaṃ sabbasabbaṃ na pāpuṇāti. Kasmā? Sabbaññutaññāṇassa ayaṃ nāma dhammo ārammaṇaṃ na hotīti natthitāya. Imasmiṃ pana sutte āyatanasabbaṃ adhippetam.

**Paccakkhāyāti** paṭikkhipivā. **Vācāvattukamevassāti**, vācāya vattabbavatthumattakameva bhaveyya. Imāni pana dvādasāyatanāni atikkamivā ayaṃ nāma añño sabhāvadhammo atthīti dassetuṃ na sakkuṇeyya. **Putṭho ca na sampāyeyyāti**, “katamaṃ aññaṃ sabbam nāmā”ti? Pucchito, “idaṃ nāmā”ti vacanena sampādetuṃ na sakkuṇeyya. **Vighātaṃ āpajjeyyāti** dukkhaṃ āpajjeyya. **Yathā taṃ, bhikkhave, avisayasminti** ettha tanti nipātamattaṃ. **Yathāti** kāraṇavacanam, yasmā avisaye putṭhoti attho. Avisayasmīhi sattānaṃ vighātova hoti, kūtāgāramattaṃ silaṃ sīsena ukkhipivā gambhīre udake taraṇaṃ avisayo, tathā candimasūriyānaṃ ākaḍḍhitvā pātanaṃ, tasmīṃ avisaye vāyamanto vighātameva āpajjati, evaṃ imasmimpi avisaye vighātameva āpajjeyyāti adhippāyo.

## 2. Pahānasuttavaṇṇanā

**24.** Dutiye **sabbappahānāyāti** sabbassa pahānāya. **Cakkhusamphassapaccayā uppajjati vedayitanti** cakkhusamphassaṃ mūlapaccayaṃ katvā uppannā sampaṭicchanasantīraṇavoṭṭhabbanajavanavedanā. Cakkhuviññāṇasampayuttāya pana vattabbameva natthi. Sotadvārādivedanāpaccayādīsupi eseva nayo. Ettha pana **manoti** bhavaṅgacittaṃ. **Dhammāti** ārammaṇaṃ. **Manoviññāṇanti** sahāvajjanakajavanaṃ. **Manosamphassoti** bhavaṅgasahajāto samphasso. **Vedayitanti** sahāvajjanavedanāya javanavedanā. Bhavaṅgasampayuttāya pana vattabbameva natthi. Āvajjanaṃ bhavaṅgato amocetvā **manoti** sahāvajjanena bhavaṅgaṃ daṭṭhabbaṃ. **Dhammāti** ārammaṇaṃ. **Manoviññāṇanti** javanaviññāṇaṃ. **Manosamphassoti** bhavaṅgasahajāto samphasso. **Vedayitanti** javanasahajātā vedanā. Sahāvajjanena bhavaṅgasahajātāpi vaṭṭatiyeva. Yā panettha desanā anusitṭhiñā, ayaṃ paṇṇatti nāmāti.

## 3. Abhiññāpariññāpahānasuttavaṇṇanā

**25.** Tatiye **sabbam abhiññā pariññā pahānāyāti** sabbam abhijānitvā pariñānitvā pajahanatthāya. **Abhiññā pariññā pahātabbanti** abhijānitvā pariñānitvā pahātabbaṃ. Sesam vuttanayeneva veditabbaṃ.

## 4. Paṭhamaaparijānanasuttavaṇṇanā

**26.** Catutthe **anabhijānaṃ aparijānaṃ avirājayaṃ appajahanti** anabhijānanto aparijānanto avirājento appajahanto. Ettha ca **avirājentoti** avigacchāpento. Iti imasmiṃ sutte tissopi pariññā kathitā honti. “Abhijāna”nti hi vacanena ñātapariññā kathitā, “parijāna”nti vacanena tīraṇapariññā, “virājayaṃ pajaha”nti dvīhi pahānapariññāti.

## 5. Dutiyaaparijānanasuttavaṇṇanā

**27.** Pañcame **cakkhuviññāṇaviññātabbā dhammāti** heṭṭhā gahitarūpameva gahetvā dasseti. Heṭṭhā vā āpāthagataṃ gahitaṃ, idha anāpāthagataṃ. Idaṃ panettha sannitṭhānaṃ – heṭṭhā āpāthagatampi anāpāthagatampi gahitameva, idha pana cakkhuviññāṇasampayuttā tayo khandhā. Te hi cakkhuviññāṇena saha viññātabbattā “cakkhuviññāṇaviññātabbā”ti vuttā. Sesapadesupi eseva nayo.

## 6. Ādittasuttavaṇṇanā

28. Chatṭhe **gayāsīseti** gayāgāmassa hi avidūre gayāti ekā pokkharāṇīpi atthi nadīpi, gayāsīsanāmakō hatthikumbhasadiso piṭṭhipāsāṇopi, yattha bhikkhusahassassapi okāso pahoti, bhagavā tattha viharati. Tena vuttaṃ “gayāsīse”ti. **Bhikkhū āmantesīti** tesam sappāyadhammadesanam vicinitvā taṃ desessāmīti āmantesi.

Tatrāyaṃ anupubbikathā – ito kira dvānavutikappe mahindo nāma rājā ahoṣi. Tassa jeṭṭhaputto phusso nāma. So pūritapāramī pacchimabhavikasatto, paripākagate ñāṇe bodhimaṇḍaṃ āruya sabbaññutaṃ paṭivijjhi. Rañño kaniṭṭhaputto tassa aggasāvako ahoṣi, purohitaputto dutiyasāvako. Rājā cintesi – “mayhaṃ jeṭṭhaputto nikkhamitvā buddho jāto, kaniṭṭhaputto aggasāvako, purohitaputto dutiyasāvako”ti. So “amhākaṃyeva buddho, amhākaṃ dhammo, amhākaṃ saṅgho”ti vihāraṃ kāretvā vihāradvārakoṭṭhakato yāva attano gharadvārā ubhato veḷubhittikuṭīkāhi parikkhipitvā matthake suvaṇṇatārakakhacitasamosaritagandhadāmamālādāmavitānaṃ bandhāpetvā heṭṭhā rajatavaṇṇaṃ vālukaṃ santharitvā pupphāni vikirāpetvā tena maggena bhagavato āgamaṇaṃ kāresi.

Satthā vihārasmiṃyeva ṭhito cīvaraṃ pārupitvā antosāṇiyāva saddhiṃ bhikkhusaṅghena rājagehaṃ āgacchati, katabhattakicco antosāṇiyāva gacchati. Koci kaṭacchubhikkhāmattampi dātuṃ na labhati. Tato nāgarā ujjhāyimsu, “buddho loke uppanno, na ca mayā puññāni kātuṃ labhāma. Yathā hi candimasūriyā sabbesaṃ ālokaṃ karonti, evaṃ buddhā nāma sabbesaṃ hitatthāya uppajjanti, ayaṃ pana rājā sabbesaṃ puññacetanaṃ attanoyeva anto pavesetī”ti.

Tassa ca rañño añṇe tayo puttā atthi. Nāgarā tehi saddhiṃ ekato hutvā sammantayimsu, “rājakulehi saddhiṃ aṭṭo nāma natthi, ekaṃ upāyaṃ karomā”ti. Te paccante core uṭṭhāpetvā, “katipayā gāmā pahaṭā”ti sāsanaṃ āharāpetvā rañño ārocayimsu. Rājā putte pakkosāpetvā “tātā, ahaṃ mahallako, gacchatha core vūpasamethā”ti pesesi. Payuttacorā ito cito ca avippakiritvā tesam santikameva āgacchimsu. Te anāvāse gāme vāsetvā “vūpasamitā corā”ti āgantvā rājānaṃ vanditvā aṭṭhamsu.

Rājā tuṭṭho “tātā, varaṃ vo demī”ti āha. Te adhvāsetvā gantvā nāgarehi saddhiṃ mantayimsu, “rañña amhākaṃ varo dinno. Kiṃ gaṇhāmā”ti? Ayyaputtā, tumhākaṃ hatthiassādayo na dullabhā, buddharatanaṃ pana dullabhaṃ, na sabbakālaṃ uppajjati, tumhākaṃ jeṭṭhabhātikassa phussabuddhassa paṭijagganavaraṃ gaṇhathāti. Te “evaṃ karissāmā”ti nāgarānaṃ paṭissuṇitvā katamassukammā sunhātā suvilittā rañño santikaṃ gantvā, “deva, no varaṃ dethā”ti yācimsu. Kiṃ gaṇhissatha tātāti? Deva, amhākaṃ hatthiassādīhi attho natthi, jeṭṭhabhātikassa no phussabuddhassa paṭijagganavaraṃ dethāti. “Ayaṃ varo na sakkā mayā jīvamānena dātu”nti dve kaṇṇe pidahi. “Deva, na tumhe amhehi balakkārena varaṃ dāpitā, tumhehi attano ruciyā tuṭṭhehi dinno. Kiṃ, deva, rājakulassa dve kathā vaṭṭanti”ti? Saccavādītāya bhaṇimsu.

Rājā vinivattitūṃ alabhanto – “tātā, satta saṃvacchare satta māse satta ca divase upaṭṭhahitvā tumhākaṃ dassāmī”ti āha. “Sundaraṃ, deva, pāṭibhogam dethā”ti. “Kissa pāṭibhogam tātā”ti? “Ettakaṃ kālaṃ amaraṇapāṭibhogam devā”ti. “Tātā, ayuttaṃ pāṭibhogam dāpetha, na sakkā evaṃ pāṭibhogam dātuṃ, tiṇagge ussāvabindusadisam sattānaṃ jīvita”nti. “No ce, deva, pāṭibhogam detha, mayā antarā matā kiṃ kusalaṃ karissāmā”ti? “Tena hi, tātā, cha saṃvaccharāni dethā”ti. “Na sakkā, devā”ti. “Tena hi pañca, cattāri, tīṇi, dve, ekaṃ saṃvaccharam detha”. “Satta, cha māse detha...pe... māsaddhamattaṃ dethā”ti. “Na sakkā, devā”ti. “Tena hi sattadivasamattaṃ dethā”ti. “Sādhu, devāti satta divase sampaṭicchimsu”. Rājā satta saṃvacchare satta māse satta divase kattabbasakkāraṃ sattasuyeva divasesu akāsi.

Tato puttānaṃ vasanaṭṭhānaṃ satthāraṃ pesetūṃ aṭṭhausabhavitthataṃ maggaṃ alaṅkārapesi, majjhaṭṭhāne catuusabhappamānaṃ padesaṃ hatthīhi maddāpetvā kasiṇamaṇḍaladisam katvā vālūkāya santharāpetvā pupphābhikiṇṇamakāsi, tattha tattha kadaliyo ca puṇṇaghaṭe ca ṭhapāpetvā dhajapaṭākā ukkhipāpesi. Usabhe usabhe pokkharāṇiṃ khaṇāpesi, aparabhāge dvīsu passesu gandhamālāpupphāṇe pasārāpesi. Majjhaṭṭhāne catuusabhavitthārassa alaṅkatamaggassa ubhosu

passesu dve dve usabhavitthāre magge khāṇukaṇṭake harāpetvā daṇḍadīpikāyo kārāpesi. Rājaputtāpi attano āṇāpavattiṭṭhāne soḷasausabhamaggaṃ tatheva alaṅkārapesum.

Rājā attano āṇāpavattiṭṭhānassa kedārasīmaṃ gantvā sathhāraṃ vanditvā paridevamāno, “tātā, mayhaṃ dakkhiṇakkhiṃ uppāṭetvā gaṇhantā viya gacchatha, evaṃ gaṇhitvā gatā pana buddhānaṃ anucchavikaṃ kareyyātha. Mā surāsoṇḍā viya pamattā vicarittā”ti āha. Te “jānissāma mayhaṃ, devā”ti sathhāraṃ gahetvā gatā, vihāraṃ kāretvā satthu niyyātetvā tattha sathhāraṃ paṭijaggantā kālena therāsane, kālena majjhimāsane, kālena saṅghanavakāsane tiṭṭhanti. Dānaṃ upaparikkhamānānaṃ tiṇṇampi janānaṃ ekasadisameva ahosi. Te upakaṭṭhāya vassūpanāyikāya cintayimṣu – “kathaṃ nu kho satthu ajjhāsayaṃ gaṇheyyāma”ti? Atha nesaṃ etadahosi – “buddhā nāma dhammagaruno, na āmisagaruno, sīle patiṭṭhamānā mayhaṃ satthu ajjhāsayaṃ gahetuṃ sakkhissāma”ti dānaṃ vidhāyake manusse pakkosāpetvā, “tātā, imināva nīhārena yāgubhattakhādānīyādīni sampādentā dānaṃ pavattethā”ti vatvā dānaṃ vidahanapalibodhaṃ chindimṣu.

Atha nesaṃ jeṭṭhabhātā pañcasate purise ādāya dasasu sīlesu patiṭṭhāya dve kāsāyāni acchādetvā kappiyaṃ udakaṃ paribhuñjamāno vāsaṃ kappesi. Majjhimo tīhi, kaniṭṭho dvīhi purisasatehi saddhiṃ tatheva paṭipajji. Te yāvajīvaṃ sathhāraṃ upaṭṭhahimṣu. Sathhā tesameva santike parinibbāyi.

Tepi kālaṃ katvā tato paṭṭhāya dvānavutikappe manussalokato devalokaṃ, devalokato ca manussalokaṃ saṃsarantā amhākaṃ sathhukāle devalokā cavitvā manussaloke nibbattimṣu. Tesam dānagge byāvaṭo mahāamacco aṅgamagadhānaṃ rājā bimbisāro hutvā nibbatti. Te tasseva rañño raṭṭhe brāhmaṇamahāsālakule nibbattimṣu. Jeṭṭhabhātā jeṭṭhova jāto, majjhimakaniṭṭhā majjhimakaniṭṭhāyeva. Yepi tesam parivāramanussā, te parivāramanussāva jātā. Te vuddhimanvāya tayopi janā taṃ purisasaḥassaṃ ādāya nikkhamitvā tāpasā hutvā uruvelāyaṃ nadītīreyaeva vasiṃsu. Aṅgamagadhavāsino māse māse tesam mahāsakkāraṃ abhiharanti.

Atha amhākaṃ bodhisatto katābhinikkhamano anupubbena sabbaññutaṃ patvā pavattitavaradhammacakko yasādayo kulaputte vinetvā saṭṭhi arahante dhammadesanattāya disāsu uyyojetvā sayam pattaṭṭhāyā – “te tayo jaṭilabhātike damessāmi”ti uruvelaṃ gantvā anekehi paṭihāriyasatehi tesam diṭṭhiṃ bhinditvā te pabbājesi. So taṃ iddhimayapattaṭṭhāraṃ samaṇasaḥassaṃ ādāya gayāsisaṃ gantvā tehi parivārīto nisīditvā, – “katarā nu kho etesaṃ dhammakathā sappāyā”ti cintento, “ime sāyaṃpātaṃ aggiṃ paricaranti. Imesaṃ dvādasāyatanāni ādittāni sampajjalitāni viya katvā desessāmi, evaṃ ime arahattaṃ pāpuṇituṃ sakkhissanti”ti sannīṭṭhānamakāsi. Atha nesaṃ tathā dhammaṃ desetum imaṃ ādittapariyāyaṃ abhāsi. Tena vuttaṃ – “bhikkhū āmantesīti tesam sappāyadhammadesanaṃ vicinitvā taṃ desessāmi āmantesī”ti. Tattha **ādittanti** padittaṃ sampajjalitaṃ. Sesam vuttanayameva. Iti imasmimṃ sutte dukkhalakkhaṇaṃ kathitaṃ.

## 7. Addhabhūtasuttavaṇṇanā

29. Sattame **addhabhūtaṃ** adhibhūtaṃ ajjhotthaṃ, upaddutanti attho. Imasmimṃ sutte dukkhalakkhaṇameva kathitaṃ.

## 8. Samugghātasārūppasuttavaṇṇanā

30. Aṭṭhame **sabbamaññitasamugghātasārūppanti** sabbesam taṇhāmānadiṭṭhimaññitānaṃ samugghātāya anucchavikaṃ. **Idhāti** imasmimṃ sāsane. **Cakkhuṃ na maññatīti** cakkhuṃ ahanti vā mamanti vā paroti vā parassāti vā na maññati. **Cakkhusmiṃ na maññatīti** ahaṃ cakkhusmiṃ, mama kiñcanapalibodho cakkhusmiṃ paro cakkhusmiṃ, parassa kiñcanapalibodho cakkhusminti na maññati. **Cakkhuto na maññatīti** ahaṃ cakkhuto niggato, mama kiñcanapalibodho cakkhuto niggato, paro cakkhuto niggato, parassa kiñcanapalibodho cakkhuto niggatoti evampi na maññati, taṇhāmānadiṭṭhimaññitānaṃ ekampi na uppādetīti attho. **Cakkhuṃ meti na maññatīti** mama cakkhūti

na maññati, mamattabhūtaṃ taṇhāmaññanaṃ na uppādetīti attho. Sesam uttānamevāti. Imasmim sutte catucattālīsāya ṭhānesu arahattaṃ pāpetvā vipassanā kathitā.

### 9. Paṭhamasamugghātasappāyasuttavaṇṇanā

31. Navame **samugghātasappāyā**ti samugghātassa upakārabhūtā. **Tato taṃ hoti aññathāti** tato taṃ aññenākārena hoti. **Aññathābhāvī bhavasatto loko bhavamevābhinanda**tīti aññathābhāvaṃ vipariṇāmaṃ upagamanena aññathābhāvī hutvāpi bhavesu satto laggo lagito palibuddho ayaṃ loko bhavaṃyeva abhinandati. **Yāvatā, bhikkhave, khandhadhātuāyatananti**, bhikkhave, yattakaṃ idaṃ khandhā ca dhātuyo ca āyatanāni cāti khandhadhātuāyatanam. **Tampi na maññatīti** sabbampi na maññatīti heṭṭhā gahitameva saṃkaḍḍhitvā puna dasseti. Imasmim sutte aṭṭhacattālīsāya ṭhānesu arahattaṃ pāpetvā vipassanā kathitā.

### 10. Dutiyasamugghātasappāyasuttavaṇṇanā

32. Dasame **etaṃ mamāti**ādīhi tīhi tīhi padehi taṇhāmānadiṭṭhigāhe dassetvā tiparivaṭṭanayena desanā katā. Paṭipāṭiyā pana tīsupi imesu suttesu saha vipassanāya cattāropi maggā kathitāti.

Sabbavaggo tatiyo.

### 4. Jātidhammavaggavaṇṇanā

33-42. Jātidhammavagge **jātidhammanti** jāyanadhammaṃ nibbattanasabhāvaṃ. **Jarādhammanti** jīraṇasabhāvaṃ. **Byādhidhammanti** byādhino uppattipaccayabhāvena byādhisabhāvaṃ. **Maraṇadhammanti** maraṇasabhāvaṃ. **Sokadhammanti** sokassa uppattipaccayabhāvena sokasabhāvaṃ. **Samkilesikadhammanti** samkilesikasabhāvaṃ. **Khayadhammanti** khayagamanasabhāvaṃ. **Vayadhammā**dīsupi eseva nayoti.

Jātidhammavaggo catuttho.

### 5. Sabbaaniccavaggavaṇṇanā

43-52. Aniccavagge **abhiññeyyanti** pade ñātapariññā āgatā, itarā pana dve gahitāyevāti veditabbā. **Pariññeyyapahātabbapadesupi** tīraṇapahānapariññāva āgatā, itarāpi pana dve gahitāyevāti veditabbā. **Sacchikātabbanti** paccakkhaṃ kātabbaṃ. **Abhiññāpariññeyyanti** idhāpi pahānapariññā avuttāpi gahitāyevāti veditabbā. **Upaddutanti** anekaggaṭṭhena. **Upassaṭṭhanti** upahataṭṭhena. Sesam uttānamevāti.

Sabbaaniccavaggo pañcavo.

Paṭhamo paṇṇāsako.

### 6. Avijjāvaggavaṇṇanā

53-62. Avijjāvagge **avijjāti** catūsu saccesu aññānaṃ. **Vijjāti** arahattamaggavijjā. **Aniccato jānato passatoti** dukkhānattavasenāpi jānato passato pahiyatiyeva, idaṃ pana aniccavasena kathite bujjanakapuggalassa ajjhāsayena vuttaṃ. Eseva nayo sabbattha. Api cettha **saṃyojanāti** dasa saṃyojanāni. **Āsavāti** cattāro āsavā. **Anusayāti** satta anusayā. **Sabbupādānapariññāyāti** sabbesaṃ catunnampi upādānaṃ tīhi pariññāhi pariṇānanatthāya. **Pariyādānāyāti** khepanatthāya. Sesam sabbattha uttānamevāti.

Avijjāvaggo chaṭṭho.

## 7. Migajālavaggo

### 1. Paṭhamamigajālasuttavaṇṇanā

63. Migajālavaggassa paṭhame **cakkhuviññeyyā**ti cakkhuviññāṇena passitabbā.

**Sotaviññeyyā**dīsupi eseva nayo. **Iṭṭhā**ti pariyiṭṭhā vā hontu mā vā, iṭṭhārammaṇabhūtāti attho. **Kantā**ti kamaṇiyā. **Manāpā**ti manavaḍḍhanakā. **Piyarūpā**ti piyajātikā. **Kāmūpasamhitā**ti ārammaṇaṃ katvā uppajjamāṇena kāmena upasamhitā **rajanīyā**ti raṇjanīyā, rūguppattikāraṇabhūtāti attho. **Nandī**ti taṇhānandī. **Samyogotī** samyojanaṃ. **Nandisamyojanasamyuttotī** nandībandhanena baddho. **Araññavanapatthānī**ti araṇṇāni ca vanapatthāni ca. Tattha kiñcāpi abhidhamme nippariyāyena “nikkhamitvā bahi indakhilā sabbametam araṇṇa”nti (vibha. 529) vuttam, tathāpi yaṃ taṃ “pañcadhanusatikaṃ pacchima”nti (pārā. 654) araṇṇakaṅganipphādakaṃ senāsanam vuttam, tadeva adhippetanti veditabbam. **Vanapatthanti** gāmantam atikkamitvā manussānam anupacāraṭṭhānam, yattha na kasīyati na vapīyati. Vuttampi cetam –

“Vanapatthanti dūrānametaṃ senāsanānam adhivacanam. Vanapatthanti vanasaṇḍānametaṃ, vanapatthanti bhiṃsanakānametaṃ, vanapatthanti salomahamsānametaṃ, vanapatthanti pariyantānametaṃ, vanapatthanti amanussūpacārānam senāsanānametaṃ adhivacana”nti (vibha. 531).

Ettha ca pariyantānanti imaṃ ekaṃ pariyāyam ṭhapetvā sesapariyāyehi vanapatthāni veditabbāni. **Pantānī**ti pariyantāni atidūrāni. **Appasaddānī**ti udukkhalamusaladārakasaddādīnam abhāvena appasaddāni. **Appanigghosānī**ti tesam tesam ninnādamahānigghosassa abhāvena appanigghosāni. **Vijanavātānī**ti sañcaraṇajanassa sarīravātavīrahītāni. **Manussarāhasseyyakānī**ti manussānam rahokammassa anucchavikāni. **Paṭisallānasārūppānī**ti nilīyanasārūppāni.

### 2. Dutiyamigajālasuttavaṇṇanā

64. Dutīye **nandinirodhā dukkhanirodhoti** taṇhānandiyā nirodhena vaṭṭadukkhassa nirodho.

### 3-5. Paṭhamasamiddhimārapañhāsuttādivaṇṇanā

65-67. Tatiye **samiddhī**ti attabhāvassa samiddhatāya evaṃ laddhanāmo. Tassa kira therassa attabhāvo abhirūpo ahosi pāsādiko, ukkhittamālāpuṭo viya alaṅkatamālāgabbho viya ca sabbākārapāripūriyā samiddho. Tasmā samiddhitveva saṅkham gato. **Māroti** maraṇam pucchati. **Mārapaññattī**ti māroti paññatti nāmaṃ nāmadheyyam. **Atthi tattha māro vā mārapaññatti vāti** tattha maraṇam vā maraṇanti idaṃ nāmaṃ vā atthīti dasseti. Catuttham uttānameva, tathā pañcamam.

### 6. Samiddhilokapañhāsuttavaṇṇanā

68. Chaṭṭhe **lokoti** lujjanapalujjanaṭṭhena loko. Iti migajālattherassa āyācanasuttato paṭṭhāya pañcasupi suttasu vaṭṭavivaṭṭameva kathitam.

### 7. Upasenaāsīvisasuttavaṇṇanā

69. Sattame **sītaneti** evaṃnāmake susānavane. **Sappasoṇḍikapabbhāreti** sappaphaṇasadisatāya evaṃladdhanāme pabbhāre. **Upasenassāti** dhammasenāpatino kaniṭṭhabhātikaupasenattherassa. **Āsīviso patito hotīti** thero kira katabhattakicco mahācīvaraṃ gahetvā leṇacchāyāya mandamandena

vātapānavātena bījyamāno nisīditvā dupaṭṭanivāsane sūcikkammaṃ karoti. Tasmim̄ khaṇe leṇacchadane dve āsīvisapotakā kīlanti. Tesu eko patitvā therassa aṃsakūṭe avatthāsi. So ca puṭṭhavisso hoti. Tasmā patitaṭṭhānato paṭṭhāya therassa kāye dīpasikhā viya vaṭṭim̄ pariyādiyamānamevassa viṣaṃ otiṇṇaṃ. Thero visassa tathāgamaṃ disvā kiñcāpi taṃ patitamattameva yathāparicchedena gataṃ, attano pana iddhibalena “ayaṃ attabhāvo leṇe mā vinassatū”ti adhiṭṭhahitvā bhikkhū āmantesi.

**Purāyaṃ kāyo idheva vikiratīti** yāva na vikirati, tāva naṃ bahiddhā nīharathāti attho. **Aññathattanti** aññathābhāvaṃ. **Indriyānaṃ vā vipariṇāmaṃti** cakkhusotādīnaṃ indriyānaṃ pakativijahanabhāvaṃ. **Tattheva vikirīti** bahi nīharitvā ṭhapitaṭṭhāne mañcakasmiṃyeva vikiri.

## 8. Upavāṇasandiṭṭhikasuttavaṇṇanā

70. Aṭṭhame **rūpappaṭisaṃvedīti** nīlapītādibhedaṃ ārammaṇaṃ vavatthāpento rūpaṃ paṭisaṃviditaṃ karoti, tasmā rūpappaṭisaṃvedī nāma hoti. **Rūparāgappaṭisaṃvedīti** kilesassa atthibhāveneva pana rūparāgaṃ paṭisaṃviditaṃ karoti nāma, tasmā rūparāgappaṭisaṃvedīti vuccati. **Sandiṭṭhikotiādīni** visuddhimagge vuttatthāneva. **No ca rūparāgappaṭisaṃvedīti** kilesassa natthibhāveneva na rūparāgaṃ paṭisaṃviditaṃ karoti nāma, tasmā “no ca rūparāgappaṭisaṃvedī”ti vuccati. Imasmiṃ sutte sekhāsekhānaṃ paccavekkhānā kathitā.

## 9. Paṭhamachaphassāyatanasuttavaṇṇanā

71. Navame **phassāyatanānanti** phassākaraṇaṃ. **Avusitanti** avuṭṭhaṃ. **Ārakāti** dūre. **Etthāhaṃ, bhante, anassasanti**, bhante, ahaṃ ettha anassasiṃ, naṭṭho nāma ahanti vadati. Bhagavā – “ayaṃ bhikkhu ‘ahaṃ nāma imasmiṃ sāsane naṭṭho’ti vadati, kinu khvassa aññesu dhātukammaṭṭhāna-kasiṇakammaṭṭhānādīsu abhiyogo atthī”ti cintetvā, tampi apassanto – “kataraṃ nu kho kammaṭṭhānaṃ imassa sappāyaṃ bhavissatī”ti cintesi. Tato “āyatanakammaṭṭhānameva sappāya”nti disvā taṃ kathento **taṃ kiṃ maññasi bhikkhūtiādīmāha**. **Sādhūti** tassa byākaraṇe sampahaṃsaṃ. **Esevento dukkhassāti** ayameva vaṭṭadukkhassanto paricchedo, nibbānanti attho.

## 10. Dutiyachaphassāyatanasuttavaṇṇanā

72. Dasame **anassasanti** nassasiṃ, naṭṭho nāmamhi icceva attho. **Āyatim̄ apunabbhavāyāti** ettha āyatim̄ apunabbhavo nāma nibbānaṃ, nibbānatthāya pahīnaṃ bhavissatīti attho.

## 11. Tatiyachaphassāyatanasuttavaṇṇanā

73. Ekādasame **anassasanti** naṭṭho, **panassasanti** atinaṭṭho. Sesam̄ vuttanayeneva veditabbanti.

Migajālavaggo sattamo.

## 8. Gilānavaggo

### 1-5. Paṭhamagilānasuttādivaṇṇanā

74-78. Gilānavaggassa paṭhame **amukasminti** asukasmiṃ. Ayameva vā pāṭho. **Appaññātoti** aññāto apākaṭo. Navopi hi koci paññāto hoti rāhulathero viya sumanasāmaṇero viya ca, ayaṃ pana navo ceva apaññāto ca. Sesamettha vuttanayamevāti. Tathā ito paresu catūsu.

### 6. Paṭhamaavijjāpahānasuttavaṇṇanā

79. Chaṭṭhe **aniccato jānatoti** dukkhānattavasena jānatopi pahīyatiyeva, idaṃ pana



aniccalakkhaṇaṃ dassetvā vutte bujjanakassa ajjhāsayena vuttaṃ.

### 7. Dutiyāvijjāpahānasuttavaṇṇanā

**80.** Sattame **sabbe dhammā**ti sabbe tebhūmakadhammā. **Nālaṃ abhinivesāyā**ti abhinivesaparāmāsaggāhena gaṇhituṃ na yuttā. **Sabbanimittānī**ti sabbāni sankhāranimittāni. **Aññato passatī**ti yathā apariññātābhiniveso jano passati, tato aññato passati. Apariññātābhiniveso hi jano sabbanimittānīpi attato passati. Pariññātābhiniveso pana anattato passati, no attatoti evaṃ imasmiṃ sutte anattalakkhaṇameva kathitaṃ.

### 8. Sambahulabhikkhusuttavaṇṇanā

**81.** Aṭṭhame **idha noti** ettha **no-kāro** nipātamattameva. Sesam uttānatthameva. Kevalaṃ idha dukkhalakkhaṇaṃ kathitanti veditabbaṃ.

### 9. Lokapañhāsuttavaṇṇanā

**82.** Navame **lujjatī**ti palujjati bhijjati. Idha aniccalakkhaṇaṃ kathitaṃ.

### 10. Phaggunapañhāsuttavaṇṇanā

**83.** Dasame **chinnapapañceti** taṇhāpapañcassa chinnattā chinnapapañce. **Chinnavaṇṇumeti** taṇhāvaṇṇumasseva chinnattā chinnavaṇṇume. Kiṃ pucchāmīti pucchati? Atikkantabuddhehi pariharitāni cakkhusotādīni pucchāmīti pucchati. Atha vā sace magge bhāvitepi anāgate cakkhusotādivaṇṇaṃ vaḍḍheyya, taṃ pucchāmīti pucchatīti.

Gilānavaggo aṭṭhamo.

### 9. Channavaggo

#### 1. Palokadhammasuttavaṇṇanā

**84.** Channavaggassa paṭhame **palokadhammanti** bhijjanakasabhāvaṃ. Evamettha aniccalakkhaṇameva kathitaṃ.

#### 2. Suññatalokasuttavaṇṇanā

**85.** Dutīye **attaniyenā**ti attano santakena parikkhārena. Evamettha anattalakkhaṇameva kathitaṃ.

#### 3. Saṃkhittadhammasuttavaṇṇanā

**86.** Tatiyaṃ khandhiyavagge ānandovāde (saṃ. ni. 3.83) vuttanayeneva veditabbaṃ.

#### 4. Channasuttavaṇṇanā

**87.** Catutthe **channoti** evaṃnāmako thero, na abhinikkhamaṇaṃ nikkhantathero. **Paṭisallānā**ti phalasaṃpattito. **Gilānapucchakā**ti gilānupaṭṭhākā. Gilānupaṭṭhānaṃ nāma buddhapasatthaṃ buddhavaṇṇitaṃ, tasmā evamāha. **Sīsaveṭṭhaṃ dadeyyā**ti sīse veṭṭhanaṃ sīsaveṭṭhaṃ, tañca dadeyya. **Satthanti** jīvitahārasatthaṃ. **Nāvakañkhāmī**ti na icchāmi. **Paricīṇoti** paricarito. **Manāpenā**ti manavaḍḍhanakena kāyakammādinā. Ettha ca satta sekhā paricaranti nāma, arahā paricārī nāma,

bhagavā paricijño nāma.

**Etañhi, āvuso, sāvakassa patirūpanti,** āvuso, sāvakassa nāma etaṃ anucchavikaṃ.

**Anupavajjanti** appavattikaṃ appaṭṭisandhikaṃ. **Pucchāvuso sārīputta, sutvā vedissāmāti** ayaṃ sāvakapavāraṇā nāma. **Etaṃ mamātiādīni** taṇhāmānadiṭṭhiggāhavasena vuttāni. **Nirodhaṃ disvāti** khayavayaṃ ñatvā. **Netam mama, nesohamasmi, na meso attāti samanupassāmīti** aniccaṃ dukkhaṃ anattāti samanupassāmi. Ettakesu ṭhānesu channatthero sārīputtattherena pucchitaṃ pañhaṃ arahatte pakkhipitvā kathesi. Sārīputtatthero pana tassa puthujjanabhāvaṃ ñatvāpi taṃ “puthujjano”ti vā “khīṇāsavo”ti vā avatvā tuṅhīyeva ahoṣi. Cundatthero panassa puthujjanabhāvaṃ saññāpessāmīti cintetvā ovādaṃ adāsi.

Tattha **tasmāti** yasmā māraṇantikaṃ vedanaṃ adhvāsetuṃ asakkonto satthaṃ āharāmīti vadati, tasmā puthujjano āyasmā, tena idampi manasikarohīti dīpeti. Yasmā vā channaṃ āyatanānaṃ nirodhaṃ disvā cakkhādīni tiṇṇaṃ gāhānaṃ vasena na samanupassāmīti vadasi. Tasmā idampi tassa bhagavato sāsanaṃ āyasmataṃ manasikātabbanti puthujjanabhāvameva dīpento vadati. **Niccakappanti** niccakālaṃ. **Nissitassāti** taṇhāmānadiṭṭhīhi nissitassa. **Calitanti** vipphanditaṃ hoti. Yathayidaṃ āyasmato uppannaṃ vedanaṃ adhvāsetuṃ asakkontassa “ahaṃ vedayāmi, mama vedanā”ti appahīnaggāhassa idāni vipphanditaṃ hoti, imināpi naṃ “puthujjanova tva”nti vadati.

**Passaddhīti** kāyacittapassaddhi, kilesapassaddhi nāma hotīti attho. **Natīyāti** taṇhānatīyā. **Asatīti** bhavattāya ālayanikantipariyutṭhāne asatī. **Āgatigati na hotīti** paṭṭisandhivasena āgati nāma, cutivasena gamanaṃ nāma na hoti. **Cutūpapātoti** cavanavasena cuti, upapajjanavasena upapāto. **Nevidha na huram na ubhayamantarenāti** na idhaloke na paraloke na ubhayattha hoti. **Esevento dukkhassāti** vaṭṭadukkhakilesadukkhassa ayameva anto ayaṃ paricchedo parivaṭṭumabhāvo hoti. Ayameva hi ettha attho. Ye pana “ubhayamantarenā”ti vacanaṃ gahetvā antarābhavaṃ icchanti, tesam vacanaṃ niratthakaṃ. Antarābhavassa hi bhāvo abhidhamme paṭikkhittoyeva. “Antarenā”ti vacanaṃ pana vikappantaradīpanaṃ. Tasmā ayamettha attho – neva idha na huram, aparo vikappo na ubhayanti.

**Satthaṃ āhasesīti** jīvitahāraṃ satthaṃ āhari, āharitvā kaṇṭhanāḷaṃ chindi. Athassa tasmim khāṇe maraṇabhayaṃ okkami, gatinimittaṃ upaṭṭhāsi. So attano puthujjanabhāvaṃ ñatvā, saṃviggacitto vipassanaṃ paṭṭhapetvā, saṅkhāre pariggaṇhanto arahattaṃ patvā, samasīsī hutvā parinibbuto. **Sammukhāyeva anupavajjatā byākatāti** kiñcāpi idaṃ therassa puthujjanakāle byākaraṇaṃ hoti; etena pana byākaraṇena anantarāyamassa parinibbānaṃ ahoṣi. Tasmā bhagavā tadeva byākaraṇaṃ gahetvā kathesi.

**Upavajjakulānīti** upasaṅkamitabbakulāni. Iminā thero, “bhante, evaṃ upaṭṭhākesu ca upaṭṭhāyikāsu ca vijjamānāsu so bhikkhu tumhākaṃ sāsane parinibbāyissatī”ti pubbabhāgapaṭṭipattiyam kulasaṃsaggadosaṃ dassento pucchati. Athassa bhagavā kulesu saṃsaggābhāvaṃ dīpento **honti hete sārīputtātiādīmāha**. Imasmim kira ṭhāne therassa kulesu asaṃsaṭṭhabhāvo pākaṭo ahoṣi. Sesam sabbattha uttānameva.

## 5-6. Puṇṇasuttādivaṇṇanā

**88-89.** Pañcame **tañceti** taṃ cakkhuñceva rūpañca. **Nandisamudayā dukkhasamudayoti** taṇhāya samodhānena pañcakkhandhadukkhassa samodhānaṃ hoti. Iti chasu dvāresu “nandisamudayā dukkhasamudayo”ti iminā dvinnam saccānaṃ vasena vaṭṭaṃ matthakaṃ pāpetvā dassesi. Dutiyanaye **nirodho maggoti** dvinnam saccānaṃ vasena vivaṭṭaṃ matthakaṃ pāpetvā dassesi. **Iminā tvam puṇṇāti** pāṭiyekko anusandhi. Evaṃ tāva vaṭṭavivaṭṭavasena desanaṃ arahatte pakkhipitvā idāni puṇṇattheraṃ sattuṃ ṭhānesu sīhanādaṃ nadāpetuṃ **iminā tvantiādīmāha**.

**Caṇḍāti** duṭṭhā kibbisā. **Pharusāti** kakkhālā **akkosissantīti** dasahi akkosavatthūhi akkosissantī.

**Paribhāsissantī**ti “kiṃ samaṇo nāma tvam, idañcidañca te karissāmā”ti tajjessanti. **Evametthā**ti evaṃ mayhaṃ ettha bhavissati. **Daḍḍenā**ti catuhatthadaḍḍena vā khadiradaḍḍena vā ghaṭṭikamuggarena vā. **Satthenā**ti ekatodhārādīnā satthena. **Satthahārakam pariyesantī**ti jīvitahārakasattham pariyesanti. Idam thero tatiyapārājikavatthusmiṃ asubhakatham sutvā attabhāvena jīgucchantānaṃ bhikkhūnaṃ satthahārakapariyesanaṃ sandhāyāha. **Damūpasamenā**ti ettha **damoti** indriyasamvarādīnaṃ etaṃ nāmaṃ.

“Saccena danto damasā upeto,  
Vedantagū vusitabrahmacariyo”ti. (saṃ. ni. 1.195; su. ni. 467) –

Ettha hi indriyasamvaro damoti vutto. “Yadī saccā damā cāgā, khantiyā bhīyyodha vijjatī”ti (su. ni. 191; saṃ. ni. 1.246) ettha paññā damoti vuttā. “Dānena damena saṃyamena saccavajjena”ti (dī. ni. 1.165; ma. ni. 2.226) ettha uposathakammaṃ damoti vuttaṃ. Imasmiṃ pana sutte khantī damoti vedītabbo. **Upasamoti** tasseva vevacanaṃ.

**Atha kho āyasmā puṇṇoti** ko panaesa puṇṇo, kasmā ca panettha gantukāmo ahoṣīti? Sunāparantavāsiko eva esa, sāvattiyam pana asappāyavihāraṃ sallakkhetvā tattha gantukāmo ahoṣi.

Tatrāyam anupubbikathā – sunāparantaratthe kira ekasmiṃ vāñijagāme ete dve bhātaro. Tesu kadāci jeṭṭho pañca sakaṭasatāni gahetvā janapadaṃ gantvā bhaṇḍaṃ āharati, kadāci kaniṭṭho. Imasmiṃ pana samaye kaniṭṭhaṃ ghare ṭhapetvā, jeṭṭhabhātiko pañca sakaṭasatāni gahetvā, janapadaṃ caranto anupubbena sāvattim patvā, jetavanaṃ nātidūre sakaṭasattham nivesetvā bhuttapātarāso parijanaparivuto phāsukaṭṭhāne nisīdi.

Tena ca samayena sāvattivāsino bhuttapātarāsā uposathāngāni adhiṭṭhāya suddhuttarāsāṅgā gandhapupphādīhatthā yena buddho, yena dhammo, yena saṅgho, tanninnā tapponā tappabbhārā hutvā, dakkhiṇadvārena nikkhamitvā jetavanaṃ gacchanti. So te disvā “kahaṃ ime gacchantī”ti ekam manussaṃ pucchi. Kiṃ tvam, ayyo, na jānāsi? Loke buddhadhammasaṅgharatanāni nāma uppannāni, icceso mahājano satthu santikaṃ dhammakathaṃ sotuṃ gacchatīti. Tassa “buddho”ti vacanaṃ chavicammādīni chinditvā aṭṭhimiṇjaṃ āhacca aṭṭhāsi. So attano parijanaparivuto tāya parisāya saddhim vihāraṃ gantvā, satthu madhurassarena dhammaṃ desentassa parisapariyante ṭhito, dhammaṃ sutvā pabbajjāya cittaṃ uppādesi. Atha tathāgatena kālaṃ viditvā parisāya uyyojitāya satthāraṃ upasaṅkamtivā, vanditvā, svātanāya nimantetvā, dutiyadivase maṇḍapaṃ kāretvā, āsanāni paññāpetvā, buddhappamukhassa saṅghassa mahādānaṃ datvā, bhuttapātarāso uposathāngāni adhiṭṭhāya bhaṇḍāgārikaṃ pakkosāpetvā, “ettakaṃ dhanam vissajjitaṃ, ettakaṃ dhanam na vissajjita”nti sabbaṃ ācikkhitvā, “imaṃ sāpateyyam mayhaṃ kaniṭṭhassa dehī”ti sabbaṃ niyyātetvā, satthu santike pabbajitvā, kammaṭṭhānaparāyaṇo ahoṣi.

Athassa kammaṭṭhānaṃ manasikarontassa kammaṭṭhānaṃ na upaṭṭhāti. Tato cintesi – “ayam janapado mayhaṃ asappāyo, yaṃnūnāhaṃ satthu santike kammaṭṭhānaṃ gahetvā sakaraṭṭhameva gaccheyya”nti. Atha pubbaṇhasamayā piṇḍāya caritvā, sāyanhe paṭisallānā vuṭṭhahitvā, bhagavantaṃ upasaṅkamtivā, kammaṭṭhānaṃ kathāpetvā, satta sīhanāde naditvā, pakkāmi. Tena vuttaṃ, “atha kho āyasmā puṇṇo...pe... viharatī”ti.

Kattha panāyam vihāsīti? Catūsu ṭhānesu vihāsi. Sunāparantarattam tāva pavisitvā ca **abbuhatthapabbataṃ** nāma patvā vāñijagāmaṃ piṇḍāya pāvisi. Atha naṃ kaniṭṭhabhātā sañjānitvā bhikkhaṃ datvā, “bhante, aññattha agantvā idheva vasathā”ti paṭiññaṃ kāretvā tattheva vasāpesi.

Tato **samuddagirivihāraṃ** nāma agamāsi. Tattha ayakantapāsāṇehi paricchinditvā katacaṅkamo atthi, koci taṃ caṅkamituṃ samattho nāma natthi. Tattha samuddavīciyo āgantvā ayakantapāsāṇesu paharitvā mahāsaddaṃ karonti. Thero “kammaṭṭhānaṃ manasikarontānaṃ phāsuvihāro hotū”ti

samuddaṃ nissaddaṃ katvā adhiṭṭhāsi.

Tato **mātulagiriṃ** nāma agamāsi. Tatthapi sakuṇasaṅgho ussanno rattiṇca divā ca saddo ekābaddhova ahoṣi. Thero “idaṃ ṭhānaṃ na phāsuka”nti tato **makulakārāmahāraṃ** nāma gato. So vāṇijagāmassa nātidūro naccāsanno gamanāgamanasampanno vivitto appasaddo. Thero “imaṃ ṭhānaṃ phāsuka”nti tattha rattiṭṭhānadivāṭṭhānacāṅkamanādīni kāretvā vassaṃ upagacchi. Evaṃ catūsu ṭhānesu vihāsi.

Athekadivasaṃ tasmimyeva antovasse pañca vāṇijasatāni “parasamuddaṃ gacchāmā”ti nāvāya bhaṇḍaṃ pakkhipiṃsu. Nāvārohanadivase therassa kaniṭṭhabhātā theram bhojetvā, therassa santike sikkhāpadāni gahetvā, vanditvā, “bhante, samuddo nāma asaddheyyo anekantarāyo, amhe āvajjeyyāthā”ti vatvā nāvaṃ āruhi. Nāvā uttamajavena gacchamānā aññataraṃ dīpakaṃ pāpuṇi. Manussā “pātarāsaṃ karissāmā”ti dīpake uttiṇṇā. Tasmim paṇa dīpake aññaṃ kiñci natthi, candanavānameva ahoṣi.

Atheko vāsiyā rukkaṃ ākoṭetvā lohitacandanabhāvaṃ ṇatvā āha – “bho, mayaṃ lābhatthāya parasamuddaṃ gacchāma, ito ca uttari lābho nāma natthi, caturaṅgulamattā ghaṭikā satasahassaṃ agghati. Hāretabbayuttakaṃ bhaṇḍaṃ hāretvā candanassa pūressāmā”ti te tathā kariṃsu. Candanavane adhivatthā amanussā kujjhitvā, “imehi amhākaṃ candanavaṇṇaṃ nāsitaṃ ghātessāma ne”ti cintetvā – “idheva ghātitesu sabbaṃ ekakuṇapaṃ bhavissati, samuddamajjhe nesaṃ nāvaṃ osīdessāmā”ti āhaṃsu. Atha nesaṃ nāvaṃ āruya muhuttaṃ gatakāleyeva uppātikaṃ uṭṭhapetvā sayampi te amanussā bhayānakāni rūpāni dassayiṃsu. Bhītā manussā attano attano devatānaṃ namassanti. Therassa kaniṭṭho cūlapuṇṇakuṭumbiko “mayhaṃ bhātā avassayo hotū”ti therassa namassamāno aṭṭhāsi.

Theropi kira tasmimyeva khaṇe āvajjetvā, tesam byasanuppattim ṇatvā, vehāsaṃ uppattivā, abhimukho aṭṭhāsi. Amanussā theram disvāva “ayyo puṇṇatthero eṭi”ti apakkamiṃsu, uppātikaṃ sannisīdi. Thero “mā bhāyathā”ti te assāsetvā “kahaṃ gantukāmatthā”ti pucchi. Bhante, amhākaṃ sakaṭṭhānameva gacchāmāti. Thero nāvāṅgaṇe akkamitvā “etesam icchitaṭṭhānaṃ gacchatū”ti adhiṭṭhāsi. Vāṇijā sakaṭṭhānaṃ gantvā, taṃ pavattim puttadārassa ārocetvā, “etha theram saraṇaṃ gacchāmā”ti pañcasatāpi attano pañcahi mātugāmasatehi saddhim tisu saraṇesu patiṭṭhāya upāsakattaṃ paṭivedesum. Tato nāvāya bhaṇḍaṃ otāretvā therassa ekaṃ koṭṭhāsaṃ katvā, “ayaṃ, bhante, tumhākaṃ koṭṭhāso”ti āhaṃsu. Thero mayhaṃ viṣuṃ koṭṭhāsakiccaṃ natthi. Satthā paṇa tumhehi diṭṭhapubboti. Na diṭṭhapubbo, bhanteti. Tena hi iminā satthu maṇḍalamālaṃ karoṭha. Evaṃ satthāraṃ passissathāti. Te sādhu, bhanteti. Tena ca koṭṭhāsena attano ca koṭṭhāsehi maṇḍalamālaṃ kātuṃ ārabhiṃsu.

Satthāpi kira taṃ āradhakālato paṭṭhāya paribhogaṃ akāsi. Ārakkhamanussā rattim obhāsaṃ disvā, “mahesakkhā devatā atthi”ti saññaṃ kariṃsu. Upāsakā maṇḍalamālaṇca bhikkhusaṅghassa ca senāsanāni niṭṭhāpetvā dānasambhāraṃ sajjetvā, “kataṃ, bhante, amhehi attano kiccaṃ, satthāraṃ pakkosathā”ti therassa ārocesum. Thero sāyanhasamaye iddhiyā sāvattim gantvā, “bhante, vāṇijagāmaṃvāsino tumhe daṭṭhukāmā, tesam anukampaṃ karoṭhā”ti bhagavantaṃ yāci. Bhagavā adhivāsesi. Thero sakaṭṭhānameva paccāgato.

Bhagavāpi ānandattheraṃ āmantesi, “ānanda, sve sunāparante vāṇijagāme piṇḍāya carissāma, tvaṃ ekūnapaṇcasatānaṃ bhikkhūnaṃ salākaṃ dehī”ti. Thero “sādhu, bhante”ti bhikkhusaṅghassa tamatthaṃ ārocetvā, “ākāsacārī bhikkhū salākaṃ gaṇhantū”ti āha. Tamdivasaṃ kuṇḍadhānatthero paṭṭhamaṃ salākaṃ aggahesi. Vāṇijagāmaṃvāsini “sve kira satthā āgamissati”ti gāmaṃmājjhe maṇḍapaṃ katvā dānaggaṃ sajjayiṃsu. Bhagavā pātova sarīrapaṭijaggaṃ katvā, gandhakuṭim pavisitvā, phalasaṃpattim appetvā, nisīdi. Sakkassa paṇḍukambalasilāsaṃ uṇhaṃ ahoṣi. So “kiṃ ida”nti āvajjetvā satthu sunāparantagamaṃ disvā, vissakammaṃ āmantesi, “tāta, ajja bhagavā tiṃsamattāni yojanasatāni piṇḍacāraṃ gamissati. Pañca kūṭāgārasatāni māpetvā jetavanadvāraṃkoṭṭhakamatthake gamanasajjāni katvā ṭhāpehi”ti. So tathā akāsi. Bhagavato kūṭāgāraṃ

catumukhaṃ ahoṣi, dvinnam aggasāvakaṇaṃ dvimukhāni, sesāni ekamukhāni, satthā gandhakuṭito nikkhamitvā paṭipāṭiyā ṭhapitakūṭāgāresu dhurakūṭāgāraṃ pāvīsi. Dve aggasāvake ādiṃ katvā ekūnapañcabhikkhusatānīpi kūṭāgāragatāni ahesuṃ. Ekaṃ tucchaṃ kūṭāgāraṃ ahoṣi, pañcapi kūṭāgārasatāni ākāse uppattīṃsu.

Satthā **saccabandhapabbataṃ** nāma patvā kūṭāgāraṃ ākāse ṭhapesi. Tasmiṃ pabbate saccabandho nāma micchādīṭṭhikatāpasaso mahājanaṃ micchādīṭṭhiṃ uggaṇhāpento lābhaggayasaggappatto hutvā vasati, abbhantare cassa antocāṭiyaṃ padīpo viya arahattaphalassa upanissayo jalati. Taṃ disvā “dhammamma kathessāmi”ti gantvā dhammaṃ desesi. Tāpasaso desanāpariyosāne arahattaṃ pāpuṇi. Maggenevassa abhiññā āgatā. So ehibhikkhu hutvā iddhimayapattacīvaradharo tucchakūṭāgāraṃ pāvīsi.

Bhagavā kūṭāgāragatehi pañcahi bhikkhusatehi saddhiṃ vāṇijagāmaṃ gantvā, kūṭāgārāni adissamānakāni katvā, vāṇijagāmaṃ pāvīsi. Vāṇijā buddhappamukhassa saṅghassa mahādānaṃ datvā satthāraṃ makulakārāmaṃ nayīṃsu. Satthā maṇḍalamālaṃ pāvīsi. Mahājano yāva satthā bhattadarathaṃ paṭippassambheti, tāva pātarāsaṃ katvā uposathaṅgāni samādāya bahuṃ gandhañca pupphañca ādāya dhammassavanatthāya ārāmaṃ paccāgamāsi. Satthā dhammaṃ desesi. Mahājanassa bandhanamokkho jāto, mahantaṃ buddhakolāhalaṃ ahoṣi.

Satthā mahājanassa saṅghatthāya sattāhaṃ tattheva vasi, aruṇaṃ pana mahāgandhakuṭiyāmyeva utṭhapesi. Sattāhampi dhammadesanāpariyosāne caturāsītiyā pāṇasahassānaṃ dhammābhisamayo ahoṣi. Tattha sattāhaṃ vasitvā, vāṇijagāme piṇḍāya caritvā, “tvam idheva vasāhi”ti puṇṇattheraṃ nivattetvā antare **nammadānadī** nāma atthi, tassā tīraṃ agamāsi. Nammadā nāgarājā satthu paccuggamaṃ katvā, nāgabavanaṃ pavesetvā, tiṇṇaṃ ratanānaṃ sakkāraṃ akāsi. Satthā tassa dhammaṃ kathetvā nāgabavanā nikkhami. So “mayhaṃ, bhante, paricaritabbaṃ dethā”ti yāci. Bhagavā nammadānadītiṃ padacetiyāṃ dassesi. Taṃ vīcīsu āgatāsu pidhīyati, gatāsu vivarīyati. Mahāsakkārapattaṃ ahoṣi. Satthā tato nikkhamitvā saccabandhapabbataṃ gantvā saccabandhaṃ āha – “tayā mahājano apāyamagge oṭārīto. Tvaṃ idheva vasitvā, etesaṃ laddhiṃ vissajjāpetvā, nibbānamagge patiṭṭhāpehi”ti. Sopi paricaritabbaṃ yāci. Satthā ghanapiṭṭhipāsāṇe allamattikapiṇḍamhi lañcanaṃ viya padacetiyāṃ dassesi. Tato jetavanameva gato. Etamatthaṃ sandhāya **teneva antaravassenā**tiādi vuttaṃ.

**Parinibbāyī**ti anupādisesāya nibbānadhātuyā parinibbāyī. Mahājano therassa satta divasāni sarīrapūjaṃ katvā, bahūni gandhakaṭṭhāni samodhānetvā, sarīraṃ jhāpetvā dhātuyo ādāya cetiyāṃ akāsi. **Sambahulā bhikkhū**ti therassa ālāhanaṭṭhāne ṭhitabhikkhū. Sesāṃ sabbattha uttānameva. Chaṭṭhaṃ uttānameva.

### 7-8. Paṭhamaejāsuttādivaṇṇanā

**90-91.** Sattame **ejā**ti taṇhā. Sā hi calanaṭṭhena ejāti vuccati. Sāva ābādhanatṭhena **rogo**, anto dussanaṭṭhena **gaṇḍo**, nikantaṭṭhena **sallaṃ**. **Tasmā**ti yasmā ejā rogo ceva gaṇḍo ca sallañca, tasmā. **Cakkhuṃ na maññeyyā**tiādi vuttanayameva, idhāpi sabbaṃ heṭṭhā gahitameva samkaḍḍhitvā dassitaṃ. Aṭṭhaṃ vuttanayameva.

### 9-10. Paṭhamadvayasuttādivaṇṇanā

**92-93.** Navame **dvayanti** dve dve koṭṭhāse. Dasame **itthetaṃ dvayanti** evametaṃ dvayaṃ. **Calañceva byathañcā**ti attano sabhāvena asaṅṭhahanato calati ceva byathati ca. **Yopi hetu yopi paccayoti** cakkhuviññāṇassa vatthārammaṇaṃ hetu ceva paccayo ca. **Kuto niccaṃ bhavissatī** kena kāraṇena niccaṃ bhavissati. Yathā pana dāsassa dāsiyā kucchismiṃ jāto putto parova dāso hoti, evaṃ aniccameva hotīti attho. **Saṅgatī**ti sahaḡati. **Sannipātoti** ekato sannipātanaṃ. **Samavāyoti** ekato samāgamo. **Ayaṃ vuccati cakkhusamphassoti** iminā saṅgatisannipātasamavāyasankhātena paccayena uppannattā paccayanāmeneva saṅgati sannipāto samavāyoti ayaṃ vuccati cakkhusamphasso.

**Sopi hetūti** phassassa vatthu ārammaṇaṃ saha-jātā tayo khandhāti ayaṃ hetu. **Phuṭṭhoti** upayogathe paccattaṃ, phassena phuṭṭhameva gocaraṃ vedanā vedeti, cetanā ceteti, saññā sañjānātīti attho. Phuṭṭhoti vā phassasamaṅgīpuggalo, phassena phuṭṭhārammaṇameva vedanādīhi vedeti ceteti sañjānātītipi vuttaṃ hoti. Iti imasmim̐ sutte samatīmsakkhandhā kathitā honti. Kathaṃ? Cakkhudvāre tāva vatthu ceva ārammaṇaṃ rūpakkhandho, phuṭṭho vedetīti vedanākkhandho, cetetīti saṅkhārakkhandho, sañjānātīti saññākkhandho, vijānātīti viññāṇakkhandhoti. Sesadvāresupi eseva nayo. Manodvārepi hi vatthurūpaṃ ekantato rūpakkhandho, rūpe pana ārammaṇe sati ārammaṇampi rūpakkhandhoti cha pañcakātīmsa honti. Saṅkhepena panete chasupi dvāresu pañceva khandhāti sapaccaye pañcakkhandhe aniccāti vitthāretvā vuccamāne bujjanakānaṃ ajjhāsayena idaṃ suttaṃ desitanti.

Channavaggo navamo.

## 10. Saḷavaggo

### 1. Adantaaguttavaṇṇanā

**94.** Saḷavaggassa paṭhame **adantāti** adamitā. **Aguttāti** agopitā. **Arakkhitāti** na rakkhitā. **Asaṃvutāti** apihitā. **Dukkhādhivāhā hontīti** nerayikādibhedam̐ adhikadukkham̐ āvahanakā honti. **Sukhādhivāhā hontīti** jhānamaggaphalapabhedam̐ adhikasukham̐ āvahanakā honti. Adhivahātipi pāṭho, esevattho.

**Saḷevāti** cha eva. **Asaṃvuto yattha dukkham̐ nigacchatīti** yesu āyatanesu saṃvaravirahito dukkham̐ pāpuṇāti. **Tesaṅca ye saṃvaraṇam̐ avedisunti** ye tesam̐ āyatanānaṃ saṃvaraṃ vindim̐su paṭilabhim̐su. **Viharantānavassutāti** viharanti anavassutā atintā.

**Asāditaṅca sādunti** assādavantaṅca madhuraṅca. **Phassadvayaṃ sukhadukkhe upekkheti** sukhaphassaṅca dukkhaphassaṅcāti idaṃ phassadvayaṃ upekkhe, upekkhāmevettha uppādeyyāti attho. Phassadvayaṃ sukhadukkham̐ upekkhoti vā pāṭho, phassahetukaṃ sukhadukkham̐ upekkho, sukhe anurodham̐ dukkhe ca virodham̐ anuppādentō upekkhako bhaveyyātipi attho. **Anānuruddho aviruddho kenacīti** kenaci saddhim̐ neva anuruddho na viruddho bhaveyya.

**Papañcasaññāti** kilesasaññāya papañcasaññā nāma hutvā. **Itarītarā narāti** lāmakasattā **papañcayantā upayantīti** papañcayamānā vaṭṭam̐ upagacchanti. **Saññinoti** sasaññā sattā. **Manomayaṃ gehasitaṅca sabbanti** sabbameva pañcakāmaguṇagehanissitam̐ manomayaṃ vitakkaṃ. **Panujjāti** panuditvā nīharitvā. **Nekkhammasitam̐ iriyatīti** dabbajātiko bhikkhu nekkhammasitam̐ iriyena iriyati.

**Chassu yadā subhāvitoti** chasu ārammaṇesu yadā suṭṭhu bhāvito. **Phuṭṭhassa cittaṃ na vikampate kvacīti** sukhaphassena vā dukkhaphassena vā phuṭṭhassa kismiṅci cittaṃ na kampati na vedhati. **Bhavattha jātimaraṇassa pāragāti** jātimaraṇānaṃ pāraṃ nibbānaṃ gamakā hotha.

### 2. Mālukyaputtasuttavaṇṇanā

**95.** Dutiye **mālukyaputtoti** mālukyabrāhmaṇiyā putto. **Etthāti** etasmim̐ tava ovādāyācane. Iminā theram̐ apasādetipi ussādetipi. Kathaṃ? Ayaṃ kira daharakāle rūpādīsū pamajjitvā pacchā mahallakakāle araññāvāsam̐ patthento kammaṭṭhānaṃ yācati. Atha bhagavā “ettha dahare kiṃ vakkhāma? Mālukyaputto viya tumhepi taruṇakāle pamajjitvā mahallakakāle araññaṃ pavisitvā samaṇadhammaṃ kareyyāthā”ti iminā adhippāyena bhaṇanto theram̐ apasādeti nāma.

Yasmā pana thero mahallakakālepi araññaṃ pavisitvā samaṇadhammaṃ kātukāmo, tasmā bhagavā

“ettha dahare kiṃ vakkhāma? Ayaṃ amhākaṃ mālukyaputto mahallakakālepi araññaṃ pavisitvā samaṇadhammaṃ kattukāmo kammaṭṭhānaṃ yācati, tumhe nāma taruṇakālepi vīriyaṃ na karothā”ti iminā adhippāyena bhaṇanto therāṃ ussādeti nāma.

**Yatra hi nāmāti** yo nāma. **Kiñcāpāhanti** kiñcāpi “ahaṃ mahallako”ti ñātaṃ. Yadi ahaṃ mahallako, mahallako samānopi sakkhissāmi samaṇadhammaṃ kātuṃ, desetu me, bhante, bhagavāti adhippāyena mahallakabhāvaṃ anuggaṇhanto ovādañca pasamsanto evamāha.

**Adiṭṭhā adiṭṭhapubbāti** imasmiṃ attabhāve adiṭṭhā atītepi adiṭṭhapubbā. **Na ca passasīti** etarahipi na passasi. **Na ca te hoti passeyyanti** evaṃ samannāhāropi te yattha natthi, api nu te tattha chandādayo uppajjeyyunti pucchati.

**Diṭṭhe diṭṭhamattanti** rūpāyatane cakkhuviññāṇena diṭṭhe diṭṭhamattaṃ bhavissati. Cakkhuviññāṇaṃ rūpe rūpamattameva passati, na niccādisabhāvaṃ, iti sesaviññāṇehipi me ettha diṭṭhamattameva cittaṃ bhavissatīti attho. Atha vā diṭṭhe diṭṭhaṃ nāma cakkhuviññāṇaṃ, rūpe rūpavijānananti attho. **Mattāti** pamāṇaṃ, diṭṭhaṃ mattā assāti diṭṭhamattaṃ, cittaṃ, cakkhuviññāṇamattameva me cittaṃ bhavissatīti attho. Idaṃ vuttaṃ hoti – yathā āpāthagatarūpe cakkhuviññāṇaṃ na rajjati na dussati na muyhati, evaṃ rāgādivirahena cakkhuviññāṇamattameva javanaṃ bhavissati, cakkhuviññāṇapamāṇeneva javanaṃ ṭhapessāmīti. Atha vā diṭṭhaṃ nāma cakkhuviññāṇena diṭṭharūpaṃ, diṭṭhe diṭṭhamattaṃ nāma tattheva uppannaṃ sampañcchanasantīraṇavoṭṭhabbanasāṅkhātāṃ cittattayaṃ. Yathā taṃ na rajjati, na dussati, na muyhati, evaṃ āpāthagate rūpe teneva sampañcchanādippamāṇena javanaṃ uppādessāmi, nāhaṃ taṃ pamāṇaṃ atikkamitvā rajjanādivasena uppajjituṃ dassāmīti ayamettha attho. Eseva nayo **sutamutesu**.

**Viññāte viññātamattanti** ettha pana viññātaṃ nāma manodvārāvajjanena viññātārammaṇaṃ, tasmīṃ viññāte viññātamattanti āvajjanapamāṇaṃ. Yathā āvajjanena na rajjati na dussati na muyhati, evaṃ rajjanādivasena uppajjituṃ adatvā āvajjanapamāṇeneva cittaṃ ṭhapessāmīti ayamettha attho.

**Yatoti yadā. Tatoti tadā. Na tenāti** tena rāgena vā ratto, dosena vā duṭṭho, mohena vā mūlho na bhavissati. **Tato tvaṃ mālukyaputta na tattathāti** yadā tvaṃ tena rāgena vā dosamohehi vā ratto vā duṭṭho vā mūlho vā na bhavissasi, tadā tvaṃ na tattha tasmīṃ diṭṭhe vā sutamutaviññāte vā paṭibaddho allīno patiṭṭhito nāma bhavissasi. **Nevidhāti**ādi vuttatthameva.

**Sati muṭṭhāti** sati natthā. **Taṅca ajjhosāti** taṃ ārammaṇaṃ gilitvā. **Abhijjhā ca vihesā cāti** abhijjhāya ca vihiṃsāya ca. Atha vā “tassa vaḍḍhantī”ti padenāpi saddhiṃ yojetabbaṃ, abhijjhā ca vihesā cāti imepi dve dhammā tassa vaḍḍhantīti attho.

**Cittamassūpahaññatīti** abhijjhāvihesāhi assa cittaṃ upahaññati. **Ācinatoti** ācinantassa. **Ārā nibbāna vuccatīti** evarūpassa puggalassa nibbānaṃ nāma dūre pavuccati. **Ghatvāti** ghāyitvā. **Bhotvāti** bhutvā sāyitvā lehitvā. **Phussāti** phusitvā. **Paṭissatoti** paṭissatisāṅkhātāya satiyā yutto. **Sevato cāpi vedananti** catumaggasampayuttaṃ nibbattitalokuttaravedanaṃ sevantassa. **Khīyatīti** khayamaṃ gacchati. Kiṃ taṃ? Dukkhampi kilesajātampi. **Aññataroti** asītiyā mahāsāvakaṇaṃ abbhantaro eko. Iti imasmiṃ sutte gāthāhipi vaṭṭavivaṭṭameva kathitaṃ.

### 3. Parihānadhammasuttavaṇṇanā

96. Tatiye **parihānadhammanti** parihānasabhāvaṃ. **Abhibhāyatanānīti** abhibhavitāni āyatanāni. **Sarasaṅkappāti** ettha sarantīti sarā, dhāvanti attho. Sarā ca te saṅkappā ca **sarasaṅkappā**. **Samyojanīyāti** bandhaniyā bandhanassa paccayabhūtā. **Taṅce bhikkhūti** taṃ evaṃ uppannaṃ kilesajātaṃ, taṃ vā ārammaṇaṃ. **Adhivāsetīti** citte āropetvā vāseti. **Nappajahatīti** chandarāgappahānena na pajahati. Evamaṃ sabbapadehi yojetabbaṃ. **Abhibhāyatanañhetamaṃ vuttaṃ**

**bhagavatā**ti etaṃ buddhena bhagavatā abhibhavitam āyatananti kathitam. Idha dhammaṃ pucchitvā vibhajantena puggalena dhammo dassito.

#### 4. Pamādavihārīsuttavaṇṇanā

97. Catutthe **asaṃvutassā**ti apihitassa na pidahitvā sañchāditvā ṭhapitassa. **Byāsiñcatī**ti viāsiñcati, kilesatintaṃ hutvā vattati. **Pāmojjanti** dubbalapīti. **Pīṭī**ti balavapīti. **Passaddhī**ti darathapassaddhi. **Dhammā na pātubhavanti**ti samathavipassanādhammā na uppajjanti. Imasmiṃ sutte puggalaṃ pucchitvā vibhajantena dhammena puggalo dassito.

#### 5. Saṃvarasuttavaṇṇanā

98. Pañcame **kathañca, bhikkhave, asaṃvaroti** idam maggakusalassa vāmaṃ muñcitvā dakkhiṇaṃ gaṇheyyāsīti paṭhamaṃ pahātabbamaggakkhānaṃ viya uddesakkamena avatvā desanākusalatāya paṭhamaṃ pahātabbadhammakkhānavasena vuttanti veditabbaṃ. Idha dhammaṃ pucchitvā dhammova vibhatto.

#### 6. Samādhisuttavaṇṇanā

99. Chaṭṭhe **samādhinti** cittekaggataṃ. Idañhi suttaṃ cittekaggatāya parihāyamāne disvā, “imesaṃ cittekaggataṃ labhantānaṃ kammaṭṭhānaṃ phātiṃ gamissatī”ti ñatvā kathitam.

#### 7. Paṭisallānasuttavaṇṇanā

100. Sattame **paṭisallānanti** kāyavivekaṃ. Idañhi suttaṃ kāyavivekena parihāyamāne disvā, “imesaṃ kāyavivekaṃ labhantānaṃ kammaṭṭhānaṃ phātiṃ gamissatī”ti ñatvā kathitam.

#### 8-9. Paṭhamaṇaṭṭhānaṃ suttavaṇṇanā

101-102. Aṭṭhamaṃ upamāya parivāretvā kathite bujghanakānaṃ, navamaṃ suddhikavaseneva bujghanakānaṃ ajjhāsavāsena vuttaṃ. Attho pana ubhayatthāpi khandhiyavagge vuttanayeneva veditabbo.

#### 10. Udakasuttavaṇṇanā

103. Dasame **udako sudanti** ettha **sudanti** nipātamattaṃ. **Udakoti** tassa nāmaṃ. **Idam jātu vedagūti** ettha **idanti** nipātamattaṃ. Atha vā idam mama vacanaṃ suṇāthāti dīpento evamāha. **Jātu vedagūti** ahaṃ ekaṃseneva vedagū, vedasaṅkhātena ñāṇena neyyesu gato, vedaṃ vā gato adhigato, paṇḍitohamasmīti attho. **Sabbajīti** ekaṃsena sabbavaṭṭaṃ jinitvā abhibhavitvā ṭhitosmīti vadati. **Apalikhatam gaṇḍamūlanti** apalikhatam dukkhamūlam. **Palikhaṇinti** palikhatam mayā, khanitvā ṭhitosmīti dīpeti.

**Mātāpettikasambhavassāti** mātito ca pitito ca nibbattena mātāpettikena sukkasoṇitena sambhūtaṃ. **Odanakummāsūpacayassāti** odanena ceva kummāsena ca upacitassa vaḍḍhitassa. **Aniccucchādanaparimaddanabhedanavidhamaṇasādhamaṇassāti** ettha ayaṃ kāyo hutvā abhavaṭṭhena aniccadhammo, duggandhavighātathāya tanuvilepanena ucchādanadhammo, aṅgapaccaṅgābhāvanodanathāya khuddakasambāhanena parimaddanadhammo, daharakāle vā ūrūsu sayāpetvā gabbhavāsena dussaññhitānaṃ tesam tesam aṅgānaṃ saṅghānasampādanattham añchanapīḷanādīnaṃ vasena parimaddanadhammo, evaṃ pariharitopi ca bhedanavidhamaṇasādhamaṇo bhijjati ceva vikirati ca, evaṃ sabhāvoti attho.



Tattha mātāpettikasambhavaodanakummāsūpacayaparimaddanapadehi vaḍḍhi kathitā, aniccabhedanavidhamaṅsanapadehi parihāni. Purimehi vā tīhi samudayo, pacchimehi atthaṅgamoti. Evaṃ cātumahābhūtikassa kāyassa vaḍḍhiparihāninibhattibhedā dassitā. Sesamaṃ uttānatthamevāti.

Saḷavaggo dasamo.

Dutiyo paṇṇāsako.

## 11. Yogakkhemivaggo

### 1. Yogakkhemisuttavaṇṇanā

**104.** Yogakkhemivaggassa paṭhame **yogakkhemipariyāyanti** catūhi yogehi khemino kāraṇabhūtaṃ. **Dhammapariyāyanti** dhammakāraṇaṃ. **Akkhāsi yoganti** yuttiṃ kathesi. **Tasmāti kasmā?** Kiṃ akkhātattā, udāhu pahīnattāti? Pahīnattā. Na hi akkhānena yogakkhemi nāma hoti.

### 2-10. Upādāyasuttādivaṇṇanā

**105-113.** Dutiye vedanāsukhadukkhamaṃ kathitaṃ, taṃ pana vipākasukhadukkhamaṃ vaṭṭati. Tatiye **dukkhassāti** vaṭṭadukkhassa. Catutthe **lokassāti** saṅkhāralokassa. Pañcamādīsū yaṃ vattabbaṃ siyā, taṃ khandhiyavagge vuttanayameva.

Yogakkhemivaggo ekādasamo.

## 12. Lokakāmaguṇavaggo

### 1-2. Paṭhamamārapāsasuttādivaṇṇanā

**114-115.** Lokakāmaguṇavaggassa paṭhame **āvāsagatoti** vasanaṭṭhānaṃ gato. **Mārassa vasaṃ gatoti** tividhassāpi mārasa vasaṃ gato. **Paṭimukka'ssa mārapāsoti** assa gīvāya mārapāso paṭimukko pavesito. Dutiyaṃ uttānameva.

### 3. Lokantagamanasuttavaṇṇanā

**116.** Tatiye **lokassāti** cakkavāḷalokassa. **Lokassa antanti** saṅkhāralokassa antaṃ. **Vihāraṃ pāvisīti** “mayi vihāraṃ pavīṭṭhe ime bhikkhū, imaṃ uddesaṃ ānandaṃ pucchissanti, so ca tesamaṃ mama sabbaññutaññānaena saṃsanditvā kathessati. Tato naṃ thomessāmi, mama thomaṇaṃ sutvā bhikkhū ānandaṃ upasaṅkamitabbaṃ, vacanañcassa sotabbaṃ saddhātābbaṃ maññissanti, taṃ nesaṃ bhavissati dīgharattaṃ hitāya sukhāyā”ti cintetvā saṃkhittena bhāsitaṃ vitthārena atthaṃ avibhajitvāva nisinnāsane antarahito gandhakuṭiyamaṃ pāturaṃhosi. Tena vuttaṃ “uṭṭhāyāsanā vihāraṃ pāvisī”ti.

**Satthu ceva saṃvaṇṇitoti** satthārā ca pasattho. **Viññūnanti** idampi karaṇatthe sāmivacanaṃ, paṇḍitehi sabrahmacārīhi ca sambhāvitoti attho. **Pahotīti** sakkoti. **Atikkammeva mūlaṃ atikkammeva khandhanti** sāro nāma mūle vā khandhe vā bhavēyya, tampi atikkamitvāti attho.

**Evamsampadamidanti** evamsampattikaṃ, īdisanti attho. **Atisitvāti** atikkamitvā. **Jānaṃ jānātīti** jānitābbaṃmeva jānāti. **Passamaṃ passatīti** passitābbaṃmeva passati. Yathā vā ekacco viparītaṃ gaṇhanto jānantopi na jānāti, passantopi na passati, na evamaṃ bhagavā. Bhagavā pana jānanto jānāti, passanto passatiyeva. Svāyamaṃ dassanapariṇāyakaṭṭhena **cakkhubhūto**. Viditakaraṇaṭṭhena **ñāṇabhūto**. Aviparītasabhāvaṭṭhena pariyattidhammapavattanato vā hadayena cintetvā vācāya nicchāritadhammamayoti **dhammabhūto**. Seṭṭhaṭṭhena **brahmabhūto**. Atha vā cakkhu viya bhūtoti

cakkhubhūto. Evametesu padesu attho veditabbo. Svāyaṃ dhammassa vattanato **vattā**. Pavattanato **pavattā**. Atthaṃ nīharitvā nīharitvā dassanasamatthatāya **atthassa ninnetā**. Amatādhigamāya paṭipattim desetīti **amatassa dātā**.

**Agarūṃ karitvā**ti punappunaṃ yācāpentopi hi garūṃ karoti nāma. Attano sekkhapaṭisambhidāñāne ṭhatvā sinerupādato vālikam uddharamāno viya dubbīññeyyaṃ katvā kathentopi garūṃ karotiyeva nāma. Evaṃ akatvā amhe punappunaṃ ayācāpetvā suviññeyyampi no katvā kathehīti vuttaṃ hoti.

**Yaṃ kho voti yaṃ kho tumhākaṃ. Cakkhunā kho, āvuso, lokasmiṃ lokasaññī hoti lokamānī**ti cakkhuñhi loke appahīnadiṭṭhi puthujjano sattalokavasena lokoti saññānāti ceva maññati ca, tathā cakkavāḷalokavasena. Na hi aññatra cakkhādīhi dvādasāyatanehi tassa sā saññā vā māno vā uppajjati. Tena vuttaṃ, “cakkhunā kho, āvuso, lokasmiṃ lokasaññī hoti lokamānī”ti. Imassa ca lokassa gamanena anto nāma nātuma vā daṭṭhuma vā pattuma vā na sakkā. Lujjanaṭṭhena pana tasseva cakkhādibhedassa lokassa nibbānasaṅkhātama antama appatvā vaṭṭadukkhassa antakiriya nāma natthīti veditabbā.

Evaṃ pañhaṃ vissajjetvā idāni “sāvakena pañho kathitoti mā nikkāṅkhā ahuvattha, ayaṃ bhagavā sabbaññūtaññānatulama gahetvā nisinno. Icchamānā tameva upasaṅkamitvā nikkāṅkhā hothā”ti uyyojento **ākaṅkhamānā paṇāti**ādīmāha.

**Imehi akārehī**ti imehi kāraṇehi cakkavāḷalokassa antābhāvakāraṇehi ceva saṅkhāralokassa antāpattikāraṇehi ca. **Imehi padehī**ti imehi akkharasampiṇḍanehi. **Byañjanehī**ti paṭiyekkaakkharehi.

**Paṇḍitoti** paṇḍiccena samannāgato. Catūhi kāraṇehi paṇḍito dhātukusalo āyatanakusalo paccayākāraṅkusalo kāraṅakāraṅakusaloti. **Mahāpaññoti** mahante atthe mahante dhamme mahantā niruttiyo mahantāni paṭibhānāni paṭiggaṇhanasamatthatāya mahāpaññāya samannāgato. **Yathā taṃ ānandenāti** yathā ānandena byākatama, taṃ sandhāya vuttaṃ. Yathā ānandena taṃ byākatama, ahampi taṃ evameva byākareyyanti attho.

#### 4. Kāmaguṇasuttavaṇṇanā

117. Catutthe **ye meti ye mama. Cetaso samphuṭṭhapubbā**ti cittaena anubhūtapubbā. **Tatra me cittaṃ bahulaṃ gacchamānaṃ gaccheyyāti** tesu pāsādattayatividhanāṭakādibhedasampattivasena anubhūtapubbesu pañcasu kāmaguṇesu bahūsu vāresu uppajjamānaṃ uppajjeyyāti dīpeti. **Paccuppannesu vāti** idha padhānacariyakāle chabbassāni supupphitavanasaṅḍajātānaṃ dijagaṇādīnaṃ vasena diṭṭhasutādibhedama manoramārammaṇama kāmaguṇama katvā dassento “evarūpesu paccuppannesu vā bahulaṃ uppajjeyyā”ti dasseti. **Appama vā anāgatesūti** anāgate “metteyyo nāma buddho bhavissati, saṅkho nāma rājā, ketumatī nāma rājadhānī”tiādivasena (dī. ni. 3.106) parittakameva anāgatesu kāmaguṇesu uppajjeyyāti dasseti. **Tatra me attarūpenāti** tatra mayā attano hitakāmajātikena. **Appamādoti** sātaccakiriya pañcasu kāmaguṇesu cittassa avossaggo. **Satīti** ārammaṇapariggahitasati. **Ārakkhoti** ayaṃ appamādo ca sati ca cetaso ārakkho karaṇīyo, evama me ahoṣīti dasseti, ārakkhatthāya ime dve dhammā kātabbāti vuttaṃ hoti.

**Tasmātiha, bhikkhave, se āyatane veditabbeti** yasmā cetaso ārakkhatthāya appamādo ca sati ca kātabbā, yasmā tasmīma āyatane vidite appamādena vā satiyā vā kātabbama natthī, tasmā se āyatane veditabbe, taṃ kāraṇama jānitabbanti attho. **Saḷāyatanaṇirodhanti** saḷāyatanaṇirodho vuccati nibbānaṃ, taṃ sandhāya bhāsītanti attho. Nibbānasmaññhi cakkhuādīni ceva nirujjhanti rūpasaññādayo ca nirujjhantīti. Sesama vuttanayameva.

#### 5-6. Sakkapañhasuttādivaṇṇanā

**118-119.** Pañcame **diṭṭheva dhammeti** imasmiṃyeva attabhāve. **Parinibbāyantīti** kilesaparinibbānena parinibbāyanti. **Tannissitaṃ viññāṇaṃ hotīti** tañhānissitaṃ kammaviññāṇaṃ hoti. **Tadupādānanti** taṃgahaṇaṃ, tañhāgahaṇena sahaṅgataṃ viññāṇaṃ hotīti attho. Chaṭṭhaṃ uttānameva.

### 7. Sāriputtasaddhivihārikasuttavaṇṇanā

**120.** Sattame **santānessatīti** ghaṭessati, yogavicchedamassa pāpuṇituṃ na dassati.

### 8. Rāhulovādasuttavaṇṇanā

**121.** Aṭṭhame **vimutti-paripācāniyāti** vimuttiṃ paripācentīti vimutti-paripācāniyā. **Dhammāti** pannarasa dhammā, te saddhindriyādīnaṃ visuddhikaraṇavasena veditabbā. Vuttañhetuṃ –

“Assaddhe puggale parivajjayato, saddhe puggale sevato bhajato payirupāsato, pasādanīye suttante paccavekkhato, imehi tīhākārehi saddhindriyaṃ visujjhati. Kusīte puggale parivajjayato, āradhāvīriye puggale sevato bhajato payirupāsato, sammappadhāne paccavekkhato, imehi tīhākārehi vīriyindriyaṃ visujjhati. Muṭṭhassatī puggale parivajjayato, upaṭṭhitassatī puggale sevato bhajato payirupāsato, satipaṭṭhāne paccavekkhato, imehi tīhākārehi satindriyaṃ visujjhati. Asamāhite puggale parivajjayato, samāhite puggale sevato bhajato payirupāsato, jhānavimokkhe paccavekkhato, imehi tīhākārehi samādhindriyaṃ visujjhati. Duppaññe puggale parivajjayato, paññavante puggale sevato bhajato payirupāsato, gambhīraññācariyaṃ paccavekkhato, imehi tīhākārehi paññindriyaṃ visujjhati. Iti ime pañca puggale parivajjayato, pañca puggale sevato bhajato payirupāsato, pañca suttante paccavekkhato, imehi pannarasahi ākārehi imāni pañcindriyāni visujjhantī”ti (paṭi. ma. 1.184).

Aparepi pannarasa dhammā vimutti-paripācāniyā – saddhāpañcamāni indriyāni, aniccasaññā, anicce dukkhasaññā, dukkhe anattasaññā, pahānasaññā, virāgasaññāti imā pañca nibbedhabhāgiyā saññā, meghiyattherassa kathitā kalyāṇamittatādayo pañca dhammāti (udā. 31). Kāya pana velāya bhagavato etadahosīti? Paccūsasamaye lokaṃ volokentassa.

**Anekāni devatāsahassānīti** āyasmataṃ rāhulena padumuttarassa bhagavato pādamūle pālitanāgarājakāle patthanaṃ paṭṭhapentena saddhiṃ patthanaṃ paṭṭhapitadevatāsu pana kāci bhūmaṭṭhakā devatā, kāci antalikkhaṭṭhakā, kāci cātumahārājikā, kāci devaloke, kāci brahmaloke nibbattā. Imasmiṃ pana divase sabbāpi tā ekaṭṭhāne andhavanasmīyeva sannipatitā, tā sandhāyāha – “anekāni devatāsahassānī”ti. **Dhammacakkhanti** imasmiṃ sutte cattāro ca maggā cattāri ca phalāni dhammacakkhanti veditabbāni. Tattha hi kāci devatā sotāpannā ahesuṃ, kāci sakadāgāmī, anāgāmī, khīṇāsavā. Tāsaṅca pana devatānaṃ ettakāti gaṇanavasena paricchedo natthi. Sesuṃ sabbattha uttānameva.

### 9-10. Saṃyojanīyadhammasuttādivaṇṇanā

**122-123.** Navamadasamāni iṭṭhārammaṇavasena kathiyamāne bujjanakānaṃ vasena vuttānīti.

Lokakāmaguṇavaggo dvādasamo.

### 13. Gahapativaggo

#### 1-3. Vesālīsuttādivaṇṇanā

**124-126.** Gahapativaggassa paṭhame **uggoti** pañītaḍāyakānaṃ aggauggo, so bhagavatā

“etadaggaṃ, bhikkhave, mama sāvakaṇaṃ paṇṭadāyakaṇaṃ yadidaṃ uggo gahapati”ti evaṃ etadagge ṭhapito. Sesametesu ceva dvīsu, tatiye ca vuttatthameva.

#### 4-5. Bhāradvājasuttādivaṇṇanā

**127-128.** Catutthe piṇḍaṃ ulamāno pariyesamāno pabbajitoti **piṇḍolo**. So kira parijñābhogo brāhmaṇo ahoṣi. Atha bhikkhusaṅghassa lābhasakkāraṃ disvā piṇḍatthāya nikkhamitvā pabbajito. So mahantaṃ kapallapattaṃ gahetvā carati, tena kapallapūraṃ yāguṃ pivati, kapallapūre pūve khādāti, kapallapūraṃ bhattaṃ bhujjati. Athassa mahagghasabhāvaṃ satthu ārocayimṣu. Satthā tassa pattatthavikaṃ nānujāni. Hetthāmañce pattaṃ nikkujjivā ṭhabeti. So ṭhapentopi ghaṃsantova paṇāmetvā ṭhabeti, gaṇhantopi ghaṃsantova ākaḍḍhitvā gaṇhāti. Taṃ gacchante kāle dhaṃsanena parikkhīṇaṃ nālikodanamattameva gaṇhanakaṃ jātaṃ. Tato satthu ārocesuṃ, athassa satthā pattatthavikaṃ anujāni. Thero aparena samayena indriyabhāvanaṃ bhāvetvā aggaphale arahatte patiṭṭhāsi. Iti so piṇḍatthāya pabbajitattā piṇḍolo, gottena pana bhāradvājoti ubhayaṃ ekato katvā **piṇḍolabhāradvājoti** vuccati.

**Upasaṅkamīti** uggatuggatehi mahāamaccehi parivuto upasaṅkami. Thero kira ekadivasaṃ sāvattiyaṃ piṇḍāya caritvā katabhattakicco nidāghasamaye sītaṭhāne divāvihāraṃ nisīdissamīti ākāseṇa gantvā gaṅgātīre udenassa rañño udapānaṃ nāma uyyānaṃ atthi, tattha pavisitvā aññatarasmiṃ rukkhamūle divāvihāraṃ nisīdi sītena udakavātena bījijamāno.

Udenopi kho nāma rājā sattāhaṃ mahāpānaṃ pivitvā sattame divase uyyānaṃ paṭijaggāpetvā mahājanaparivāro uyyānaṃ gantvā maṅgalasilāpatte atthatāya seyyāya nipajji. Tassa ekā paricārikā pāde sambāhamānā nisinnā. Rājā kamena niddaṃ okkami. Tasmim niddaṃ okkante nātakitthiyo “yassatthāya mayaṃ gītādīni payojeyyāma, so niddaṃ upagato, na ca niddākāle mahāsaddaṃ kātuṃ vaṭṭatī”ti attano attano tūriyāni ṭhabetvā uyyānaṃ pakkantā. Tā tattha tattha phalāphalāni khādamānā pupphāni piḷandhamānā vicarantiyo therāṃ disvā “mā saddaṃ karitthā”ti aññamaññaṃ nivārayamānā vanditvā nisīdimṣu. Thero “issā pahātabbā, maccheraṃ vinodetabba”ntiādīnā nayena tāsāṃ anurūpaṃ dhammakathaṃ kathesi.

Sāpi kho rañño pāde sambāhamānā nisinnā itthi pāde cāletvā rājānaṃ pabodhesi. So “kahaṃ tā gatā”ti pucchi. Kiṃ tāsāṃ tumhehi? Tā ekaṃ samaṇaṃ parivāretvā nisinnāti. Rājā kuddho uddhane pakkhittaloṇaṃ viya taṭataṭāyamāno utṭhahitvā “tambakipillikāhi naṃ khādāpessamī”ti gacchanto ekasmiṃ asokarukkhe tambakipillikānaṃ puṭaṃ disvā hatthenākaḍḍhitvā sākhaṃ gaṇhituṃ nāsakkhi. Kipillikapuṭo chijjivā rañño sīse pati, sakalasarīraṃ sālithusehi parikiṇṇaṃ viya daṇḍadīpikāhi ḍayhamānaṃ viya ca ahoṣi. Thero rañño paduṭṭhabhāvaṃ ṇatvā iddhiyā ākāsaṃ pakkhandi. Tāpi itthiyo utṭhāya rañño santikaṃ gantvā sarīraṃ puñchantiyo viya bhūmiyaṃ patitapatitā kipillikāyo gahetvā sarīre khipamānā sabbā mukhasattīhi vijjhimṣu – “kiṃ nāmetaṃ, aññe rājāno pabbajite disvā vandanti, pañhaṃ pucchanti, ayaṃ pana rājā kipillikapuṭaṃ sīse bhinditukāmo jāto”ti.

Rājā attano aparādhaṃ disvā uyyānapālaṃ pakkosāpetvā pucchi – “kiṃ esa pabbajito? Aññesuṃ divasesu idha āgacchatī”ti? Āma, devāti. Idha tvaṃ āgatadivase mayhaṃ āroceyyāsīti. Theropi katipāheneva puna āgantvā rukkhamūle nisīdi. Uyyānapālo disvā – “mahanto me ayaṃ paṇṇākāro”ti vegena gantvā rañño ārocesi. Rājā utṭhahitvā saṅkhapaṇavādisaddaṃ nivāretvā uggatuggatehi amaccehi saddhiṃ uyyānaṃ agamāsi. Tena vuttaṃ “upasaṅkamī”ti.

**Anikīlītāvino kāmesūti** yā kāmesu kāmakīlā, taṃ akīlītapubbā, aparibhuttakāmāti attho. **Addhānaṅca āpādentīti** paveṇiṃ paṭipādentī, dīgharattaṃ anubandhāpentī. **Mātumattīsūti** mātupamāṇāsu. Lokasmiñhi mātā bhaginī dhītāti idaṃ tividhaṃ garukārammaṇaṃ nāma, iti garukārammaṇe upanibandhaṃ cittaṃ vimocetuṃ na labhatīti dassento evamāha. Athassa tena pañhena cittaṃ anotarantaṃ disvā bhagavatā paṭikūlamanasikāravasena cittūpanibandhanatthaṃ vuttaṃ

dvattiṃsākāraḥkammaṭṭhānaṃ kathesi.

**Abhāvitakāyā**ti abhāvitapañcadvārikakāyā. **Tesaṃ taṃ dukkaraṃ hotī**ti tesaṃ taṃ asubhakammaṭṭhānaṃ bhāvetuṃ dukkaraṃ hoti. Itissa imināpi cittaṃ anotarantaṃ disvā indriyaṃvarasīlaṃ kathesi. Indriyaṃvarasmiñhi upanibandhacittaṃ viheṭhetuṃ na labhati. Rājā taṃ sutvā tattha otiṇṇacitto **acchariyaṃ, bho bhāradvājāti**ādīmāha.

**Arakkhiteneva kāyenā**tiādīsu hatthapāde kīlāpento gīvaṃ parivattento kāyaṃ na rakkhati nāma, nānappakāraṃ duṭṭhullaṃ kathento vacanaṃ na rakkhati nāma, kāmavitakkādayo vitakkento cittaṃ na rakkhati nāma. **Rakkhiteneva kāyenā**tiādīsu vuttavipariyāyena attho veditabbo.

**Ativiya maṃ tasmim samaye lobhadhammā parisahantī**ti maṃ tasmim samaye atikkamitvā lobho adhibhavatīti attho. **Upaṭṭhitāya satiyā**ti kāyagatāya satiyā supaṭṭhitāya. **Na maṃ tathā tasmim samayeti** tasmim samaye maṃ yathā pubbe, na tathā lobho atikkamitvā uppajjati attho. **Parisahantī**ti padassa uppajjantītipi atthoyeva. Iti imasmim sutte tayo kāyā kathitā. Kathaṃ? “Imameva kāya”nti ettha hi karaḥkāyo kathito, “bhāvitakāyo”ti ettha pañcadvārikakāyo, “rakkhiteneva kāyenā”ti ettha copanakāyo, kāyaviññattīti attho. Pañcamaṃ uttānameva.

## 6. Ghositasuttavaṇṇanā

**129.** Chaṭṭhe **rūpā ca manāpā**ti rūpā ca manāpā saṃvijjanti. **Cakkhuviññāṇaṇcā**ti cakkhuviññāṇaṇca saṃvijjati. **Sukhavedaniyaṃ phassaṃ**ti cakkhuviññāṇasampayuttaṃ upanissayavasena javanakāle sukhavedanāya paccayabhūtaṃ phassaṃ. **Sukhā vedanā**ti ekaṃ phassaṃ paṭicca javanavasena sukhavedanā uppajjati. Sesapadesupi eseva nayo.

Iti imasmim sutte tevīsati dhātuyo kathitā. Kathaṃ? Ettha hi cakkhupasādo cakkhudhātu, tassa ārammaṇaṃ rūpadhātu, cakkhuviññāṇaṃ viññāṇadhātu, cakkhuviññāṇadhātuyā saḥajātā tayo khandhā dhammadhātu, evaṃ pañcasu dvāresu catunnaṃ catunnaṃ vasena vīsati. Manodvāre “manodhātū”ti āvajjanacittaṃ gahitaṃ, ārammaṇaṇceva hadayavatthu ca dhammadhātu, vatthunissitaṃ manoviññāṇadhātūti evaṃ tevīsati honti. Evaṃ tevīsatiyā dhātūnaṃ vasena dhātunānattaṃ vuttaṃ bhagavatāti dasseti.

## 7-8. Hālidikānisuttādivaṇṇanā

**130-131.** Sattame **manāpaṃ itthetanti pajānā**ti yaṃ anena manāpaṃ rūpaṃ diṭṭhaṃ, taṃ itthetanti evametam manāpameva tanti pajānāti. **Cakkhuviññāṇaṃ sukhavedaniyaṇca phassaṃ paṭiccā**ti cakkhuviññāṇaṇceva, yo ca upanissayakoṭiyā vā anantarakoṭiyā vā samanantarakoṭiyā vā sampayuttakoṭiyā vā sukhavedanāya paccayo phasso, taṃ sukhavedaniyaṃ phassaṇca paṭicca uppajjati sukhavedanāti. Esa nayo sabbattha. Iti imesu dvīsū suttesu kiriyāmanoviññāṇadhātu āvajjanakiccā, manodhātuyeva vā samānā manodhātunāmena vuttāti veditabbā. Aṭṭhamaṃ uttānameva.

## 9. Lohicasuttavaṇṇanā

**132.** Navame **makkarakateti** evaṃnāmake nagare **araññakuṭikāyanti** araññe katāya pāṭiyekkāya kuṭiyaṃ, na vihārapaccantakuṭiyaṃ. **Māṇavakā**ti yepi tattha mahallakā, te mahallakakālepi antevāsikatāya māṇavakātveva vuttā. **Tenupasaṅkamimsūti** pāto sippaṃ uggaṇhitvā sāyaṃ “ācariyassa kaṭṭhāni āharissamā”ti araññaṃ pavisitvā vicarantā yena sā kuṭikā, tenupasaṅkamimsu. **Parito parito kuṭikāyā**ti tassā kuṭikāya samantato samantato. **Seleyyakānī**ti aññaṃaññaṃssa piṭṭhiṃ gahetvā laṅghitvā ito cito caṅkamanakīlanāni.

**Muṇḍakā**tiādīsu muṇḍe muṇḍāti, samaṇe ca samaṇāti vattum vaṭṭeyya, ime pana hīlentā “muṇḍakā samaṇakā”ti āhaṃsu. **Ibbhāti** gahapatikā. **Kaṇhāti** kaṇhā, kālakāti attho. **Bandhupādāpaccāti** ettha **bandhūti** brahmā adhippeto. Tañhi brāhmaṇā pitāmahoti voharanti. Pādānaṃ apaccā pādāpaccā, brahmuno piṭṭhipādato jātāti adhippāyo. Tesam kira ayaṃ laddhi “brāhmaṇā brahmuno mukhato nikkhantā, khattiyā urato, vessā nābhito, suddā jānuto, samaṇā piṭṭhipādato”ti. **Bharatakānanti** kuṭimbikānaṃ. Kuṭimbikā hi yasmā raṭṭhaṃ bharanti, tasmā bharatāti vuccanti. Ime pana paribhavaṃ katvā vadamānā “bharatakāna”nti āhaṃsu.

**Vihārā nikkhamitvāti** “rattiṭṭhakāparicchanne rajatapattasannibhasamavippakiṇṇavālike ramaṇīye pariveṇe kaṭṭhakalāpe bandhitvā khipamānā vālikaṃ āluḷetvā, hatthena hatthaṃ ādāya paṇṇakuṭiṃ pariyaṇtā ‘ime imesaṃ bharatakānaṃ sakkatā, ime imesaṃ bharatakānaṃ sakkatā’ti punappunaṃ viravantā ativiya ime mānavakā kīlaṃ karonti, vihāre bhikkhūnaṃ atthibhāvampi na jānanti, dassessāmi nesaṃ bhikkhūnaṃ atthibhāva”nti cintetvā paṇṇakuṭito nikkhami.

**Sīluttamā pubbatarā ahesunti** guṇavantānaṃ guṇe kathite nigguṇānaṃ guṇābhāvo pākaṭova bhavissatīti porāṇakabrāhmaṇānaṃ guṇe kathento evamāha. Tattha **sīluttamāti** sīlajetṭhakā. Sīlañhi tesam uttamaṃ, na jātigottaṃ. **Ye purāṇaṃ sarantīti** ye porāṇakaṃ brāhmaṇadhammaṃ saranti. **Abhibhuyya kodhanti** kodhaṃ abhibhavitvā tesam dvārāni suguttāni surakkhitāni ahesuṃ. **Dhamme ca jhāne ca ratāti** dasavidhe kusalakammaṃ pathadhamme aṭṭhasamāpattijhānesu ca ratā.

Evam porāṇānaṃ guṇaṃ kathetvā atthetarahi brāhmaṇānaṃ mānaṃ nimmaddento **ime ca vokkamma japāmaseti**ādīmāha. Tattha **vokkammāti** etehi guṇehi apakkamitvā. **Japāmaseti** mayaṃ japāma sajjhāyāmāti ettakeneva brāhmaṇamhāti maññamānā brāhmaṇā mayanti iminā gottena mattā hutvā **visamaṃ caranti**, visamāni kāyakammādīni karontīti attho. **Puthuattadaṇḍāti** puthu attā daṇḍā etehīti puthuattadaṇḍā, gahitanānāvīdhadaṇḍāti attho. **Sataṇhātāṇhesūti** sataṇhanittāṇhesu. **Aguttadvārassa bhavanti moghāti** asaṃvutadvārassa sabbepi vatasamādānā moghā bhavantīti dīpeti. Yathā kinti? **Supineva laddhaṃ purisassa vittanti** yathā supine purisassa laddhaṃ maṇimuttādinānāvīdhaṃ vittaṃ moghaṃ hoti, pabujjhivā kiñci na passati, evam moghā bhavantīti attho.

**Anāsakāti** ekāhadvīhādivasena anāhārakā. **Thaṇḍilasāyikā cāti** haritakusasanthate bhūmibhāge sayanaṃ, **pāto sinānañca tayo ca vedāti** pātova udakaṃ pavisitvā nhānañceva tayo ca vedā. **Kharājinaṃ jaṭā paṅkoti** kharasamphassaṃ ajinacammañceva jaṭākalāpo ca paṅko ca, paṅko nāma dantamalaṃ. **Mantā silabbataṃ tapoti** mantā ca ajasīlagosīlasaṅkhātāṃ sīlaṃ ajavatagovatasāṅkhātāṃ vatañca. Ayaṃ idāni brāhmaṇānaṃ tapoti vadati. **Kuhanā vaṅkadaṇḍā cāti** paṭicchannakūpo viya paṭicchannadosaṃ kohaññāñceva vaṅkadaṇḍo, ca udumbarapalāsabeḷuvarukkhānaṃ aññatarato gahitaṃ vaṅkadaṇḍāñcāti attho. **Udakācamaṇāni cāti** udakena mukhaparimajjanāni. **Vaṇṇā ete brāhmaṇānanti** ete brāhmaṇānaṃ parikkhārabhaṇḍakavaṇṇāti dasseti. **Kata kiñcikkhabhāvanāti** katā kiñcikkhabhāvanā. Ayameva vā pāṭho, āmisakiñcikkhassa vaḍḍhanatthāya katanti attho.

Evam etarahi brāhmaṇānaṃ mānaṃ nimmadditvā puna porāṇakabrāhmaṇānaṃ vaṇṇaṃ kathento **cittañca susamāhitanti**ādīmāha. Tattha **susamāhitanti** tesam brāhmaṇānaṃ cittaṃ upacārappanāsamādhīhi susamāhitaṃ ahoṣīti dasseti. **Akhilanti** mudu athaddhaṃ. **So maggo brahmapattiyāti** so seṭṭhapattiyā maggo, tumhe pana kiṃ brāhmaṇā nāmāti dīpento evamāha.

**Āgamaṃsu nu khvidhāti** āgamaṃsu nu kho idha. **Adhimuccatīti** kilesavasena adhimutto giddho hoti. **Byāpajjati** byāpādavasena pūticittaṃ hoti. **Parittacetasoti** anupaṭṭhitasatitāya saṃkilesacittena parittacitto. **Cetovimuttinti** phalasaṃmādhim. **Paññāvimuttinti** phalapaññaṃ. **Appamāṇacetasoti** upaṭṭhitasatitāya nikkilesacittena appamāṇacitto.

## 10. Verahaccānisuttavaṇṇanā

133. Dasame **kāmaṇḍāyanti** evaṃnāmake nagare. **Yaggheti** codanatthe nipāto. Sesam uttānamevāti.

Gahapativaggo terasamo.

## 14. Devadahavaggo

### 1. Devadahavaggaṇṇā

134. Devadahavaggassa paṭhame **devadahanti** napuṃsakalingena laddhanāmo nigamo. **Manoramāti** manam ramayantā, manāpāti attho. **Amanoramāti** amanāpā.

### 2. Khaṇasuttavaṇṇā

135. Dutiye **chaphassāyatanikā nāmāti** visum chaphassāyatanikā nāma nirayā natthi. Sabbesupi hi ekatiṃsamahānirayesu chadvārāphassāyatanapaññatti hotiyeva. Idaṃ pana avīcimahānirayaṃ sandhāya vuttaṃ. **Saggāti** idhāpi tāvatīṃsapurameva adhippetam. Kāmāvacaradevaloke pana ekasmimpi chaphassāyatanapaññattiyā abhāvo nāma natthi. Iminā kiṃ dīpeti? Niraye ekantadukkhasamappitabhāvena, devaloke ca ekantasukhasamappitattā ekantakhiḍḍārativasena uppannapamādena maggabrahmacariyavāsaṃ vasitum na sakkā. Manussaloko pana vokiṇṇasukhadukkho, idheva apāyopi saggopi paññāyati. Ayaṃ maggabrahmacariyassa kammabhūmi nāma, sā tumhehi laddhā. Tasmā ye vo ime mānussakā khandhā laddhā, te vo lābhā. Yañca vo idaṃ manussattaṃ laddhaṃ, paṭiladdho vo brahmacariyavāsassa khaṇo samayoti. Vuttampi hetam porāṇehi –

“Ayaṃ kammabhūmi idha maggabhāvanā,  
 Ṭhānāni saṃvejaniyā bahū idha;  
 Saṃvegasamvejaniyesu vatthusu,  
 Saṃvegajātova payuñca yoniso”ti.

### 3. Paṭhamarūpārāmasuttavaṇṇā

136. Tatiye **rūpasammuditāti** rūpe sammuditā pamoditā. **Dukkhāti** dukkhitā. **Sukhoti** nibbānasukhena sukhito. **Kevalāti** sakalā. **Yāvatatthīti vuccatīti** yattakā atthīti vuccati. **Ete voti** ettha vo-kāro nipātamattaṃ. **Paccanīkamidaṃ hoti, sabbalokena passatanti** yaṃ idaṃ passantānaṃ paṇḍitānaṃ dassanaṃ, taṃ sabbalokena paccanīkaṃ hoti viruddhaṃ. Loko hi pañcakkhandhe niccā sukhā attā subhāti maññati, paṇḍitā aniccā dukkhā anattā asubhāti. **Sukhato āhūti** sukhanti kathenti. **Sukhato vidūti** sukhanti jānanti. Sabbametaṃ nibbānameva sandhāya vuttaṃ.

**Sammūlhetthāti** ettha nibbāne sammūlḥā. **Aviddasūti** bālā. Sabbepi hi channavutipāsaṇḍino “nibbānaṃ pāpuṇissāmā”ti saññino hoti, te pana “nibbānaṃ nāma ida”ntipi na jānanti. **Nivutānanti** kilesanīvaraṇena nivutānaṃ pariyonaddhānaṃ. **Andhakāro apassatanti** apassantānaṃ andhakāro hoti. Kiṃ taṃ evaṃ hoti? Nibbānaṃ vā nibbānadassanaṃ vā apassantānañhi bālānaṃ nibbānampi nibbānadassanampi kāḷameghaavacchāditaṃ viya candamaṇḍalaṃ kaṭāhena paṭīkujjitapatto viya ca niccakālaṃ tamo ceva andhakāro ca sampajjati.

**Satañca vivaṭam hoti, āloko passatāmivāti** satañca sappurisānaṃ paññādassanena passantānaṃ nibbānaṃ āloko viya vivaṭam hoti. **Santike na vijānanti, magā dhammassa akovidāti** yaṃ attano sarīre kese vā lomādīsu vā aññatarakoṭṭhāsaṃ paricchinditvā anantameva adhigantabbato attano vā khandhānaṃ nirodhamaggato santike nibbānaṃ. Taṃ evaṃ santike samānampi maggabhūtā janā maggāmaggadhammassa catusaccadhammassa vā akovidā na jānanti.

**Māradheyānupannehī** tebhūmakavaṭṭaṃ mārassa nivāsaṭṭhānaṃ anupannehi. **Ko nu añña**tra ariyebhīti ṭhapetvā ariye ko nu añño nibbānapadaṃ jānituṃ arahati. **Sammadañña**ya parinibbanti arahattapaññaaya sammā jānitvā anantameva anāsavā hutvā kilesaparinibbānena parinibbanti. Atha vā sammadaññaaya anāsavā hutvā ante khandhāparinibbānena parinibbāyanti.

#### 4-12. Dutiyarūpārāmasuttādivaṇṇanā

**137-145.** Catutthaṃ suddhikaṃ katvā desiyamāne bujjhanakānaṃ ajjhāsayena vuttaṃ. Pañcamādīni tathā tathā bujjhantānaṃ ajjhāsayena vuttāni. Attho pana tesam pākaṭoyevāti.

Devadahavaggo cuddasamo.

#### 15. Navapurāṇavaggo

##### 1. Kammanirodhasuttavaṇṇanā

**146.** Navapurāṇavaggassa paṭhame **navapurāṇā**ṇīti navāni ca purāṇāni ca. **Cakkhu, bhikkhave, purāṇakamma**nti na cakkhu purāṇaṃ, kammameva purāṇaṃ, kammato pana nibbattatā paccayanāmena evaṃ vuttaṃ. **Abhisāṅkhatā**nti paccayehi abhisamāgantvā kataṃ. **Abhisāñcetayitā**nti cetanāya pakappitaṃ. **Vedaniyaṃ daṭṭhabbā**nti vedanāya vatthūti passitabbaṃ. **Nirodhā vimuttiṃ phusatī**ti imassa tividhassa kamma nirodhena vimuttiṃ phusati. **Ayaṃ vuccatī**ti ayaṃ tassā vimuttiyā ārammaṇabhūto nirodho kammanirodhoti vuccati. Iti imasmiṃ sutte pubbabhāgavipassanā kathitā.

##### 2-5. Aniccanibbānasappāyasuttādivaṇṇanā

**147-150.** Dutīye **nibbānasappāyā**nti nibbānassa sappāyaṃ upakārapaṭipadaṃ. Tatiyādīsūpi eseva nayo. Paṭipāṭiyā pana catūsūpi etesu suttesu saha vipassanāya cattāro maggā kathitā.

##### 6-7. Antevāsikasuttādivaṇṇanā

**151-152.** Chaṭṭhe **anantevāsika**nti anto vasanakakilesavirahitaṃ. **Anācariya**kanti ācaraṇakakilesavirahitaṃ. **Antassa vasantī**ti anto assa vasanti. **Te naṃ samudācarantī**ti te etaṃ adhibhavanti ajjhottharanti sikkhāpentī vā. “Evaṃ vejjakammaṃ karohi, evaṃ dūtakamma”nti iti sikkhāpanasāṅkhātena samudācaraṇatthenassa te ācariyā nāma honti, tehi ācariyehi sācariyakoti vuccati. Sesamettha vuttanayeneva veditabbaṃ. Sattamaṃ heṭṭhā kathitanayameva.

##### 8. Atthinukhopariyāyasuttavaṇṇanā

**153.** Aṭṭhame **yaṃ pariyāyaṃ āgammā**ti yaṃ kāraṇaṃ āgamma. **Añña**treva **saddhāyā**ti vinā saddhāya saddhaṃ apanetvā. Ettha ca saddhāti na paccakkhā saddhā. Yo pana parassa evaṃ kira evaṃ kirāti kathentassa sutvā uppanno saddahanākāro, taṃ sandhāyetaṃ vuttaṃ. **Ruciādīsūpi rucāpetvā** khamāpetvā atthetanti gahaṇākāro **ruci** nāma, evaṃ kira bhavissatīti anussavaṇaṃ **anussavo**, nisīditvā ekaṃ kāraṇaṃ cintentassa kāraṇaṃ upaṭṭhāti, evaṃ upaṭṭhitassa atthetanti gahaṇaṃ **ākāraparivitakko** nāma, kāraṇavitakkoti attho. Kāraṇaṃ cintentassa pāpikā laddhi uppajjati, taṃ atthesāti gahaṇākāro **diṭṭhinijjhānakkhanti** nāma. **Aññaṃ byākareyyā**ti imāni pañca ṭhānāni muñcivā arahattaṃ byākareyya. Imasmiṃ sutte sekhāsekhānaṃ paccavekkhaṇā kathitā.

##### 9-10. Indriyasampannasuttādivaṇṇanā



**154-155.** Navame **indriyasampannoti** paripuṇṇindriyo. Tattha yena cha indriyāni sammasitvā arahattaṃ pattam, so tehi nibbisevanehi indriyehi samannāgatattā, cakkhādīni vā cha indriyāni sammasantassa uppannehi saddhādīhi indriyehi samannāgatattā paripuṇṇindriyo nāma hoti, taṃ sandhāya bhagavā **cakkhundriye cetiādīnā** nayena desanaṃ vitthāretvā **ettāvātā kho bhikkhu indriyasampanno hotīti** āha. Dasamaṃ heṭṭhā vuttanayamevāti.

Navapurāṇavaggo pañcadasamo.

Tatiyo paṇṇāsako.

## 16. Nandikkhayavaggo

### 1-4. Ajjhattanandikkhayasuttādivaṇṇanā

**156-159.** Nandikkhayavaggassa paṭhame **nandikkhayā rāgakkhayo, rāgakkhayā nandikkhayoti** nandiyā ca rāgassa ca atthato ekattā vuttaṃ. **Suvinuttanti** arahattaphalavimuttivasena suṭṭhu vimuttaṃ. Sesamettha dutiyādīsu ca uttānameva.

### 5-6. Jīvakambavanasamādhisuttādivaṇṇanā

**160-161.** Pañcamaṃ samādhivikalānaṃ, chaṭṭhaṃ paṭisallānavikalānaṃ cittekaggatañca kāyavivekañca labhantānaṃ etesaṃ kammaṭṭhānaṃ phātiṃ gamissatīti ñatvā kathitaṃ. Tattha **okkhāyatīti** (paccakkhāyati) paññāyati pākaṭaṃ hoti. Iti dvīsūpi etesu saha vipassanāya cattāro maggā kathitā.

### 7-9. Koṭṭhikaaniccasuttādivaṇṇanā

**162-164.** Sattamādīsu tīsu therassa vimuttiparipācaniyā dhammāva kathitā.

### 10-12. Micchādiṭṭhipahānasuttādivaṇṇanā

**165-167.** Dasamādīni tīṇi pāṭiyekkena puggalajjhāsayavasena vuttāni. Tesam attho vuttanayeneva veditabboti.

Nandikkhayavaggo solasamo.

## 17. Saṭṭhipeyyālavaggo

### 1-60. Ajjhattaaniccachandasuttādivaṇṇanā

**168-227.** Tadanantaro saṭṭhipeyyālo nāma hoti, so uttānatthova. Yāni panettha saṭṭhi vuttāni, tāni “chando pahātabbo”ti evaṃ tassa tasseva padassa vasena bujjanakānaṃ ajjhāsayavasena vuttāni. Iti sabbāni tāni pāṭiyekkena puggalajjhāsayavasena kathitāni. Ekekasuttapariyosāne cettha saṭṭhi saṭṭhi bhikkhū arahattaṃ pattāti.

Saṭṭhipeyyālavaggo.

## 18. Samuddavaggo

### 1. Paṭhamasamuddasuttavaṇṇanā

**228.** Samuddavaggassa paṭhame **cakkhu, bhikkhave, purisassa samuddoti** yadi duppūraṇaṭṭhena yadi vā samuddanaṭṭhena samuddo, cakkhumeva samuddo. Tassa hi pathavito yāva akaniṭṭhabrahmalokā nīlādīraṃmaṇaṃ samosarantaṃ paripuṇṇabhāvaṃ kātuṃ na sakkoti, evaṃ duppūraṇaṭṭhenaṇi samuddo. Cakkhu ca tesu tesu nīlādīsu āraṃmaṇesu samuddati, asaṃvutaṃ hutvā osaramānaṃ kilesupattiyā kāraṇabhāvena sadosagamanena gacchatīti samuddanaṭṭhenaṇi samuddo. **Tassa rūpamayo vegoti** samuddassa appamāṇo ūmimayo vego viya tassāpi cakkhusamuddassa samosarantassa nīlādibhedassa āraṃmaṇassa vasena appameyyo rūpamayo vego veditabbo. **Yo taṃ rūpamayaṃ vegaṃ sahatīti** yo taṃ cakkhusamudde samosaṇaṃ rūpamayaṃ vegaṃ, manāpe rūpe rāgaṃ, amanāpe dosaṃ, asaṃapekkhite mohanti evaṃ rāgādikilese anuppādentō upekkhakabhāvena sahati.

**Saūmintiādīsu** kilesaūmīhi **saūmiṃ**. Kilesāvaṭṭehi **sāvaṭṭaṃ**. Kilesagāhehi **sagāhaṃ**. Kilesarakkhasēhi **sarakkhasaṃ**. Kodhūpāyāsassa ca vasena **saūmiṃ**. Vutañhetāṃ “ūmibhayanti kho, bhikkhave, kodhūpāyāsassetāṃ adhivacana”nti (itivu. 109; ma. ni. 2.162; a. ni. 4.122). Kāmaguṇavasena **sāvaṭṭaṃ**. Vutañhetāṃ “āvaṭṭaggāhoti kho, bhikkhave, pañcannaṃ kāmaguṇānaṃ adhivacana”nti (saṃ. ni. 4.241). Mātugāmasena **sagāhaṃ sarakkhasaṃ**. Vuttañhetāṃ “gāharakkhasoti kho, bhikkhave, mātugāmassetāṃ adhivacana”nti (itivu. 109). Sesavāresupi eseva nayo. **Sabhayaṃ duttaraṃ accatarīti** ūmibhayena sabhayaṃ duratikkamaṃ atikkamī. **Lokantaḡūti** saṅkhāralokassa antaṃ gato. **Pāragatoti vuccatīti** nibbānaṃ gatoti kathīyati.

### 2-3. Dutiyasamuddasuttādivaṇṇanā

**229-230.** Dutīye **samuddoti** samuddanaṭṭhena samuddo, kiledanaṭṭhena temanaṭṭhenaṇi vuttaṃ hoti. **Yebhuyenāti** ṭhapetvā ariyasāvake. **Samunnāti** kilinnā tintā nimuggā. **Tantākulakajātīti** adīti heṭṭhā vitthāritameva. **Maccujahoti** tayo maccū jahitvā ṭhito. **Nirupadhīti** tīhi upadhīhi anupadhi. **Apunabbhavāyāti** nibbānatthāya. **Amohayī maccurājanti** yathā tassa gatīṃ na jānāti, evaṃ maccurājanaṃ mohetvā gato. Tatiyaṃ vuttanayameva.

### 4-6. Khīrarukkhopamasuttādivaṇṇanā

**231-233.** Catutthe appahīnaṭṭhena **atthi**, tenevāha **so appahīnoti**. **Parittāti**, pabbatamattampi rūpaṃ anitṭhaṃ arajānīyaṃ parittaṃ nāma hoti, evarūpāpissa rūpā cittaṃ pariyādiyantīti dasseti. **Ko pana vādo adhimattānanti** itṭhāraṃmaṇaṃ panassa rajanīyaṃ vatthu cittaṃ pariyādiyatīti ettha kā kathā? Ettha ca nakhapiṭṭhipamaṇāmpi maṇimuttādi rajanīyaṃ vatthu adhimattāraṃmaṇamevāti veditabbaṃ. **Daharotiādīni** tīnīpi aññaṃaññaṃavevacanāneva. **Ābhindeyyāti** pahareyya padāleyya vā. Pañcame **taḡubhayanti** taṃ ubhayaṃ. Chaṭṭhaṃ uttānameva.

### 7. Udāyīsuttavaṇṇanā

**234.** Sattame **anekapariyāyenāti** anekehi kāraṇehi. **Itipāyanti** itipi ayaṃ. Imasmiṃ sutte aniccena anattalakkhaṇaṃ kathitaṃ.

### 8. Ādittapariyāyasuttavaṇṇanā

**235.** Aṭṭhame **anubyañjanaso nimittaggāhoti** “hatthā sobhanā pādā sobhanā”ti evaṃ anubyañjanavasena nimittaggāho. Nimittaggāhoti hi saṃsandetvā gahaṇaṃ, anubyañjanaggāhoti vibhattigahaṇaṃ. Nimittaggāho kumbhīlasadiso sabbameva gaṇhāti, anubyañjanaggāho rattapāsadiso vibhajitvā hatthapādādīsu taṃ taṃ koṭṭhāsaṃ. Ime pana dve gāhā ekajavanavārepi labbhanti, nānājavanavāre vattabbameva natthi.

**Nimittassādagathitanti** nimittassādena ganthitaṃ baddhaṃ. **Viññāṇanti** kammaviññāṇaṃ. **Tasmiṃ ce samaye kālaṃ kareyyāti** na koci saṃkiliṭṭhena cittena kālaṃ karonto nāma atthi. Sabbasattānañhi bhavaṅgeneva kālakiriyaṃ hoti. Kilesabhayaṃ pana dassento evamāha. Samayavasena vā evaṃ vuttaṃ. Cakkhudvārasmiñhi āpāthagate ārammaṇe rattacittaṃ vā duṭṭhacittaṃ vā mūlhacittaṃ vā ārammaṇarasam anubhavitvā bhavaṅgaṃ otarati, bhavaṅge thatvā kālakiriyaṃ karoti. Tasmiṃ samaye kālaṃ karontassa dveva gatiyo pāṭikaṅkhā, imassa samayassa vasenetam vuttaṃ.

**Imaṃ khvāhaṃ, bhikkhave, ādīnavanti** imaṃ anekāni vassasatasahassāni niraye anubhavitabbaṃ dukkhaṃ sampassamāno evaṃ vadāmi tattāya ayosalākāya akkhīni añjāpetukāmoti. Iminā nayena sabbattha attho veditabbo. **Ayosaṅkunāti** ayasūlena. **Sampalimaṭṭhanti** dvepi kaṇṇacchiddāni vinivijjhivā pathaviyaṃ ākoṭanavasena sampalimaṭṭhaṃ.

Tatīyavāre **sampalimaṭṭhanti** nakhacchedanaṃ pavesetvā ukkhipivā sahadhunaṭṭhena chindivā pātanavasena sampalimaṭṭhaṃ. Catutthavāre **sampalimaṭṭhanti** bandhanamūlaṃ chetvā pātanavasena sampalimaṭṭhaṃ. Pañcamavāre **sampalimaṭṭhanti** tikhiṇāya sattiyaṃ kāyapasādaṃ uppāṭetvā patanavasena sampalimaṭṭhaṃ. **Sattiyāti** ettha mahatī daṇḍakavāsī veditabbā. **Sottanti** nipajjitvā niddokkamaṇaṃ. **Yathārūpānaṃ vitakkānaṃ vasaṃ gato saṅghaṃ bhindeyyāti** iminā vitakkānaṃ yāva saṅghabhedā pāpakammāvahanatā dassitā. Sesamettha uttānameva.

## 9-10. Paṭhamahatthapādopamasuttādivaṇṇanā

**236-237.** Navame **hatthesu, bhikkhave, satīti** hatthesu vijjamānesu. Dasame **na hotīti** vuccamāne bujjhanakānaṃ ajjhāsayaavasena vuttaṃ. Dvīsūpi cetesu vipākasukhadukkameva dassetvā vaṭṭavivaṭṭaṃ kathitanti.

Samuddavaggo niṭṭhito.

## 19. Āsīvisavaggo

### 1. Āsīvisopamasuttavaṇṇanā

**238.** Āsīvisavaggassa paṭhame **bhikkhū āmantesīti** ekacārikadvicārikaticārikacatucārikapañcacārike sabhāgavuttino kārake yuttapayutte sabbepi dukkhalakkhaṇakammaṭṭhānike parivāretvā nisinne yogāvācare bhikkhū āmantesi. Idañhi suttaṃ puggalajjhāsayaena vuttaṃ. Puggalesūpi vipañcītaññūnaṃ disāvāsikānaṃ dukkhalakkhaṇakammaṭṭhānikānaṃ upaṭṭhānavelāya āgantvā sathhāraṃ parivāretvā nisinnānaṃ vasena vuttaṃ. Evaṃ santepi ugghaṭṭitaññūādīnaṃ catunnampi puggalānaṃ paccayabhūtametvaṃ. Ugghaṭṭitaññū puggalo hi imassa suttassa mātīkānikkhepeveva arahattaṃ pāpuṇissati, vipañcītaññū mātīkāya vitthārabhājanena, neyyapuggalo imameva suttaṃ sajjhāyanto paripucchanto yoniso manasikaronto kalyāṇamitte sevanto bhajanto payirupāsanto arahattaṃ pāpuṇissati. Padaparamassetam suttaṃ anāgate vāsānā bhavissatīti evaṃ sabbesampi upakārabhāvaṃ ñatvā bhagavā sineruṃ ukkhipanto viya ākāsaṃ vitthārento viya cakkavālapabbataṃ kampaṇto viya ca mahantena ussāhena **seyyathāpi, bhikkhavesi** imaṃ āsīvisopamasuttaṃ ārabhi.

Tattha **cattāro āsīvisāti** kaṭṭhamukho, pūtimukho, aggimukho, satthamukhoti ime cattāro. Tesu kaṭṭhamukhena daṭṭhassa sakalasarīraṃ sukkhakaṭṭhaṃ viya thaddhaṃ hoti, sandhipabbesu adhimattaṃ ayasūlasamappitaṃ viya tiṭṭhati. Pūtimukhena daṭṭhassa pakkapūtipanasam viya vipubbakabhāvaṃ āpajjitvā paggharati, caṅgavāre pakkhittaudakaṃ viya hoti. Aggimukhena daṭṭhassa sakalasarīraṃ jhāyitvā bhasmamuṭṭhi viya thusamuṭṭhi viya ca vippakiriyati. Sattamukhena daṭṭhassa sakalasarīraṃ bhijjati, asanipātaṭṭhānaṃ viya mahānikhādanena khatasandhimukhaṃ viya ca hoti. Evaṃ visavasena vibhattā cattāro āsīvisā.

Visavegavikārena panete soḷasa honti. Kaṭṭhamukho hi daṭṭhavisō, ditṭhavisō, phutṭhavisō, vātavisōti catubbidho hoti. Tena hi daṭṭhampi ditṭhampi phutṭhampi tassa vātena pahaṭampi sarīraṃ vuttappakārena thaddhaṃ hoti. Sesesupi eseva nayoti. Evaṃ visavegavikāravasena soḷasa honti.

Puna puggalapaṇṇattivasena catusaṭṭhi honti. Kathaṃ? Kaṭṭhamukhesu tāva daṭṭhavisō ca āgatavisō no ghoravisō, ghoravisō no āgatavisō, āgatavisō ceva ghoravisō ca, nevāgatavisō na ghoravisōti catubbidho hoti. Tattha yassa visaṃ sampajjalitatinukkāya aggi viya sīghaṃ abhiruhitvā akkhīni gahetvā khandhaṃ gahetvā sīsaṃ gahetvā ṭhitanti vattabbaṃ āpajjati maṇisappādīnaṃ visaṃ viya, maṇaṃ pana parivattetvā kaṇṇavātaṃ datvā daṇḍakena pahaṭamatte otarivā daṭṭhaṭṭhāneyeva tiṭṭhati, ayaṃ āgatavisō no ghoravisō nāma. Yassa pana visaṃ saṇikaṃ abhiruhati, āruḷhāruḷhaṭṭhāne pana ayaṃ sītaudakaṃ viya hoti udakasappādīnaṃ visaṃ viya, dvādasavassaccayenāpi kaṇṇapiṭṭhikhandhapiṭṭhikādīsū gaṇḍapīḷakādivasena paññāyati, mantaparivattanādīsū ca kayiramānāsu sīghaṃ na otarati, ayaṃ ghoravisō no āgatavisō nāma. Yassa pana visaṃ sīghaṃ abhiruhati, na sīghaṃ otarati aneḷakasappādīnaṃ visaṃ viya, ayaṃ āgatavisō ceva ghoravisō ca. Yassa pana visaṃ maṇaṃ hoti, otāriyamānampi sukheneva otarati nīlasappadhammanisappādīnaṃ visaṃ viya, ayaṃ nevāgatavisō na ghoravisō nāma. Iminā upāyena kaṭṭhamukhe daṭṭhavisādayo pūtimukhādīsū ca daṭṭhavisādayo veditabbāti. Evaṃ puggalapaṇṇattivasena catusaṭṭhi.

Tesu “aṇḍajā nāgā”tiādīnā (saṃ. ni. 3.342-344) yonivasena ekekaṃ catudhā vibhajitvā chapaṇṇāsādhikāni dve satāni honti. Te jalajāthalaṃ dviguṇitā dvādasādhikāni pañcasatāni honti, te kāmarūpaakāmarūpanaṃ vasena dviguṇitā catuvīsādhikasahasasaṅkhā honti. Puna gatamaggassa paṭilomato saṃkhippamānā kaṭṭhamukhādivasena cattārova hontīti. Te sandhāya bhagavā “seyyathāpi, bhikkhave, cattāro āsīvisā”ti āha. Kulavasena hi ete gahitā.

Tattha **āsīvisāti** āsittavisātipi āsīvisā, asitavisātipi āsīvisā, asisadisavisātipi āsīvisā. **Āsittavisāti** sakalakāye āsiñcitvā viya ṭhapitavisā, parassa ca attano sarīre ca āsiñcanavisāti attho. **Asitavisāti** yaṃ yaṃ etehi asitaṃ hoti paribhuttaṃ, taṃ taṃ visameva sampajjati, tasmā asitaṃ visaṃ hoti etesanti āsīvisā. **Asisadisavisāti** asīviya tikhiṇaṃ paramammacchedanasamattaṃ visaṃ etesanti āsīvisāti evamettha vacanatto veditabbo. **Uggatejāti** uggatejā balavatejā. **Ghoravisāti** dunnimmaddanavisā.

**Evaṃ vadeyyunti** paṭijaggāpanatthaṃ evaṃ vadeyyuṃ. Rājāno hi āsīvise gāhāpetvā – “tathārūpe core vā etehi ḍaṃsāpetvā māressāma, nagarūparodhakāle parasenāya vā taṃ khipissāma, parabalaṃ nimmaddetuṃ asakkontā subhojanaṃ bhuñjitvā varasayanaṃ āruya etehi attānaṃ ḍaṃsāpetvā sattūnaṃ vasaṃ anāgacchantā attano ruciyā marissāmā”ti āsīvise jaggāpentī. Te yaṃ coraṃ sahasāva māretuṃ na icchantī, “evamete dīgharattaṃ dukkhappatto hutvā marissantī”ti icchantā taṃ purisaṃ evaṃ vadanti **ime te ambho purisa cattāro āsīvisāti**.

Tattha **kālena kālanti** kāle kāle. **Samvesetabbāti** nipajjāpetabbā. **Aññataro vā aññataro vāti** kaṭṭhamukhādīsū yo koci. **Yaṃ te ambho purisa karaṇīyaṃ, taṃ karohīti** idaṃ atthacarakassa vacanaṃ veditabbaṃ. Tassa kira purisassa evaṃ āsīvise paṭipādetvā ‘ayaṃ vo upaṭṭhāko’ti catūsū peḷāsu ṭhapitānaṃ āsīvisānaṃ ārocentī. Atheko nikkhamitvā āgamma tassa purisassa dakkhiṇapādānūsārena abhiruhitvā dakkhiṇatthaṃ maṇibandhato paṭṭhāya veṭhetvā dakkhiṇakaṇṇasotamūle phaṇaṃ katvā susūti karonto nipajji. Aparo vāmapādānūsārena abhiruhitvā tatheva vāmahatthaṃ veṭhetvā vāmakāṇṇasotamūle phaṇaṃ katvā susūti karonto nipajji, tatiyo nikkhamitvā abhimukhaṃ abhiruhitvā kucchim veṭhetvā galavāṭakamūle phaṇaṃ katvā susūti karonto nipajji, catuttho piṭṭhibhāgena abhiruhitvā gīvaṃ veṭhetvā uparimuddhani phaṇaṃ ṭhapetvā susūti karonto nipajji.

Evaṃ catūsū āsīvisesu sarīraṭṭhakesuyeva jātesu eko tassa purisassa atthacarakapuriso taṃ disvā “kiṃ te, bho purisa, laddha”nti, pucchi. Tato tena “ime me, bho, hatthesu hatthakaṭakaṃ viya bhāsu keyūraṃ viya kucchimhi kucchi veṭhanasāṭako viya kaṇṇesu kaṇṇacūḷikā viya gale muttāvaliyo viya sīse sīsapasādhanāṃ viya keci alaṅkāravisesā raññā dinnā”ti vutte so āha – “bho andhabāla, mā evaṃ

maññittha ‘rañña me tuṭṭhenetaṃ pasādhanam dinna’nti. Tvaṃ rañño āgucārī coro, ime ca cattāro āsīvisā durupaṭṭhāhā duppaṭṭijaggiyā, ekasmiṃ uṭṭhātukāme eko nhāyitukāmo hoti, ekasmiṃ nhāyitukāme eko bhuñjitukāmo, ekasmiṃ bhuñjitukāme eko nipajjitukāmo. Tesu yasseva icchā na pūrati, so tattheva ḍamsitvā māretī’ti. Atthi pana, bho, evaṃ sante koci sotthimaggoti? Āma, rājapurisānaṃ vikkhittabhāvaṃ ñatvā palāyanaṃ sotthibhāvoti vatvā ‘yaṃ te karaṇīyaṃ, taṃ karohī’ti vadeyya.

Taṃ sutvā itaro catunnaṃ āsīvisānaṃ pamādakkaṇaṃ rājapurisehi ca pavivittaṃ disvā, vāmahatthena dakkhiṇahatthaṃ veṭhetvā, dakkhiṇakaṇṇacūlikāya phaṇaṃ ṭhapetvā, sayitāsīvisassa sarīraṃ parimajjanto viya saṅikaṃ taṃ apantvā, eteneva upāyena sesepi apantvā tesam bhīto palāyeyya. Atha naṃ te āsīvisā ‘ayaṃ amhākaṃ rañña upaṭṭhāko dinno’ti anubandhamānā āgaccheyyūṃ. Idaṃ sandhāya **atha kho so, bhikkhave, puriso bhīto catunnaṃ āsīvisānaṃ...pe... palāyethāti** vuttaṃ.

Tasmiṃ pana purise evaṃ āgatamaggaṃ oloketvā oloketvā palāyante rājā ‘palāto so puriso’ti sutvā ‘ko nu kho taṃ anubandhitvā ghātetuṃ sakkhissatī’ti vicinanto tasseva paccatthike pañca jane labhitvā ‘gacchatha naṃ anubandhitvā ghātethā’ti peseyya. Athassa atthacarā purisā taṃ pavattiṃ ñatvā āroceyyūṃ. So bhīyosomattāya bhīto palāyetha. Imamatthaṃ sandhāya **tamenam evam vadeyyunti**ti vuttaṃ.

**Chaṭṭho antaracaro vadhakoti** ‘paṭṭhamam āsīvisehi anubaddho ito cito ca te vañcento palāyi, idāni pañcahi paccatthikehi anubaddho suṭṭhutamaṃ palāyati, na sakkā so evaṃ gahetuṃ, upalālanāya pana sakkā, tasmā daharakālato paṭṭhāya ekato khāditvā ca pivitvā ca santhavaṃ antaracaram vadhakamassa pesethā’ti amaccehi vuttena rañña pariyesitvā pesito antaracaro vadhako.

**So passeyya suññaṃ gāmani** nivattitvā oloketvā padam ghāyitvā ghāyitvā vegenāgacchante cattāro āsīvise pañca vadhake paccatthike chaṭṭhañca antaracaram vadhakam ‘nivatta bho, mā palāyi, puttadārena saddhiṃ kāme paribhuñjanto sukhaṃ vasissasi’ti vatvā āgacchantaṃ disvā, bhīyosomattāya yena vā tena vā palāyanto paccantaratthe abhimukhagataṃ ekaṃ chakuṭikaṃ suññaṃ gāmaṃ passeyya. **Rittakaññaeva paviseyyāti** dhanadhaññaṃ capīṭhādīhi virahitattā rittakaññaeva paviseyya. **Tucchakam suññaṃ kanti** etasseva vevacanaṃ. **Parimaseyyāti** ‘sace pānīyaṃ bhavissati, pivissāmi, sace bhattaṃ bhavissati, bhuñjissāmi’ti bhājanaṃ vivaritvā hatthaṃ anto pavesetvā parimaseyya.

**Tamenam evam vadeyyunti** channaṃ gharānaṃ ekagharepi kiñci alabhitvā gāmamajjhe eko sandacchāyo rukkho atthi, tattha vaṅkaphalakaṃ atthataṃ disvā, ‘idha tāva nisīdissāmi’ti gantvā, tattha nisinnaṃ mandamandena vātena bījīyamānaṃ tattakamattampi sukhaṃ santato assādayamānaṃ, tamenam purisaṃ kecideva atthacarakā bahi pavattiṃ ñatvā āgatā evaṃ vadeyyūṃ. **Idāni ambho purisāti** ambho, purisa, idāni. **Corā gāmaghātakāti** ‘yadevettha labhissāma, taṃ gaṇhissāma vā ghātessāma vā’ti āgatā cha gāmaghātakacorā.

**Udakaṇṇavanti** gambhīraṃ puthulaṃ udakaṃ. Gambhīrampi hi aputhulaṃ, puthulaṃ vā agambhīraṃ, na aṇṇavoti vuccati, yampana gambhīrañca puthulañca, tassevetam nāmaṃ. **Sāsaṅkam sappatibhayanti** catunnaṃ āsīvisānaṃ pañcannaṃ vadhakānaṃ chaṭṭhassa antaracarassa channañca gāmaghātakacorānaṃ vasena sāsaṅkam sappatibhayaṃ. **Khemam appatibhayanti** tesameva āsīvisādīnaṃ abhāvena khemañca nibbhayañca vicitrauyyānavaraṃ bahvannapānaṃ devanagarasadisam. **Na cassa nāvā santāraṇīti** ‘imāya nāvāya orimatīrato paratīraṃ gamissanti’ti evaṃ ṭhapitā ca santāraṇī nāvā na bhaveyya. **Uttarasetu vāti** rukkhasetu-jaṅghasetu-sakaṭasetuṇaṃ aññataro uttarasetu vā na bhaveyya. **Tiṭṭhati brāhmaṇoti** na kho esa brāhmaṇo. Kasmā naṃ brāhmaṇoti āha? Ettakānaṃ paccatthikānaṃ bāhitattā, desanaṃ vā vinivattento ekaṃ khīṇāsavabrāhmaṇaṃ dassetumpi evamāha.

Tasmim̄ pana evaṃ uttiṇṇe cattāro āsīvisā “na laddho vatāsi amhehi, ajja te murumurāya jīvitam̄ khādītṷā chaḍḍeyyāma”. Pañca paccatthikā “na laddho vatāsi amhehi, ajja te parivāretvā āngamaṅgāni chindītṷā rañño santikaṃ gatā sataṃ vā sahasaṃ vā labheyyāma”. Chaṭṭho antaracaro “na laddho vatāsi mayā, ajja te phalikavaṇṇena asinā sīsaṃ chindītṷā, senāpatiṭṭhānaṃ labhitṷā sampattim̄ anubhaveyyam̄”. Cha corā “na laddho vatāsi amhehi, ajja te vividhāni kammakāraṇāni kāretvā bahudhanaṃ āharāpessāmā”’ti cintetvā, udakaṇṇavaṃ otarituṃ asakkontā rañño āṇāya kopitattā parato gantumpi avisahantā tattheva sussitṷā mareyyuṃ.

**Upamā kho myāyanti** ettha evaṃ ādito paṭṭhāya opammasaṃsandanaṃ veditabbaṃ – rājā viya hi kammaṃ daṭṭhabbaṃ, rājaparādhikapuriso viya vaṭṭanissito puthujjano. Cattāro āsīvisā viya cattāri mahābhūtāni, rañño tassa cattāro āsīvise paṭicchāpitakālo viya kammunā puthujjanassa paṭisandhikkhaṇeyeva catunnaṃ mahābhūtānaṃ dinnakālo. “Imesaṃ āsīvisānaṃ pamādakkhaṇe rājapurisānaṃca vivittakkhaṇe nikkhamitṷā yaṃ te ambho, purisa, karaṇīyaṃ, taṃ karohī”’ti vacanena “palāyassū”’ti vuttakālo viya satthārā imassa bhikkhuno mahābhūtakammaṭṭhānaṃ kathetvā “imesu catūsu mahābhūtesu nibbinda virajja, evaṃ vaṭṭato parimuccissasī”’ti kathitakālo, tassa purisassa atthacarakavacanāṃ sutṷā catunnaṃ āsīvisānaṃ pamādakkhaṇe rājapurisānaṃca vivittakkhaṇe nikkhamitṷā yena vā tena vā palāyanaṃ viya imassa bhikkhuno satthu santike kammaṭṭhānaṃ labhitṷā mahābhūtāsīvisehi parimuccanatthāya ṇāṇapalāyanena palāyanaṃ.

Idāni **catunnetam̄ mahābhūtānaṃ adhivacanaṃ pathavīdhātuyā āpodhātuyā**tiādīsu catumahābhūtakathā ca pañcupādānakkhandhakathā ca āyatanakathā ca visuddhimagge vitthāritanayeneva veditabbā. Ettha ca kaṭṭhamukhaāsīviso viya pathavīdhātu daṭṭhabbā, pūtimukhaaggimukhasatthamukhā viya sesadhātuyo. Yatheva hi kaṭṭhamukhena daṭṭhassa sakalakāyo thaddho hoti, evaṃ pathavīdhātupakopenāpi. Yathā ca pūtimukhādīhi daṭṭhassa paggharati ceva jhāyati ca chijjati ca, evaṃ āpodhātutejodhātuvāyodhātupakopenāpīti. Tenāhu aṭṭhakathācariyā –

“Pathaddho bhavatī kāyo, daṭṭho kaṭṭhamukhena vā;  
Pathavīdhātupakopena, hoti kaṭṭhamukheva so.

“Pūtikko bhavatī kāyo, daṭṭho pūtimukhena vā;  
Āpodhātupakopena, hoti pūtimukheva so.

“Santatto bhavatī kāyo, daṭṭho aggimukhena vā;  
Tejodhātupakopena, hoti aggimukheva so.

“Sañchinno bhavatī kāyo, daṭṭho satthamukhena vā;  
Vāyodhātupakopena, hoti satthamukheva so”’ti. –

Evaṃ tāvettha visesato sadisabhāvo veditabbo.

Avisesato pana āsayato visavegavikārato anattaggahaṇato durupaṭṭhānato durāsadato akataññutato avisesakārīto anantadosūpaddavatoti imehi kāraṇehi etesaṃ āsīvisasadisatā veditabbā. Tattha **āsayatoti** āsīvisānañhi vammiko āsayo, tattheva te vasanti. Mahābhūtānampi kāyavammiko āsayo. Āsīvisānañca rukkhasusiratiṇapaṇṇagahanasaṅkāraṭṭhānānipi āsayo. Etesupi hi te vasanti. Mahābhūtānampi kāyasusiraṃ kāyagahanaṃ kāyasaṅkāraṭṭhānaṃ āsayoti. Evaṃ tāva āsayato sadisatā veditabbā.

**Visavegavikāratoti** āsīvisā hi kulavasena kaṭṭhamukhādibhedato cattāro. Tattha ekeko visavikārato vibhajjamāno daṭṭhavisādivasena catubbidho hoti. Mahābhūtānipi paccattalakkhaṇavasena pathavīdhātubhedato cattāri. Ettha ekekaṃ kammaṃsamutṭhānādivasena catubbidhaṃ hoti. Evaṃ visavegavikārato sadisatā veditabbā.

**Anatthaggaṇatoti** āsīvise gaṇhantā pañca anatthe gaṇhanti – duggandhaṃ gaṇhanti, asuciṃ gaṇhanti, byādhiṃ gaṇhanti, viṣaṃ gaṇhanti, maraṇaṃ gaṇhanti. Mahābhūtanipi gaṇhantā pañca anatthe gaṇhanti – duggandhaṃ gaṇhanti, asuciṃ gaṇhanti, byādhiṃ gaṇhanti, jaraṃ gaṇhanti, maraṇaṃ gaṇhanti. Tenāhu porāṇā –

“Yekeci sappamaṃ gaṇhanti, mīlhalittaṃ mahāviṣaṃ;  
Pañca gaṇhantunatthāni, loke sappābhinandino.

“Duggandhaṃ asuciṃ byādhiṃ, viṣaṃ maraṇapañcamaṃ;  
Anatthā honti pañcete, mīlhalitte bhujāṅgame.

“Evamevaṃ akusalā, andhabālaputhujjanā;  
Pañca gaṇhantunatthāni, bhava jātābhinandino.

“Duggandhaṃ asuciṃ byādhiṃ, jaraṃ maraṇapañcamaṃ;  
Anatthā honti pañcete, mīlhalitteva pannaṅge”ti. –

Evamaṃ anatthaggaṇato sadisatā veditabbā.

**Durupaṭṭhānatoti** te āsīvisā durupaṭṭhānā, ekasmiṃ utṭhātukāme eko nhāyitukāmo hoti, tasmimṃ nhāyitukāme aparo bhujitukāmo, tasmimṃ bhujitukāme añño nipajjitukāmo hoti. Tesu yassa yasseva ajjhāsayo na pūrati, so tattheva ḍaṃsitvā māreti. Imehi pana āsīvisehi bhūtāneva durupaṭṭhānatarāni. Pathavīdhātuyā hi bhesajje kayiramāne āpodhātu kuppatti, tasseva bhesajjaṃ karontassa tejodhātūti evamaṃ ekissā bhesajje kayiramāne aparā kuppantīti. Evamaṃ durupaṭṭhānato sadisatā veditabbā.

**Durāsadatoti** durāsadā hi āsīvisā, gehassa purimabhāge āsīviṣaṃ disvā pacchimabhāgena palāyanti, pacchimabhāge disvā purimabhāgena, gehamaṃjhe disvā gabbhaṃ pavisanti, gabbhe disvā mañcapīṭhaṃ abhiruhanti. Mahābhūtanī tatopi durāsadatarāni. Tathārūpena hi kuṭṭharogena phuṭṭhassa kaṇṇanāsādīni chinditvā patanti, sarīraṃ samphuṭṭi nīlamakkhikā parivārenti, sarīragandho dūratova ubbāhati. Taṃ purisaṃ akkosamānampi paridevamānampi neva rosavasena, na kāruṇṇena, upasaṅkamuṃ sakkonti, nāsikaṃ pidahitvā kheḷaṃ pātentā dūratova naṃ vivajjenti. Evamaṃ aññesampi bhagandarakucchirogavātarogādīnaṃ bībhacchajjegucchabhāvakarānaṃ rogaṇaṃ vasena ayamevattho vibhāvetabboti. Evamaṃ durāsadato sadisatā veditabbā.

**Akataññutatoti** āsīvisā hi akataññuno honti, nhāpiyamānāpi bhojyamānāpi gandhamālādīhi pūjyamānāpi peḷāyaṃ pakkhipitvā parihariyamānāpi otārameva gavesanti. Yattha otāraṃ labhanti, tattheva naṃ ḍaṃsitvā mārenti. Āsīvisehipi mahābhūtanēva akataññutarāni. Etesaṃhi kataṃ nāma natthi, sītena vā uṇhena vā nimmalena jalena nhāpiyamānānīpi gandhamālādīhi sakkariyamānānīpi muduvatthamudusayanamuduyānādīhi parihariyamānānīpi, varabhojanaṃ bhojyamānānīpi, varapānaṃ pāyāpiyamānānīpi otārameva gavesanti. Yattha otāraṃ labhanti, tattheva kuppitvā anayabyasanaṃ pāpentīti. Evamaṃ akataññutato sadisatā veditabbā.

**Avisesakāritoti** āsīvisā hi “ayaṃ khattiyō vā brāhmaṇo vā vesso vā suddo vā gahaṭṭho vā pabbajito vā”ti viṣesaṃ na karonti, sampattasampattameva ḍaṃsitvā mārenti. Mahābhūtanīpi “ayaṃ khattiyō vā brāhmaṇo vā vesso vā suddo vā gahaṭṭho vā pabbajito vā devo vā manusso vā māro vā brahmā vā nigguṇo vā saguṇo vā”ti viṣesaṃ na karonti. Yadi hi nesamaṃ “ayaṃ guṇavā”ti lajjā uppajjeyya, sadevake loke aggapuggale tathāgate lajjamaṃ uppādeyyuṃ. Athāpi nesamaṃ “ayaṃ mahāpañño ayaṃ mahiddhiko ayaṃ dhutavādo”tiādīnā nayena lajjā uppajjeyya, dhammasenāpatisāriputtattherādīsu lajjamaṃ uppādeyyuṃ. Athāpi nesamaṃ “ayaṃ nigguṇo dāruṇo thaddho”ti bhayaṃ uppajjeyya, sadevake loke nigguṇathaddhadāruṇānaṃ aggassa devadattassa channaṃ vā sathārānaṃ bhāyeyyuṃ, na ca lajjanti na ca bhāyanti, kuppitvā yaṃkiñci anayabyasanaṃ āpādentiyeva. Evamaṃ avisesakārito sadisatā

veditabbā.

**Anantadosūpaddavatoti** āsīvise nissāya uppajjanakānañhi dosūpaddavānaṃ pamāṇaṃ natthi. Tathā hete ḍaṃsitvā kāṇampi karonti khujjampi pīṭhasappimpi ekapakhalampīti evaṃ aparimāṇaṃ vipākāraṃ dassenti. Bhūtānipi kuppitāni na kāṇādibhāvesu na kiñci vipākāraṃ na karonti, appamāṇo etesaṃ dosūpaddavoti. Evaṃ anantadosūpaddavato sadisatā veditabbā.

Idānettha catumahābhūtavasena yāva arahattā kammaṭṭhānaṃ kathetabbaṃ siyā, taṃ visuddhimagge catudhātuvavatthānaniddese kathitameva.

**Pañca vadhakā paccatthikāti kho bhikkhave pañcannetaṃ upādānakkhandhānaṃ adhivacananti** ettha dvīhi ākārehi khandhānaṃ vadhakapaccatthikasadisatā veditabbā. Khandhā hi aññamaññañca vadhenti, tesu ca santesu vadho nāma paññāyati. Kathaṃ? Rūpaṃ tāva rūpampi vadheti arūpampi, tathā arūpaṃ arūpampi vadheti rūpampi. Kathaṃ? Ayañhi pathavīdhātu bhijjamānā itarā tisso dhātuyo gahetvāva bhijjati, āpodhātuādīsipi eseva nayo, evaṃ tāva rūpaṃ rūpameva vadheti. Rūpakkhandho pana bhijjamāno cattāro arūpakkhandhe gahetvāva bhijjati, evaṃ rūpaṃ arūpampi vadheti. Vedanākkhandhopi bhijjamāno saññāsankhāraviññānakkhandhe gahetvāva bhijjati. Saññākkhandhādīsipi eseva nayo. Evaṃ arūpaṃ arūpameva vadheti. Cutikkhaṇe pana cattāro arūpakkhandhā bhijjamānā vatthurūpampi gahetvāva bhijjanti, evaṃ arūpaṃ rūpampi vadheti. Evaṃ tāva aññamaññaṃ vadhentīti vadhakā. Yattha pana khandhā atthi, tattha chedanabhedanavadhabandhanādayo honti, na aññatthāti. Evaṃ khandhesu santesu vadho paññāyatītipi vadhakā.

Idāni pañcakkhandhe rūpārūpavasena dve koṭṭhāse katvā, rūpavasena vā nāmavasena vā rūpariggaḥaṃ ādiṃ katvā, yāva arahattā kammaṭṭhānaṃ kathetabbaṃ siyā tampi visuddhimagge kathitameva.

**Chaṭṭho antaracaro vadhako ukkhittāsikoti kho, bhikkhave, nandīrāgassetam adhivacananti** ettha dvīhākārehi nandīrāgassa ukkhittāsikavadhakasadisatā veditabbā paññāsīrapātanato ca yonisampaṭipādanato ca. Kathaṃ? Cakkhudvārasmiñhi iṭṭhārammaṇe āpāthagate taṃ ārammaṇaṃ nissāya lobho uppajjati, ettāvataṃ paññāsīsaṃ patitaṃ nāma hoti, sotadvārādīsipi eseva nayo. Evaṃ tāva paññāsīrapātanato sadisatā veditabbā. Nandīrāgo panesa aṇḍajādhedā catasso yoniyo upaneti. Tassa yoniupagamanamūlakāni pañcavīsati mahābhayāni dvattiṃsa kammakāraṇāni ca āgatāneva hontīti evaṃ yonisampaṭipādanatopissa ukkhittāsikavadhakasadisatā veditabbā.

Iti nandīrāgavasenāpi ekassa bhikkhuno kammaṭṭhānaṃ kathitameva hoti. Kathaṃ? Ayañhi nandīrāgo sañkhārakkhandho, taṃ sañkhārakkhandhoti vavatthapetvā taṃsampaṭipādanā vedanā vedanākkhandho, saññā saññākkhandho, cittaṃ viññānakkhandho, tesam vatthārammaṇaṃ rūpakkhandhoti, evaṃ pañcakkhandhe vavatthapeti. Idāni te pañcakkhandhe nāmarūpavasena vavatthapetvā, tesam paccayapariyesanato paṭṭhāya vipassanaṃ vaḍḍhetvā, anupubbena eko arahattaṃ pāpuṇātīti evaṃ nandīrāgavaseṇa kammaṭṭhānaṃ kathitaṃ hoti.

Channaṃ ajjhattikāyatanānaṃ suññagāmena sadisatā pāliyaṃyeva āgatā. Ayaṃ panettha kammaṭṭhānanayo – yathā ca te cha corā chakuṭikaṃ suññaṃ gāmaṃ pavisitvā aparāparaṃ vicarantā kiñci alabhitvā gāmena anattikā honti, evamevaṃ bhikkhu chasu ajjhattikāyatanesu abhinivisitvā vicinanto “aha”nti vā “mama”nti vā gahetabbaṃ kiñci adisvā tehi anattiko hoti. So “vipassanaṃ paṭṭhapessāmi”ti upādārūpakammaṭṭhānavasena cakkhupasādādayo pariggahetvā “ayaṃ rūpakkhandho”ti vavatthapeti, manāyatanam “arūpakkhandho”ti. Iti sabbānīpetāni nāmañceva rūpañcāti nāmarūpavasena vavatthapetvā, tesam paccayaṃ pariyesitvā vipassanaṃ vaḍḍhetvā, sañkhāre sammasanto anupubbena arahatte patiṭṭhāti. Idaṃ ekassa bhikkhuno yāva arahattā kammaṭṭhānaṃ kathitaṃ hoti.



Idāni bāhirānaṃ gāmaghātakacorehi sadisataṃ dassento **corā gāmaghātakāti khoti**ādīmāha. Tattha **manāpāmanāpesūti** karaṇatthe bhummaṃ, manāpāmanāpehīti attho. Tattha coresu gāmaṃ hanantesu pañca kiccāni vattanti – corā tāva gāmaṃ parivāretvā ʒhitā aggiṃ datvā kaṭakaṭasaddaṃ uṭṭhāpentī, tato manussā hatthasāraṃ gahetvā bahi nikkhamanti. Tato tehi saddhiṃ bhaṇḍakassa kāraṇā hatthaparāmāsaṃ karonti. Keci panettha pahāraṃ pāpuṇanti, keci pahāraṭṭhāne patanti, avasese pana arogajane bandhitvā attano vasanaṭṭhānaṃ netvā rajjubandhanādīhi bandhitvā dāsaparibhogena paribhuṅjanti.

Tattha gāmaghātakacorānaṃ gāmaṃ parivāretvā aggidānaṃ viya chasu dvāresu ārammaṇe āpāthagate kilesapariḷāhuppatti veditabbā, hatthasāraṃ ādāya bahi nikkhamanaṃ viya. Tankhaṇe kusaladhammaṃ pahāya akusalasamaṅgitā, bhaṇḍakassa kāraṇā hatthaparāmāsanāpajjanaṃ viya dukkaṭadubbhāsitaṃ pācittiyathullaccayānaṃ āpajjanakālo, pahāraladdhakālo viya saṅghādisesaṃ āpajjanakālo, pahāraṃ laddhā pana pahāraṭṭhāne patitakālo viya pārājikaṃ āpajjitvā assamaṇakālo, avasesajanassa bandhitvā vasanaṭṭhānaṃ netvā dāsaparibhogena paribhuṅjanakālo viya tameva ārammaṇaṃ nissāya sabbesaṃ passantānaṃ yeva cūḷasīlamajjhimasīlamahāsīlāni bhinditvā sikkhaṃ paccakkhāya gihibhāvaṃ āpajjanakālo. Tatrassa puttadāraṃ posentassa sandiṭṭhiko dukkhakkhandho veditabbo, kālaṃ katvā apāye nibbattassa samparāyiko.

Imānīpi bāhirāyatanāni ekassa bhikkhuno kammaṭṭhānavaseneva kathitāni. Ettha hi rūpādīni cattāri upādārūpāni, phoṭṭhabbāyatanānaṃ tisso dhātuyo, dhammāyatane āpodhātuyā saddhiṃ tā catassoti imāni cattāri bhūtāni, tesāṃ paricchedavasena ākāsadhātu, lahutādivasena lahutādayoti evamidāṃ sabbampi bhūtupādāyarūpaṃ rūpakkhandho, tadārammaṇā vedanādayo cattāro arūpakkhandhā. Tattha “rūpakkhandho rūpaṃ, cattāro arūpino khandhā nāma”nti. Nāmarūpaṃ vavatthapetvā purimanayeneva paṭipajjantassa yāva arahattā kammaṭṭhānaṃ kathitaṃ hoti.

**Oghānanti** ettha duruttaraṇaṭṭho oghaṭṭho. Ete hi “sīlasaṃvaram pūretvā arahattaṃ pāpuṇissāmī”ti ajjhāsayaṃ samuṭṭhāpetvā kalyāṇamitte nissāya sammā vāyamantena taritabbā, yena vā tena vā duruttarā. Iminā duruttaraṇaṭṭhena oghāti vuccanti. Tepi ekassa bhikkhuno kammaṭṭhānavasena kathitā. Cattāropi hi ete eko saṅkhārakkhandho vāti. Sesāṃ nandīrāge vuttanayeneva yojetvā vitthāretabbāṃ.

**Sakkāyassetāṃ adhivacananti**, sakkāyopi hi āsīvisādīhi udakaṇṇavassa orimatīraṃ viya catumahābhūtādīhi sāsāṅko sappaṭibhaya, sopi ekassa bhikkhuno kammaṭṭhānavaseneva kathito. Sakkāyo hi tebhūmakapañcakkhandhā, te ca samāsato nāmarūpamevāti. Evamettha nāmarūpavavatthānaṃ ādiṃ katvā yāva arahattā kammaṭṭhānaṃ vitthāretabbanti.

**Nibbānassetāṃ adhivacananti** nibbānañhi udakaṇṇavassa pārīmatīraṃ viya catumahābhūtādīhi khemaṃ appaṭibhayaṃ. **Vīriyārambhassetāṃ adhivacananti** ettha cittakiriyadassanattaṃ heṭṭhā vuttavāyāmaṃ eva vīriyanti gaṇhitvā dasseti. **Tiṇṇo pārāṅgatoti** taritvā pārāṃ gato.

Tattha yathā sāsāṅkaorimatīre ʒhitena udakaṇṇavaṃ taritukāmena katipāhaṃ vasitvā saṅikaṃ nāvaṃ sajjitvā udakakīḷaṃ kīḷantena viya na nāvā abhiruhitabbā. Evaṃ karonto hi anāruḷhova byasanaṃ pāpuṇāti. Evameva kilesaṇṇavaṃ taritukāmena “taruṇo tāvamhi, mahallakakāle aṭṭhaṅgikamaggakullaṃ bandhissāmī”ti papañco na kātabbo. Evaṃ karonto hi mahallakakālaṃ apatvāpi vināsaṃ pāpuṇāti, patvāpi kātuṃ na sakkoti. Bhaddekarattādīni pana anussaritvā vegeneva ayaṃ ariyamaggakullo bandhitabbo.

Yathā ca kullaṃ bandhantassa hatthapādapāripūri icchitabbā. Kuṇṭhapādo hi khañjapādo vā patiṭṭhātuṃ na sakkoti, phaṇahatthakādayo tiṇapaṇṇādīni gahetuṃ na sakkonti. Evamimampi ariyamaggakullaṃ bandhantassa sīlapādānañceva saddhāhatthassa ca pāripūri icchitabbā. Na hi dussīlo assaddho sāsane appaṭiṭṭhito paṭipattiṃ assaddahanto ariyamaggakullaṃ bandhituṃ sakkoti. Yathā ca paripuṇṇahatthapādopi dubbalo byādhipīḷito kullaṃ bandhituṃ na sakkoti, thāmasampannova sakkoti,

evaṃ sīlavā saddhopi alaso kusīto imaṃ maggakullaṃ bandhituṃ na sakkoti, āradhāvīriyova sakkotīti imaṃ bandhitukāmena āradhāvīriyena bhavitabbaṃ. Yathā so puriso kullaṃ bandhitvā tīre t̥hatvā yojanavithhāraṃ udakaṇṇavaṃ “ayaṃ mayā paccattapurisakāraṃ nissāya nittharitabbo”ti mānasam bandhati, evaṃ yogināpi caṅkamā oruyha “ajja mayā catumaggavajjhaṃ kilesaṇṇavaṃ taritvā arahatte patit̥thātabba”nti mānasam bandhitabbaṃ.

Yathā ca so puriso kullaṃ nissāya udakaṇṇavaṃ taranto gāvutamattaṃ gantvā nivattitvā olokeno “ekakoṭṭhāsaṃ atikkantomhi, aññe tayo sesā”ti jānāti, aparampi gāvutamattaṃ gantvā nivattitvā olokeno “dve atikkantomhi, dve sesā”ti jānāti, aparampi gāvutamattaṃ gantvā nivattitvā olokeno “tayo atikkantomhi, eko seso”ti jānāti, tampi atikkamma nivattitvā olokeno “cattāropi me koṭṭhasā atikkantā”ti jānāti, tañca kullaṃ pādena akkamitvā sotābhimukhaṃ khipitvā uttaritvā tīre tiṭṭhati. Evaṃ ayampi bhikkhu ariyamaggakullaṃ nissāya kilesaṇṇavaṃ taranto sotāpattimaggena paṭhamamaggavajjhe kilese taritvā maggānantare phale t̥hito paccavekkhaṇaññena nivattitvā olokeno “catumaggavajjhānaṃ me kilesānaṃ eko koṭṭhāso pahīno, itare tayo sesā”ti jānāti. Puna tatheva indriyabalabojjhaṅgāni samodhānetvā saṅkhāre sammasanto sakadāgāmimaggena dutiyamaggavajjhe kilese taritvā maggānantare phale t̥hito paccavekkhaṇaññena nivattitvā, olokeno “catumaggavajjhānaṃ me kilesānaṃ dve koṭṭhāsā pahīnā, itare dve sesā”ti jānāti. Puna tatheva indriyabalabojjhaṅgāni samodhānetvā saṅkhāre sammasanto anāgāmimaggena tatiyamaggavajjhe kilese taritvā maggānantare phale t̥hito paccavekkhaṇaññena nivattitvā olokeno “catumaggavajjhānaṃ me kilesānaṃ tayo koṭṭhāsā pahīnā, eko seso”ti jānāti. Puna tatheva indriyabalabojjhaṅgāni samodhānetvā saṅkhāre sammasanto arahattamaggena catutthamaggavajjhe kilese taritvā maggānantare phale t̥hito paccavekkhaṇaññena nivattitvā olokeno “sabbakilesā me pahīnā”ti jānāti.

Yathā so puriso taṃ kullaṃ sote pavāhetvā uttaritvā thale t̥hito nagaraṃ pavisitvā uparipāsādaragato “ettakena vatamhi anathena mutto”ti ekaggacitto tuṭṭhamānaso nisīdati, evaṃ tasmimyeva vā āsane aññesu vā rattit̥ṭhānadvit̥ṭhānādīsu yattha katthaci nisinno “ettakena vatamhi anathena mutto”ti nibbānārammaṇaṃ phalasaṃpattim appētvā ekaggacitto tuṭṭhamānaso nisīdati. Idaṃ vā sandhāya vuttaṃ **tiṇṇo pāraṅgato thale tiṭṭhati brāhmaṇoti kho, bhikkhave, arahato etaṃ adhivacananti**. Evaṃ tāvettha nānakammaṭṭhānāni kathitāni, samodhānetvā pana sabbānipi ekameva katvā dassetabbāni. Ekaṃ katvā dassentenāpi pañcakkhandhavaseneva vinivattetabbāni.

Kathaṃ? Ettha hi cattāri mahābhūtāni ajjhattikāni pañcāyatanāni bāhirāni pañcāyatanāni dhammāyatane pannarasa sukhumarūpāni sakkāyassa ekadesoti ayaṃ rūpakkhandho, manāyatanaṃ viññānakkhandho dhammāyatane kadeso cattāro oghā sakkāyekadesoti ime cattāro arūpino khandhā. Tattha rūpakkhandho rūpaṃ, cattāro arūpino khandhā nāmanti idaṃ nāmarūpaṃ. Tassa nandīrāgo kāmogho bhavogho dhammāyatane kadeso sakkāyekadesoti ime paccayā. Iti sappaccayaṃ nāmarūpaṃ vavatthapēti nāma. Sappaccayaṃ nāmarūpaṃ vavatthapētvā tilakkhaṇaṃ āropētvā vipassanaṃ vaḍḍhetvā saṅkhāre sammasanto arahattaṃ pāpuṇātīti idaṃ ekassa bhikkhuno niyyānamukhaṃ.

Tattha cattāro mahābhūtā pañcupādānakkhandhā ajjhattikabāhirāni ekādasāyatanāni dhammāyatane kadeso diṭṭhogho avijjogho sakkāyekadesoti idaṃ dukkhasaccaṃ, nandīrāgo dhammāyatane kadeso kāmogho bhavogho sakkāyekadesoti idaṃ samudayasaccaṃ, pārimatīrasaṅkhātaṃ nibbānaṃ nirodhasaccaṃ, ariyamaggo maggasaccaṃ. Tattha dve saccāni vaṭṭaṃ, dve vivaṭṭaṃ, dve lokiyāni, dve lokuttarānīti cattāri saccāni soḷasaḥākārehi saṭṭhinayasahasēhi vibhajitvā dassetabbānīti. Desanāpariyosāne vipaṅcītaññū pañcasatā bhikkhū arahatte patit̥ṭhahimsu. Suttaṃ pana dukkhalakkhaṇavasena kathitaṃ.

## 2. Rathopamasuttavaṇṇanā

**239.** Dutīye **sukhasomanassabahuloti** kāyikasukhañceva cetasikasomanassañca bahulaṃ assāti sukhasomanassabahulo. **Yoni cassa āradhā hotīti** kāraṇaṅcassa paripuṇṇaṃ hoti. **Āsavānaṃ**

**khayāyāti** idha āsavakkhayoti arahattamaggo adhippeto, tadatthāyāti attho. **Odhasapatodoti** rathamajjhe tiriyaṃ ṭhapitapatodo. **Yenicchakanti** yena disābhāgena icchati. **Yadicchakanti** yaṃ yaṃ gamaṇaṃ icchati. **Sāreyyāti** peseyya. **Paccāsāreyyāti** paṭivinivatteyya. **Ārakkhāyāti** rakkhaṇatthāya. **Samyamāyāti** veganiggahaṇatthāya. **Damāyāti** nibbisevanatthāya. **Upasamāyāti** kilesūpasamatthāya.

**Evameva khoti** ettha yathā akusalassa sārathino adante sindhave yojetvā visamamaggena rathaṃ pesentassa cakkānīpi bhijjanti, akkhopi sindhavānaṅca khurā, attanāpi anayabyasanaṃ pāpuṇāti, na ca icchiticchitena gamanena sāretuṃ sakkoti; evaṃ chasu indriyesu aguttadvāro bhikkhu na icchiticchitaṃ samaṇaratīṃ anubhavituṃ sakkoti. Yathā pana cheko sārathī dante sindhave yojetvā, same bhūmibhāge rathaṃ otāretvā rasmiyo gahetvā, sindhavānaṃ khuresu satīṃ ṭhapetvā, patodaṃ ādāya nibbisevane katvā, pesento icchiticchitena gamanena sāreti. Evameva chasu indriyesu guttadvāro bhikkhu imasmiṃ sāsane icchiticchitaṃ samaṇaratīṃ anubhoti, sace aniccānupassanābhimukhaṃ ñāṇaṃ pesetukāmo hoti, tadabhimukhaṃ ñāṇaṃ gacchati. Dukkhanupassanādīsipi eseva nayo.

**Bhojane mattaññūti** bhojanamhi pamāṇaññū. Tattha dve pamāṇāni – paṭiggahaṇapamāṇaṅca paribhogapamāṇaṅca. Tattha paṭiggahaṇapamāṇe dāyakassa vaso vedītabbo, deyyadhammassa vaso vedītabbo, attano thāmo jānitabbo. Evarūpo hi bhikkhu sace deyyadhammo bahuko hoti, dāyako appaṃ dātukāmo, dāyakassa vasena appaṃ gaṇhāti. Deyyadhammo appo, dāyako bahuṃ dātukāmo, deyyadhammassa vasena appaṃ gaṇhāti. Deyyadhammopi bahu, dāyakopi bahuṃ dātukāmo, attano thāmaṃ ñatvā pamāṇena gaṇhāti. So tāya paṭiggahaṇe mattaññūtāya anuppannaṅca lābhaṃ uppādeti, uppannaṅca thāvaram karoti dhammikattissamahārājakāle **sattavassiko sāmaṇero** viya.

Raṅṅo kira pañcahi sakaṭasatehi guḷaṃ āhariṃsu. Rājā “manāpo paṇṇākāro, ayyehi vinā na khādissāmā”ti aḍḍhateyyāni sakaṭasatāni mahāvihāraṃ pesetvā sayampi bhuttapātarāso agamāsi. Bheriyā pahaṭāya dvādasa bhikkhusahassāni sannipatiṃsu. Rājā ekamante ṭhito ārāmikaṃ pakkosāpetvā āha – “raṅṅo nāma dāne pattapūrova pamāṇaṃ, gahitabhājanaṃ pūretvāva dehi, sace koci mattapaṭiggahaṇe ṭhito na gaṇhāti, mayhaṃ āroceyyāsi”ti.

Atheko mahāthero “mahābodhimahācetiyaṅca vandissāmī”ti cetiyapabbatā āgantvā, vihāraṃ pavisanto mahāmaṇḍapaṭṭhāne bhikkhū guḷaṃ gaṇhante disvā pacchato āgacchantāṃ sāmaṇeraṃ āha, “natthi te guḷena attho”ti. “Āma, bhante, natthī”ti. Sāmaṇera mayaṃ maggakilantā, ekena kapiṭṭhaphalamattena piṇḍakena amhākaṃ atthoti. Sāmaṇero thālakaṃ nīharitvā therassa vassaggaṭṭhapaṭṭhāya aṭṭhāsi. Ārāmiko gahaṇamānaṃ pūretvā ukkhipi, sāmaṇero aṅguḷiṃ cālesi. Tāta sāmaṇera, rājakulānaṃ dāne bhājanapūrameva pamāṇaṃ, thālakaṃ pūraṃ gaṇhāhīti. Āma, upāsaka, rājāno nāma mahajjhāsayaṃ honti, amhākaṃ pana upajjhāyassa ettakeneva atthoti.

Rājā tassa kathaṃ sutvā, “kiṃ bho sāmaṇero bhaṇāti”ti? Tassa santikaṃ gato. Ārāmiko āha – “sāmi, sāmaṇerassa bhājanaṃ khuddakaṃ, bahuṃ na gaṇhāti”ti. Rājā āha, “ānītabhājanaṃ pūretvā gaṇhatha, bhante”ti. Mahārāja, rājāno nāma mahajjhāsayaṃ honti, ukkhittabhājanaṃ pūretvāva dātukāmā, amhākaṃ pana upajjhāyassa ettakeneva atthoti. Rājā cintesi – “ayaṃ sattavassikadārako, ajjāpissa mukhato khīragandho na muccati, gahetvā kuṭe vā kuṭumbe vā pūretvā svepi punadvasepi khādissāmāti na vadati, sakkā buddhasāsaṇaṃ pariggahetu”nti purise āṇāpesi, “bho, pasannomhi sāmaṇerassa, itarānīpi aḍḍhateyyāni sakaṭasatāni ānetvā saghaṃssa dethā”ti.

Soyeva pana rājā ekadvasaṃ tittiramaṃsaṃ khādītukāmo cintesi – “sace ahaṃ aṅgārapakkaṃ tittiramaṃsaṃ khādītukāmosmīti aññassa kathessāmī, samantā yojanaṭṭhāne tittirasamugghātaṃ karissanti”ti uppannaṃ pipāsaṃ adhivāsento tīṇi saṃvaccharāni vītīnāmesi. Athassa kaṇṇesu pubbo saṅṭhāsi, so adhivāsetuṃ asakkonto “atthi nu kho, bho, amhākaṃ koci upaṭṭhākupāsako sīlarakkhako”ti pucchi. Āma, deva, atthi, tisso nāma so akhaṇḍasīlaṃ rakkhatīti. Atha naṃ vīmaṃsitukāmo pakkosāpesi. So āgantvā rājānaṃ vanditvā aṭṭhāsi. Tato naṃ āha – “tvāṃ, tāta, tisso nāmā”ti? “Āma devā”ti. Tena hi gacchāti. Tasmīṃ gate ekaṃ kukkuṭaṃ āharāpetvā ekaṃ purisaṃ āṇāpesi, “gaccha tissaṃ vadāhi,

imaṃ tīhi pākehi pacitvā amhākaṃ upaṭṭhāpehī”ti. So gantvā tathā avoca. So āha – “sace, bho, ayaṃ matako assa, yathā jānāmi, tathā pacitvā upaṭṭhaheyyaṃ. Pāṇātipātaṃ panāhaṃ na karomī”ti. So āgantvā rañño ārocesi.

Rājā puna “ekavāraṃ gacchā”ti pesesi. So gantvā, “bho, rājupaṭṭhānaṃ nāma bhāriyaṃ, mā evaṃ kari, punapi sīlaṃ sakkā samādātum, paceta”nti āha. Atha naṃ tisso avoca, “bho, ekasmiṃ nāma attabhāve dhuvāṃ ekaṃ maraṇaṃ, nāhaṃ pāṇātipātaṃ karissāmi”ti. So punapi rañño ārocesi. Rājā tatiyampi pesetvā asampaṭicchantaṃ pakkosāpetvā attanā pucchi. Raññoopi tatheva paṭivacanaṃ adāsi. Atha rājā purise āṇāpesi, “ayaṃ rañño āṇaṃ kopeti, gacchathetassa āghātanabhaṇḍikāyaṃ ṭhapetvā, sīsaṃ chindathā”ti. Raho ca pana nesāṃ saññamadāsi – “imaṃ santajjayamānā netvā sīsamassa āghātanabhaṇḍikāyaṃ ṭhapetvā āgantvā mayhaṃ ārocethā”ti.

Te taṃ āghātanabhaṇḍikāyaṃ nipajjāpetvā tamassa kukkuṭaṃ hatthesu ṭhapayimsu. So taṃ hadaye ṭhapetvā “ahaṃ, tāta, mama jīvitaṃ tuyhaṃ demi, tava jīvitaṃ ahaṃ gaṇhāmi, tvaṃ nibbhayo gacchā”ti vissajjesi. Kukkuṭo pakkhe papphoṭetvā ākāsenā gantvā vaṭarukkhe nilīyi. Tassa kukkuṭassa abhayadinnatṭhānaṃ kukkuṭagiri nāma jātaṃ.

Rājā taṃ pavattiṃ sutvā amaccaputtaṃ pakkosāpetvā sabbābharaṇehi alaṅkaritvā āha – “tāta, mayā tvaṃ etadatthameva vīmaṃsito, mayhaṃ tittiramaṃsaṃ khādītukāmassa tīṇi saṃvaccharāni atikkantāni, sakkhissasi me tikoṭiparisuddhaṃ katvā upaṭṭhāpetu”nti. “Etaṃ nāma, deva, mayhaṃ kamma”nti nikkhamitvā dvārantare ṭhito ekaṃ purisaṃ pātova tayo tittire gahetvā pavisantaṃ disvā, dve kahāpaṇe datvā tittire ādāya parisodhetvā, jīrakādīhi vāsetvā, aṅgāresu supakke pacitvā rañño upaṭṭhāpesi. Rājā mahātale sirīpallaṅke nisinnova ekaṃ gahetvā thokaṃ chinditvā mukhe pakkhipi, tāvadevassa sattarasaharaṇīsahassāni pharivā aṭṭhāsi.

Tasmiṃ samaye bhikkhusaṅghaṃ saritvā, “mādiso nāma pathavissaro rājā tittiramaṃsaṃ khādītukāmo tīṇi saṃvaccharāni na labhi, apaccamāno bhikkhusaṅgho kuto labhissatī”ti? Mukhe pakkhittakkhaṇḍaṃ bhūmiyaṃ chaḍḍesi. Amaccaputto jaṇṇukehi patitvā mukhena gaṇhi. Rājā “apehi, tāta, jānāmaṃ tava niddosabhāvaṃ, iminā nāma kāraṇena mayā etaṃ chaḍḍita”nti kathetvā, “sesakaṃ tatheva saṅgopetvā ṭhāpehī”ti āha.

Punadivase rājakulūpako thero piṇḍāya pāvīsi. Amaccaputto taṃ disvā pattaṃ gahetvā rājagehaṃ pavesesi. Aññataro vuḍḍhapabbajitopi therassa pacchāsamaṇo viya hutvā anubandhanto pāvīsi. Thero “raññā pakkosāpitabhikkhu bhavissatī”ti pamajji. Amaccaputto “therassa upaṭṭhāko bhavissatī”ti pamādaṃ āpajji. Tesāṃ nisīdāpetvā yāguṃ adaṃsu. Yāguyā pītāya rājā tittire upanesi. Thero ekaṃ gaṇhi, itaropi ekaṃ gaṇhi. Rājā “anubhāgo atthi, anāpucchitvā khādītum na yutta”nti mahātheraṃ āpucchi. Thero hatthaṃ pidahi, mahallakatthero sampāṭicchi. Rājā anattamano hutvā katabhattakiccaṃ therāṃ pattaṃ ādāya anugacchanto āha – “bhante, kulagehaṃ āgacchantehi uggahitavattaṃ bhikkhuṃ gahetvā āgantum vaṭṭatī”ti. Thero tasmiṃ khaṇe aññāsi “na esa raññā pakkosāpito”ti.

Punadivase upaṭṭhākasāmaṇeraṃ gahetvā pāvīsi. Rājā tadāpi yāguyā pītāya tittire upanāmesi. Thero ekaṃ aggahesi, sāmaṇero aṅgulim cāletvā majjhe chindāpetvā ekakoṭṭhāsameva aggahesi. Rājā taṃ koṭṭhāsaṃ mahātherassa upanāmesi. Mahāthero hatthaṃ pidahi, sāmaṇeropi pidahi. Rājā avidūre nisīditvā khaṇḍākhaṇḍaṃ chinditvā khādanto “uggahitavatte nissāya diyaḍḍhatittire khādītum labhimhā”ti āha. Tassa maṃse khāditamatteva kaṇṇehi pubbo nikkhami. Tato mukhaṃ vikkhāletvā sāmaṇeraṃ upasaṅkamitvā, “pasannosmi, tāta, aṭṭha te dhuvabhātāni demī”ti āha. Ahaṃ, mahārāja, upajjhāyassa dammīti. Aparāni aṭṭha demīti. Tāni amhākaṃ ācariyassa dammīti. Aparānīpi aṭṭha demīti. Tāni samānupajjhāyānaṃ dammīti. Aparānīpi aṭṭha demīti. Tāni bhikkhusaṅghassa dammīti. Aparānīpi aṭṭha demīti. Sāmaṇero adhivāsesi. Evaṃ paṭiggahaṇamattaṃ jānanto anuppannañceva lābhaṃ uppādeti, uppannañca thāvaram karoti. Idaṃ paṭiggahaṇapamaṇaṃ nāma. Tattha paribhogapamaṇaṃ paccavekkhaṇapayojanaṃ, “idamatthiyaṃ bhojanaṃ bhuñjāmi”ti pana paccavekkhitaparibhogasseva

payoĵanattā paribhogapamaṇaṃyeva nāma, taṃ idha adhippetam. Teneva **paṭisaṅkhā** **yonisotiādimāha**, itarampi pana vaṭṭatiyeva.

**Sīhaseyyanti** ettha kāmabhogiseyyā, petaseyyā, sīhaseyyā, tathāgataseyyāti catasso seyyā. Tattha “yebhuyyena, bhikkhave, kāmabhogī vāmena passena sentī”ti (a. ni. 4.246) ayaṃ **kāmabhogiseyyā**. Tesaṅhi yebhuyyena dakkhiṇapassena sayāno nāma natthi.

“Yebhuyyena, bhikkhave, petā uttānā sentī”ti (a. ni. 4.246) ayaṃ **petaseyyā**. Petā hi appamaṃsalohitattā aṭṭhisāṅghāṭajaṭitā ekena passena sayitum na sakkonti, uttānāva sayanti.

“Yebhuyyena, bhikkhave, sīho migarājā naṅguṭṭham antarasatthimhi anupakkhipitvā dakkhiṇena passena sayatī”ti ayaṃ **sīhaseyyā**. Tejussadattā hi sīho migarājā dve purimapāde ekasmiṃ, pacchimapāde ekasmiṃ thāne thapetvā naṅguṭṭham antarasatthimhi pakkhipitvā purimapādapacchimapādanaṅguṭṭhānaṃ thitokāsaṃ sallakkhetvā dvinnaṃ purimapādānaṃ matthake sīsaṃ thapetvā sayati, divasampi sayitvā pabujjhamāno na utrasanto pabujjhanti, sīsaṃ pana ukkhipitvā purimapādānaṃ thitokāsaṃ sallakkheti. Sace kiñci thānaṃ vijahitvā thitaṃ hoti, “nayıdam tuyham jātiyā sūrabhāvassa ca anurūpa”nti anattamano hutvā tattheva sayati, na gocarāya pakkamati. Avijahitvā thite pana “tuyham jātiyā ca sūrabhāvassa ca anurūpamida”nti haṭṭhatuṭṭho uṭṭhāya sīhavijambhitam vijambhitvā kesarabhāraṃ vidhunitvā tikkhattum sīhanādam naditvā gocarāya pakkamati.

Catutthajjhānaseyyā pana **tathāgataseyyāti** vuccati. Tāsu idha sīhaseyyā āgatā. Ayaṅhi tejussadairiyāpathattā uttamaseyyā nāma.

**Pāde pādanti** dakkhiṇapāde vāmapādam. **Accādhāyāti** atiādhāya, īsakaṃ atikkamma thapetvā. Gopphakena hi gopphake, jāṇunā vā jāṇumhi saṅghaṭṭiyamāne abhiṅgaṃ vedanā uppajjati, cittaṃ ekaggaṃ na hoti, seyyā aphāsukā hoti. Yathā pana na saṅghaṭṭeti, evaṃ atikkamma thapite vedanā nuppajjati, cittaṃ ekaggaṃ hoti, seyyā phāsukā hoti. Tasmā evaṃ seyyaṃ kappeti.

**Sato sampajānoti** satiyā ceva sampajāñṇena ca samannāgato. Kathaṃ niddāyanto sato sampajāno hotīti? Satisampajāñṇassa appahānena. Ayaṅhi divasañceva sakalayāmañca āvaraṇīyehi dhammehi cittaṃ parisodhetvā paṭhamayāmāvasāne caṅkamā oruyha pāde dhovantopi mūlakammaṭṭhānaṃ avijahantova dhovati, taṃ avijahantova dvāraṃ vivarati, mañce nisīdati, avijahantova niddaṃ okkamati. Pabujjhanto pana mūlakammaṭṭhānaṃ gahetvāva pabujjhanti. Evaṃ niddaṃ okkamantopi sato sampajāno hoti. Evaṃ pana ñāṇadhātukanti na rocayimṃsu.

Vuttanayena panesa cittaṃ parisodhetvā paṭhamayāmāvasāne “upādinnakaṃ sarīraṃ niddāya samassāsessāmī”ti caṅkamā oruyha mūlakammaṭṭhānaṃ avijahantova pāde dhovati, dvāraṃ vivarati, mañce pana nisīditvā mūlakammaṭṭhānaṃ pahāya, “khandhāva khandhesu, dhātuyova dhātūsu paṭihañṇantī”ti senāsaṇaṃ paccavekkhanto kamena niddaṃ okkamati, pabujjhanto pana mūlakammaṭṭhānaṃ gahetvāva pabujjhanti. Evaṃ niddaṃ okkamantopi sato sampajāno nāma hotīti veditabbo.

Iti imasmiṃ sutte tivaṅgikā pubbabhāgavipassanāva kathitā. Ettakeneva pana vosānaṃ anāpajjitvā tāneva indriyabalabojjhaṅgāni samodhānetvā vipassanaṃ vadḍhetvā bhikkhu arahattaṃ pāpuṇātīti. Evaṃ yāva arahattā desanā kathetabbā.

### 3. Kummopamasuttavaṇṇanā

**240.** Tatiye **kummoti** aṭṭhikummo. **Kacchapoti** tasseva vevacanaṃ. **Anunadīṭireti** nadiyā anuṭire. **Gocarapasutoti** “sace kiñci phalāphalaṃ labhissāmi, khādissāmi”ti gocarathāya pasuto ussukka tannibandho. **Samodahitvāti** samugge viya pakkhipitvā. **Saṅkasāyatīti** acchati. **Samodahanti**

samodahanto t̄hapento. Idam̄ vuttam̄ hoti – yathā kummo aṅgāni sake kapāle samodahanto siṅgālassa otāraṃ na deti, na ca naṃ siṅgālo pasahati, evaṃ bhikkhu attano manovitaṅke sake ārammaṇakapāle samodahanto kilesamārasa otāraṃ na deti, na ca naṃ māro pasahati.

**Anissitoti** taṇhādiṭṭhinissayehi anissito. **Aññamahēṭṭhayā**noti aññaṃ kañci puggalaṃ aviheṭṭhento. **Parinibbutoti** kilesaparinibbānena parinibbuto. **Nūpavadeyya kañcīti** aññaṃ kañci puggalaṃ sīlavipattiyā vā ācāravipattiyā vā attānaṃ ukkaṃsetukāmatāya vā paraṃ vambhetukāmatāya vā na upavadeyya, aññadatthu pañca dhamme ajjhataṃ upaṭṭhapetvā, “kālena vakkhāmi, no akālena, bhūtena vakkhāmi, no abhūtena, saṅghena vakkhāmi, no pharusena, atthasam̄hitena vakkhāmi, no anatthasam̄hitena, mettacitto vakkhāmi, no dosantaro”ti evaṃ ullumpanasabhāvasaṅghiteneva cittena viharati.

#### 4. Paṭhamadārukkhandhopamasuttavaṇṇanā

**241.** Catutthe **addasāti** gaṅgātīre paññattavarabuddhāsane nisinno addasa. **Vuyhamānanti** caturassaṃ tacchetvā pabbatantare t̄hapitaṃ vātātapena suparisukkhaṃ pāvussake meghe vassante udakena uplavītvā anupubbena gaṅgāya nadiyā sote patitaṃ tena sotena vuyhamānaṃ. **Bhikkhū āmantesīti** “iminā dārukkhandhena sadisaṃ katvā mama sāsane saddhāpabbajitaṃ kulaputtaṃ dassessāmī”ti dhammaṃ desetukāmatāya āmantesi. **Amuṃ mahantaṃ dārukkhandhaṃ gaṅgāya nadiyā sotena vuyhamānanti** idam̄ pana aṭṭhadosa vimuttatā sotapaṭipannassa dārukkhandhassa apare samuddapattiyā antarāyakare aṭṭha dose dassetuṃ ārabhi.

Tatrasa evaṃ aṭṭhadosa vimuttatā veditabbā – eko hi gaṅgāya nadiyā avidūre pabbatatale jāto nānāvallīhi paliveṭṭhito paṇḍupalāsataṃ āpajjitvā upacikādīhi khajjamāno tasmim̄yeva t̄hāne apaṇṇattikabhāvaṃ gacchati, ayaṃ dārukkhandho gaṅgaṃ otarivā vaṅkaṭṭhānesu vilāsamāno sāgaraṃ patvā maṇivaṇṇe ūmipiṭṭhe sobhituṃ na labhati.

Aparo gaṅgātīre bahimūlo antosākho hutvā jāto, ayaṃ kiñcāpi kālena kālaṃ olambinīhi sākḥāhi udakaṃ phusati, bahimūlattā pana gaṅgaṃ otarivā vaṅkaṭṭhānesu vilāsamāno sāgaraṃ patvā maṇivaṇṇe ūmipiṭṭhe sobhituṃ na labhati.

Aparo majjhe gaṅgāya jāto, daḷhamūlena pana suppatiṭṭhito, bahi cassa gatā vaṅkasākḥā nānāvallīhi ābaddhā, ayampi daḷhamūlattā bahiddhā vallīhi ābaddhattā ca gaṅgaṃ otarivā...pe... sobhituṃ na labhati.

Aparo patitaṭṭhāneyeva vālikāya otthaṭo pūtibhāvaṃ āpajjati, ayampi gaṅgaṃ otarivā...pe... na labhati.

Aparo dvinnam̄ pāsāṇānaṃ antare jātattā, sunikhāto viya niccalo t̄hito, āgatāgataṃ udakaṃ dvidhā phāleti, ayaṃ pāsāṇantare suṭṭhu patiṭṭhitattā gaṅgaṃ otarivā...pe... na labhati.

Aparo abbhokāsatt̄hāne nabhaṃ pūretvā vallīhi ābaddho t̄hito. Ekaṃ dve sam̄vacchare atikkamitvā āgate mahoghe sakim̄ vā dvikkhattuṃ vā temeti, ayampi nabhaṃ pūretvā t̄hitatāya ceva ekassa vā dvinnam̄ vā sam̄vaccharānaṃ accayena sakim̄ vā dvikkhattuṃ vā temanatāya ca gaṅgaṃ otarivā...pe... na labhati.

Aparopi majjhe gaṅgāya dīpake jāto mudukkhandaṃ sākḥo oghe āgate anusotaṃ nipajjitvā, udake gate sīsaṃ ukkhipitvā, naccanto viya tiṭṭhati. Yassatthāya sāgaro gaṅgaṃ evaṃ viya vadati, “bhoti gaṅge tvaṃ mayhaṃ candanasārasalaḷasārādīni nānādārūni āharasi, dārukkhandhaṃ pana nāharasī”ti. Sulabho esa, deva, punavāre jānissāmīti. Punavāre tambavaṇṇena udakena ālīngamānā viya āgacchati. Sopi tatheva anusotaṃ nipajjitvā, udake gate sīsaṃ ukkhipitvā, naccanto viya tiṭṭhati. Ayaṃ attano

mudutāya gaṅgaṃ otarivā...pe... na labhati.

Aparo gaṅgāya nadiyā tiriyam patito vālikāya ottharito antarasetu viya bahūnaṃ paccayo jāto, ubhosu tīresu veḷunaḷakarañjakakudhādayo uplavivā tattheva lagganti. Tathā nānāvidhā gacchā vuyhamānā bhinnamusalabhinnasuppaahikukkurahatthiassādikuṇapānīpi tattheva lagganti. Mahāgaṅgāpi naṃ āsajja bhijjivā dvidhā gacchati, macchakacchapakumbhīlamakarādayopi tattheva vāsaṃ kappenti. Ayampi tiriyam pativā mahājanassa paccayattakatabhāvena gaṅgaṃ otarivā vaṅkaṭṭhānesu vilāsamāno sāgaraṃ patvā maṇivaṇṇe ūmipiṭṭhe sobhituṃ na labhati.

Iti bhagavā imehi aṭṭhahi dosehi vimuttattā sotapaṭipannassa dārukkhandhassa apare samuddapattiyā antarāyakare aṭṭha dose dassetuṃ **amuṃ mahantaṃ dārukkhandhaṃ gaṅgāya nadiyā sotena vuyhamānantiādīmāha**. Tattha **na thale ussīdissatīti** thalaṃ nābhiruhissati. **Na manussaggāho gahessatīti** “mahā vatāyaṃ dārukkhandho”ti disvā, uḷumpena taramānā gantvā, gopānasīdīnaṃ atthāya manussā na gaṇhissanti. **Na amanussaggāho gahessatīti** “mahaggho ayaṃ candanasāro, vimānadvāre naṃ ṭhapessāmā”ti maññamānā na amanussā gaṇhissanti.

**Evameva khoti** ettha saddhiṃ bāhirehi aṭṭhahi dosehi evaṃ opammaṣandanaṃ veditabbaṃ – gaṅgāya avidūre pabbatatale jāto tattheva upacikādīhi khajjamāno apaṇṇattikabhāvaṃ gatadārukkhandho viya hi “natthi dinna”ntiādīkāya micchādīṭṭhiyā samannāgato puggalo veditabbo. Ayañhi sāsanassa dūrībhūtattā ariyamaggaṃ oruyha samādhikulle nisinno nibbānasāgaraṃ pāpuṇituṃ na sakkoti.

Gaṅgātīre bahimūlo antosākho hutvā jāto viya acchinnagihibandhano samaṇakuṭumbikapuggalo daṭṭhabbo. Ayañhi “cittaṃ nāmetaṃ anibaddhaṃ, ‘samaṇomhī’ti vadantova gihī hoti, ‘gihīmhī’ti vadantova samaṇo hoti. Ko jānissati, kiṃ bhavissati”ti? Mahallakakāle pabbajantopi gihibandhanaṃ na vissajjeti. Mahallakapabbajitānañca sampatti nāma natthi. Tassa sace cīvaraṃ pāpuṇāti, antacchinnakaṃ vā jīṇṇadubbaṇṇaṃ vā pāpuṇāti. Senāsanampi vihārapaccante paṇṇasālā vā maṇḍapo vā pāpuṇāti. Piṇḍāya carantenāpi puttanaṭṭakānaṃ dāraṅkaṃ pacchato caritabbaṃ hoti, pariyante nisīditabbaṃ hoti. Tena so dukkhī dummano assūni muñcanto, “atthi me kulasantakaṃ dhanam, kappati nu kho taṃ khādantena jīvitu”nti cintevā ekaṃ vinayadharaṃ pucchati – “kiṃ, bhante ācariya, attano santakaṃ vicāretvā khādituṃ kappati, no kappatī”ti? “Natthettha doso, kappateta”nti. So attano bhajamānake katipaye dubbace durācāre bhikkhū gahetvā, sāyanhasamaye antogāmaṃ gantvā, gāmamajjhe ṭhito gāmike pakkosāpetvā, “amhākaṃ payogato uṭṭhitaṃ āyaṃ kassa dethā”ti āha. Bhante, tumhe pabbajitā, mayaṃ kassa dassāmāti? Kiṃ pabbajitānaṃ attano santakaṃ na vaṭṭatīti? Kuddāla-piṭakaṃ gahetvā, khattamariyādabandhanādīni karonto nānāppakāraṃ pubbaṇṇāparaṇṇaṅceva phalāphale ca saṅgaṇhitvā, hemantagimhavassānesu yaṃ yaṃ icchati, taṃ taṃ pacāpetvā khādanto samaṇakuṭumbiko hutvā jīvati. Kevalamassa pañcacūḷakena dāraṅkaṃ saddhiṃ pādapariṅkāva ekā natthi. Ayaṃ puggalo kiñcāpi olambinīhi sākāhi udakaṃ phusamāno antosākho rukkho viya cetiyaṅgaṇabodhiyaṅgaṇādisu bhikkhūnaṃ kāyasamaggaṃ deti, gihibandhanaṃ pana acchinnatāya bahimūlattā ariyamaggaṃ otarivā samādhikulle nisinno nibbānasāgaraṃ pāpuṇituṃ na sakkoti.

Gaṅgāya majjhe jāto bahiddhā vallīhi ābaddhavaṅkasākā viya saṅghasantakaṃ nissāya jīvamāno bhinnājīvapuggalo daṭṭhabbo. Ekacco gihibandhanaṃ pahāya pabbajantopi sārappaṭṭhāne pabbajjaṃ na labhati. Pabbajjā hi nāmesā paṭisandhiggahaṇasadisā. Yathā manussā yattha paṭisandhiṃ gaṇhanti, tesamyeva kulānaṃ ācāraṃ sikkhanti, evaṃ bhikkhūpi yesaṃ santike pabbajanti, tesamyeva ācāraṃ gaṇhanti. Tasmā ekacco asārappaṭṭhāne pabbajivā ovādānusāsānīuddesaparipucchādīhi paribāhiro hutvā pātova muṇḍaghaṭaṃ gahetvā udakatitthaṃ gacchati, ācariyupajjhāyānaṃ bhattatthāya khandhe pattam katvā bhattasālaṃ gacchati, dubbacasāmaṇerehi saddhiṃ nānākīlaṃ kīlati, ārāmikadārakehi saṃsaṭṭho viharati.

So daharabhikkhukāle attano anurūpehi daharabhikkhūhi ceva ārāmikehi ca saddhiṃ

saṅghabhogaṃ gantvā, “ayaṃ khīṇāsavehi asukarañño santikā paṭiggahitasāṅghabhogo, tumhe saṅghassa idañcidañca na detha, na hi tumhākaṃ pavattiṃ sutvā rājā vā rājamahāmattā vā attamanā bhavissanti, etha dāni idañcidañca karothā”ti kuddāla-piṭakāni gāhāpetvā heṭṭhā taḷākamātikāsu kattabbakiccāni kārapetvā bahuṃ pubbaṇṇāparaṇṇaṃ vihāraṃ pavesetvā āramikehi attano upakārabhāvaṃ saṅghassa ārocāpeti. Saṅgho “ayaṃ daharo bahūpakāro, imassa satam vā dvisatam vā dethā”ti dāpeti. Iti so ito cito ca saṅghasantakeneva vaḍḍhanto bahiddhā ekavīsatividhāhi anesanāhi baddho ariyamaggaṃ otarivā samādhikulle nisinno nibbānasāgaraṃ pāpuṇituṃ na sakkoti.

Patitaṭṭhāneyeva vālikāya ottharivā pūtibhāvaṃ apāditarukkho viya ālasiyamahagghaso vedītabbo. Evarūpañhi puggalaṃ āmisacakkhuṃ paccayalolaṃ vissaṭṭhaācariyupajjhāyavattaṃ uddesaparipucchāyonisomanasikāravajjitaṃ sandhāya pañca nīvaraṇāni atthato evaṃ vadanti – “bho, kassa santikaṃ gacchāmā”ti? Atha thinamiddhaṃ utṭhāya evamāha – “kiṃ na passatha? Eso asukavīhāravāsī kusītapuggalo asukaṃ nāma gāmaṃ gantvā yāgumatthake yāguṃ, pūvamattake pūvaṃ, bhattamatthake bhattaṃ ajjhoharivā vihāraṃ āgamma vissaṭṭhasabbavatto uddesādivirahito mañcaṃ upagacchanto mayhaṃ okāsaṃ karotī”ti.

Tato kāmacchandanivaraṇaṃ utṭhāyāha – “bho, tava okāse kate mayhaṃ katova hoti, idāneva so niddāyivā kilesānurañjitova pabujjhivā kāmavitakkaṃ vitakkessatī”ti. Tato byāpādanīvaraṇaṃ utṭhāyāha – “tumhākaṃ okāse kate mayhaṃ katova hoti. Idāneva niddāyivā vuṭṭhito ‘vattapaṭivattaṃ karohī’ti vuccamāno, ‘bho, ime attano kammaṃ akatvā amhesu byāvaṭā’ti nānappakāraṃ pharusavacanaṃ vadanto akkhīni nīharivā vicarissatī”ti. Tato uddhaccanīvaraṇaṃ utṭhāyāha – “tumhākaṃ okāse kate mayhaṃ katova hoti, kusīto nāma vātāhato aggikkhandho viya uddhato hotī”ti. Atha kukuccanīvaraṇaṃ utṭhāyāha – “tumhākaṃ okāse kate mayhaṃ katova hoti, kusīto nāma kukkucapakatova hoti, akappiye kappiyasaññaṃ kappiye ca akappiyasaññaṃ uppādetī”ti. Atha vicikicchānīvaraṇaṃ utṭhāyāha – “tumhākaṃ okāse kate mayhaṃ katova hoti. Evarūpo hi aṭṭhasu ṭhānesu mahāvicikicchaṃ uppādesī”ti. Evaṃ ālasiyamahagghasaṃ pañca nīvaraṇāni caṇḍasunakhādayo viya siṅgacchinnāṃ jaraggavaṃ ajjhottharivā gaṇhanti. Sopi ariyamaggasotaṃ otarivā samādhikulle nisinno nibbānasāgaraṃ pāpuṇituṃ na sakkoti.

Dvinnāṃ pāsāṇānaṃ antare nikhātāmūlakārena ṭhitarukkho viya diṭṭhiṃ uppādetvā ṭhito diṭṭhigatiko vedītabbo. So hi “arūpabhava rūpaṃ atthi, asaṅñībhave cittaṃ pavattati, bahucittakkhaṇiko lokuttaramaggo, anusayo cittavippayutto, te ca sattā sandhāvanti saṃsarantī”ti vadanto ariṭṭho viya kaṇṭakasāmaṇero viya ca vicarati. Pisuṇavāco pana hoti, upajjhāyādayo saddhivihārikādīhi bhindanto vicarati. Sopi ariyamaggasotaṃ otarivā samādhikulle nisinno nibbānasāgaraṃ pāpuṇituṃ na sakkoti.

Abbhokāse nabhaṃ pūretvā vallīhi ābaddho ṭhito ekaṃ dve saṃvacchare atikkamivā āgate mahoghe sakim vā dvikkhattuṃ vā temanarukkho viya mahallakakāle pabbajivā paccante vasamāno dullabhasaṅghadassano ceva dullabhadhammassavano ca puggalo vedītabbo. Ekacco hi vuḍḍhakāle pabbajito katipāhena upasampadaṃ labhitvā pañcavassakāle pātimokkhaṃ paguṇaṃ katvā dasavassakāle vinayadharattherassa santike vinayakathākāle maricaṃ vā harītakakhaṇḍaṃ vā mukhe ṭhapetvā bījanena mukhaṃ pidhāya niddāyanto nisīditvā lesakappena katavinayo nāma hutvā pattacīvaraṃ ādāya paccantaṃ gacchati. Tatra naṃ manussā sakkarivā bhikkhudassanassa dullabhatāya “idheva, bhante, vasathā”ti vihāraṃ kāretvā pupphūpagaphalūpagarukkhe ropetvā tattha vāsenti.

Atha mahāvīhārasadisavīhārā bahussutā bhikkhū, “janapade cīvararajanādīni katvā āgamissāmā”ti tattha gacchanti. So te disvā, haṭṭhatuṭṭho vattapaṭivattaṃ katvā, punadvise ādāya bhikkhācāragāmaṃ pavisitvā, “asuko thero suttantiko, asuko abhidhammiko, asuko vinayadharo, asuko teṭṭhako, evarūpe there kadā labhissatha, dhammasavanaṃ kārethā”ti vadati. Upāsakā “dhammassavanaṃ kāressāmā”ti vihāramaggaṃ sodhetvā, sappitelādīni ādāya, mahātheraṃ upasaṅkamivā, “bhante, dhammassavanaṃ kāressāmā, dhammakathikānaṃ vicārethā”ti vatvā punadvise āgantvā dhammaṃ suṇanti.



Nevāsikatthero āgantukānaṃ pattacīvarāni paṭisāmento antogabbhēyeva divasabhāgaṃ vītināmeti. Divākathiko uṭṭhito sarabhāṇako ghaṭena udakaṃ vamento viya sarabhāṇaṃ bhaṇitvā uṭṭhito, tampi so na jānāti. Rattikathiko sāgaraṃ khobhento viya rattim kathetvā uṭṭhito, tampi so na jānāti. Paccūsakathiko kathetvā uṭṭhāsi, tampi so na jānāti. Pātova pana uṭṭhāya mukhaṃ dhovitvā, therānaṃ pattacīvarāni upanāmetvā, bhikkhācāraṃ upagacchanto mahātheraṃ āha – “bhante, divākathiko kataraṃ jātaṃ nāma kathesi, sarabhāṇako kataraṃ suttaṃ nāma bhaṇi, rattikathiko kataraṃ dhammakathaṃ nāma kathesi, paccūsakathiko kataraṃ jātaṃ nāma kathesi, khandhā nāma kati, dhātuyo nāma kati, āyatanā nāma kati”ti. Evarūpo ekaṃ dve saṃvaccharāni atikkamitvā bhikkhudassanañceva dhammassavanañca labhantopi oge āgate udakena sakiṃ vā dvikkhattuṃ vā temitarukkhasadiso hoti. So evaṃ saṅghadassanato ca dhammassavanato ca paṭikkamma dūre vasanto ariyamaggaṃ otarivā samādhikulle nisinno nibbānasāgaraṃ pāpuṇituṃ na sakkoti.

Majjhe gaṅgāya dīpake jāto mudurukkho viya madhurassarabhāṇakapuggalo veditabbo. So hi abhiññātāni abhiññātāni vessantarādīni jātakāni uggaṇhitvā, dullabhabhikkhudassanaṃ paccantaṃ gantvā, tattha dhammakathāya pasādītahadayena janena upaṭṭhiyamāno attānaṃ uddissa kate sampannapupphaphalarukkhe nandanavanābhīrāme vihāre vasati. Athassa bhārahārabhikkhū taṃ pavattim sutvā, “asuko kira evaṃ upaṭṭhākesu paṭibaddhacitto viharati. Paṇḍito bhikkhu paṭibalo buddhavacanaṃ vā uggaṇhituṃ, kammaṭṭhānaṃ vā manasikātuṃ, ānetvā tena saddhiṃ asukattherassa santike dhammaṃ uggaṇhissāma, asukattherassa santike kammaṭṭhāna”nti tattha gacchanti.

So tesam vattaṃ katvā sāyanhasamayaṃ vihāracārikaṃ nikkhantehi tehi “imaṃ, āvuso, cetiyaṃ tayā kārita”nti puṭṭho, “āma, bhante”ti vadati. “Ayaṃ bodhi, ayaṃ maṇḍapo, idaṃ uposathāgāraṃ, eṣā aggisālā, ayaṃ caṅkamo tayā kārito. Ime rukkhe ropāpetvā tayā nandanavanābhīrāmo vihāro kārito”ti. “Āma, bhante”ti, vadati.

So sāyaṃ therupaṭṭhānaṃ gantvā vanditvā pucchati – “kasmā, bhante, āgatattā”ti? “Āvuso, taṃ ādāya gantvā, asukattherassa santike dhammaṃ uggaṇhitvā, asukattherassa santike kammaṭṭhānaṃ, asukasmim nāma araṇṇe samaggā samaṇadhammaṃ karissāmāti iminā kāraṇena āgatamhā”ti. Sādhu, bhante, tumhe nāma mayhaṃ atthāya āgatā, ahampi ciranivāsena idha ukkaṇṭhito gacchāmi, pattacīvaraṃ gaṇhāmi, bhanteti. Āvuso, sāmaṇeradahaṃ maggakilantā, ajja vasitvā sve pacchābhattaṃ gamissāmāti. Sādhu, bhanteti punadivase tehi saddhiṃ piṇḍāya pavisati. Gāmaṃvāsino “amhākaṃ ayyo bahū āgantuke bhikkhū gahetvā āgato”ti āsanāni paññāpetvā yāguṃ pāyetvā sukhanisinnakathaṃ sutvā bhattaṃ adaṃsu. Therā “tvam, āvuso, anumodanaṃ katvā nikkhama, mayaṃ udakaphāsukaṭṭhāne bhattakiccaṃ karissāmā”ti nikkhantā.

Gāmaṃvāsino anumodanaṃ sutvā pucchimsu, “kuto, bhante, therā āgatā”ti? Ete amhākaṃ ācariyupajjhāyā samānupajjhāyā sandiṭṭhā sambhattāti. Kasmā āgatāti? Maṃ gahetvā gantukāmatāyāti. Tumhe pana gantukāmāti? Āmāvusoti. Kiṃ vadetha, bhante, amhehi kassa uposathāgāraṃ kāritaṃ, kassa bhojanasālā, kassa aggisālādayo kāritā, mayaṃ maṅgalamaṅgalesu kassa santikaṃ gamissāmāti? Mahāupāsikāyopi tattheva nisīditvā assūni pavattayimsu. Daharo “tumhesu evaṃ dukkhitesu ahaṃ gantvā kiṃ karissāmi? There uyyojessāmi”ti vihāraṃ gato.

Therāpi katabhattakiccā pattacīvarāni gahetvā nisinnā taṃ disvāva, “kiṃ, āvuso, cirāyasi, divā hoti, gacchāmā”ti āhaṃsu. Āma, bhante, tumhe sukhītā, asukagehassa iṭṭhakāmūlaṃ ṭhitasanṭhānēna ṭhitaṃ, asukagehādīnaṃ cittakammamūlādīni atthi, gatassāpi me cittavikkhepo bhavissati, tumhe purato gantvā asukavihāre cīvaradhovanarajanādīni karotha, ahaṃ tattha sampāpuṇissāmīti. Te tassa osakkitukāmataṃ ṇatvā tvam pacchā āgaccheyyāsīti pakkamimsu.

So there anugantvā nivatto vihārameva āgantvā bhojanasālādīni olokento vihāraṃ rāmaṇeyyaṃ disvā cintesi – “sādhu vatamhi na gato. Sace agamissaṃ, koci, deva, dhammakathiko āgantvā, sabbesaṃ manaṃ bhinditvā, vihāraṃ attano nikāyasantaṃ kareyya, atha mayā pacchā āgantvā etassa pacchato

laddhapiṇḍaṃ bhuñjantena caritabbaṃ bhavissatī’ ti.

So aparena samayena suṇāti, “te kira bhikkhū gataṭṭhāne ekanikāyadvenikāyae kapiṭakadvepiṭakādivasena buddhavacanaṃ uggaṇhitvā aṭṭhakathācariyā jātā vinayadharā jātā sataparivārāpi sahasaparivārāpi caranti. Ye panettha samaṇadhammaṃ kātuṃ gatā, te ghaṭentā vāyamantā sotāpannā jātā, sakadāgāmino anāgāmino arahanto jātā, mahāsakkārena parinibbutā’ ti. So cintesi – “sace ahampi agamissaṃ, mayhampesā sampatti abhavissa, imaṃ pana ṭhānaṃ muñcituṃ asakkonto ativiya parihīnamhī’ ti. Ayaṃ puggalo attano mudutāya taṃ ṭhānaṃ amuñcanto ariyamaggaṃ otarivā samādhikulle nisinno nibbānasāgaraṃ pāpuṇituṃ na sakkoti.

Gaṅgāya nadiyā tiriyaṃ pativā, vālikāya otthaṭabhāvena antarasetu viya hutvā, bahūnaṃ paccayo jātarukkho viya rathavinītamahāriyavaṃsacandopamādipaṭipadāsu aññataraṃ paṭipadaṃ uggahetvā ṭhito olīnavuttiko puggalo vedītabbo. So hi taṃ paṭipattinissitaṃ dhammaṃ uggahetvā pakatiyā mañjussaro cittalapabbatādisadisāṃ mahantaṃ ṭhānaṃ gantvā cetiyaṅgaṇavattādīni karoti. Atha naṃ dhammassavanaggaṃ pattaṃ āgantukā daharā “dhammaṃ kathehi’ ti vadanti. So sammā uggahitaṃ dhammaṃ paṭipadaṃ dīpetvā katheti. Athassa paṃsukūlikapiṇḍapātīkādayo sabbe theranavamañjhimā bhikkhū “aho sappuriso’ ti attamaṇā bhavanti.

So kassaci nidānamattaṃ, kassaci upaḍḍhagāthaṃ, kassaci gāthaṃ upaṭṭhāpento ayapaṭṭakena ābandhanto viya daharasāmaṇere saṅgaṇhitvā mahāthere upasaṅkamitvā, “bhante, ayaṃ porāṇakavihāro atthi, ettha koci tatrappādo’ ti?, Pucchati. Therā – “kiṃ vadesi, āvuso, catuvīsati karīsasahassāni tatrappādo’ ti. Bhante, tumhe evaṃ vadetha, uddhane pana aggipi na jalatīti. Āvuso, mahāvihāravāsīhi laddhā nāma evameva nassanti, na koci saṅghapetīti. Bhante, porāṇakarājūhi dinnaṃ khīṇāsavehi paṭiggahitaṃ kasmā ete nāsenti? Āvuso, tādisena dhammakathikena sakkā bhavēya laddhanti. Bhante, mā evaṃ vadetha, amhe paṭipattidīpakadhammakathikā nāma, tumhe maṃ “saṅghakuṭumbiko vihārupaṭṭhāko’ ti maññamānā kātukāmāti. Kiṃ nu kho, āvuso, akappiyametā, tumhādisehi pana kathite amhākaṃ uppajjeyyāti? Tena hi, bhante, ārāmikesu āgatesu amhākaṃ bhāraṃ karoṭha, ekaṃ kappiyadvāraṃ kathessāmāti.

So pātova gantvā, sannipātasālāyaṃ ṭhatvā, ārāmikesu āgatesu “upāsakā asukakhetto bhāgo kuhiṃ, asukakhetto kahāpaṇaṃ kuhi’ ntiādīni vatvā, aññassa khettaṃ gahetvā, aññassa deti. Evaṃ anukkamena taṃ taṃ paṭisedhento tassa tassa dento tathā akāsi, yathā yāguhatthā pūvahatthā bhattahatthā telamadhuphāṇitaghatādīhatthā ca attanova santikaṃ āgacchanti. Sakalavihāro ekakolāhalo hoti, pesalā bhikkhū nibbija apakkamiṃsu.

Sopi ācariyupajjhāyehi vissaṭṭhakānaṃ bahūnaṃ dubbacapuggalānaṃ upajjhaṃ dento vihāraṃ pūreti. Āgantukā bhikkhū vihāradvāre ṭhatvā “vihāre ke vasantī’ ti, pucchitvā, “evarūpā nāma bhikkhū’ ti sutvā bāhireneva pakkamanti. Ayaṃ puggalo sāsane tiriyaṃ nīpannatāya mahājanassa paccayabhāvaṃ upagato ariyamaggaṃ otarivā samādhikulle nisinno nibbānasāgaraṃ pāpuṇituṃ na sakkoti.

**Bhagavantaṃ etadavocāti** “nibbānapabbhārā’ ti padena osāpitaṃ dhammadesanaṃ ñatvā anusandhikusalatāya etaṃ “kiṃ nu kho, bhante’ tiādivacanaṃ avoca. Tathāgatopi hi imissaṃ parisati nisinno “anusandhikusalo bhikkhu atthi, so maṃ pañhaṃ pucchissatī’ ti tasseva okāsakaraṇatthāya imasmiṃ ṭhāne desanaṃ niṭṭhāpesi.

Idāni **orimaṃ tīraṇtiādīnā** nayena vuttesu ajjhattikāyatanādīsū evaṃ upagamanānupagamanādīni vedītabbāni. “Mayhaṃ cakkhu-pasannaṃ, ahaṃ appamattakampi rūpārammaṇaṃ paṭivijjhituṃ sakkomi’ ti etaṃ nissāya cakkhuṃ assādentopi timirakavātādīhi upahatapasādo “amanāpaṃ mayhaṃ cakkhu, mahantampi rūpārammaṇaṃ vibhāvetuṃ na sakkomi’ ti domanassaṃ āpajjantopi cakkhāyatanāṃ upagacchati nāma. Aniccaṃ dukkhaṃ anattāti tiṇṇaṃ lakkhaṇānaṃ vasena vipassanto

pana na upagacchati nāma. Sotādīsupi eseva nayo.

Manāyatane pana “manāpaṃ vata me mano, kiñci vāmato aggahetvā sabbam dakkhiṇatova gaṇhātī”ti vā “manena me cintitacintitassa alābho nāma natthī”ti vā evaṃ assādentopi, “ducintitacintitassa me mano appadakkhiṇaggāhī”ti evaṃ domanassam uppādentopi manāyatanaṃ upagacchati nāma. Itthe pana rūpe rāgaṃ, aniṭṭhe paṭighaṃ uppādentō rūpāyatanaṃ upagacchati nāma. Saddāyatanādīsupi eseva nayo.

**Nandīrāgassetam adhivacanti** yathā hi majjhe saṃsīditvā thalaṃ pattam dārukkhandham saṅhathūlavālikā pidahati, so puna sīsaṃ ukkhipitum na sakkoti, evaṃ nandīrāgena ābaddho puggalo catūsū mahāpāyesu patito mahādukkhena pidhīyati, so anekehipi vassasahashehi puna sīsaṃ ukkhipitum na sakkoti. Tena vuttam “nandīrāgassetam adhivacana”nti.

**Asmimānassetam adhivacanti** yathā hi thale āruḷho dārukkhandho heṭṭhā gaṅgodakena ceva upari vassena ca temento anukkamena sevālapariyonaddho “pāsāṇo nu kho esa khāṇuko”ti vattabbaṃ āpajjati, evameva asmimānena unnato puggalo paṃsukūlikaṭṭhāne paṃsukūliko hoti, dhammakathikaṭṭhāne dhammakathiko, bhaṇḍanakāraṇakāṭṭhāne bhaṇḍanakāraṇako, vejjatṭhāne vejjo, piṣuṇaṭṭhāne piṣuṇo. So nānappaṅkaṃ anesanaṃ āpajjanto tāhi tāhi āpattihi paliveṭṭhito “atthi nu kho assa abbhantare kiñci sīlaṃ, udāhu natthī”ti vattabbaṃ āpajjati. Tena vuttam “asmimānassetam adhivacana”nti.

**Pañcannetaṃ kāmagaṇānaṃ adhivacanti** yathā hi āvaṭṭe patitadārukkhandho antoyeva pāsāṇādīsū āhatasamabbhāhato bhijjivā cuṇṇavicuṇṇam hoti, evaṃ pañcakāmagaṇāvaṭṭe patitapuggalo catūsū apāyesu kammakāraṇakuppipāsādidukkhehi āhatasamabbhāhato dīgharattaṃ cuṇṇavicuṇṇataṃ āpajjati. Tena vuttam “pañcannetaṃ kāmagaṇānaṃ adhivacana”nti.

**Dussīloti nissīlo. Pāpadhammoti lāmakadhammo. Asucīti na suci. Saṅkassarasamācāroti** “imassa maññe imassa maññe idaṃ kamma”nti evaṃ parehi saṅkāya saritabbasamācāro. Saṅkāya vā paresaṃ samācāraṃ saratītipi saṅkassarasamācāro. Tassa hi dve tayo jane kathente disvā, “mama dosaṃ maññe kathenti”ti tesam samācāraṃ saṅkassarati dhāvatīti saṅkassarasamācāro.

**Samaṇapaṭiñṇoti** salākaggahaṇādīsū “kittakā vihāre samaṇā”ti gaṇanāya āradhāya “ahampi samaṇo, ahampi samaṇo”ti paṭiñṇaṃ deti, salākaggahaṇādīni karoti. **Brahmacāripaṭiñṇoti** uposathapavāraṇādīsū “ahampi brahmacārī”ti paṭiñṇāya tāni kammāni pavisati. **Antopūṭīti** vakkahadayādīsū apūtikassapi guṇānaṃ pūtibhāvena, antopūṭi. **Avassutoti** rāgena tinto. **Kasambujātoti** rāgādīhi kilesehi kacavarajāto.

**Etadavocāti** gogaṇaṃ gaṅgātīrābhimukhaṃ katvā parisapariyante ṭhito ādito paṭṭhāya yāva pariyoṣānā satthu dhammadesanaṃ sutvā, “satthā orimatīrādīnaṃ anupagacchantaḍdivasena sakkā paṭipattiṃ pūretunti vadati. Yadi evaṃ pūretum sakkā, ahaṃ pabbajitvā pūressāmī”ti cintetvā etaṃ “ahaṃ kho, bhante”tiādivacanaṃ avoca.

**Vacchagiddhinyoti** vacchesu sasnehā thanehi khīraṃ paggharantehi vacchakasnehena sayameva gamissantīti. **Niyyātehevāti** niyyātehiyeva. Gāvīsū hi aniyyātītāsū gosāmikā āgantvā, “ekā gāvī na dissati, eko goṇo, eko vacchako na dissati”ti tuyhaṃ piṭṭhito piṭṭhito vicarissanti, iti te aphāsukaṃ bhavissati. Pabbajjā ca nāmesā saṅgassa na ruhati, aṇaṇā pabbajjā ca buddhādīhi saṃvaṇṇitāti dassanattaṃ evamāha. **Niyyātāti** niyyātītā. Imasmim suttē vaṭṭavivaṭṭaṃ kathitaṃ.

## 5. Dutiyadārukkhandhopamasuttavaṇṇanā

242. Pañcame kimilāyanti kimilānāmake nagare. **Samkiliṭṭhanti** paṭicchannakālato paṭṭhāya

asamkiliṭṭhā nāma āpatti natthi, evarūpaṃ samkiliṭṭhaṃ āpattiṃ. **Na vuṭṭhānaṃ paññāyatī** parivāsamanattaabbhānehi vuṭṭhānaṃ na dissati.

## 6. Avassutapariyāyasuttavaṇṇanā

**243.** Chaṭṭhe **navam santhāgāranti** adhunā kārītaṃ santhāgāraṃ, ekā mahāsālāti attho. Uyyogakālādīsu hi rājāno tattha ṭhatvā, “ettakā purato gacchantu, ettakā pacchā, ettakā ubhohi passehi, ettakā hatthī abhiruhantu, ettakā asse, ettakā rathesu tiṭṭhantū”ti evaṃ santhaṃ karonti, mariyādaṃ bandhanti, tasmā taṃ ṭhānaṃ **santhāgāranti** vuccati. Uyyogaṭṭhānato ca āgantvā yāva gehesu allagomayaparibhaṇḍādīni kārenti, tāva dve tīni divasāni te rājāno tattha santharantītipi santhāgāraṃ. Tesam rājūnaṃ saha atthānusāsanaṃ agārantiipi santhāgāraṃ. Gaṇarājāno hi te, tasmā uppannaṃ kiccaṃ ekassa vasena na chijjati, sabbesaṃ chandopi laddhuṃ vaṭṭati, tasmā sabbe tattha sannipatitvā anusāsanti. Tena vuttaṃ “saha atthānusāsanaṃ agārantiipi santhāgāra”nti. Yasmā pana te tattha sannipatitvā, “imasmim kāle kasitum vaṭṭati, imasmim kāle vapitu”nti evamādinā nayena gharāvāsakiccāni sammantayanti, tasmā chiddāvachiddaṃ gharāvāsaṃ tattha santharantītipi, santhāgāraṃ. **Acirakārītaṃ hotīti** iṭṭhakakammāsudhākammacittakammādivasena susajjitaṃ devavimānaṃ viya adhunā niṭṭhāpitaṃ. **Samaṇena vāti** ettha yasmā gharavattupariggahaṇakāleyeva devatā attano vasanaṭṭhānaṃ gaṇhanti, tasmā “devena vā”ti avatvā, “samaṇena vā brāhmaṇena vā kenaci vā manussabhūtenā”ti vuttaṃ.

**Yena bhagavā tenupasaṅkamimsūti** santhāgāraṃ niṭṭhitanti sutvā “gacchāma naṃ passissāmā”ti gantvā dvārakoṭṭhakato paṭṭhāya sabbam oloketvā “idaṃ santhāgāraṃ ativiya manoramaṃ sassirikaṃ. Kena paṭhamaṃ paribhuttaṃ amhākaṃ dīgharattaṃ hitāya sukhāya assā”ti cintetvā – “amhākaṃ ñātisetṭhassa paṭhamaṃ diyyamānepi satthunova anucchavikaṃ, dakkhiṇeyyavasena diyyamānepi satthunova anucchavikaṃ, tasmā satthāraṃ paṭhamaṃ paribhuñjāpessāma, bhikkhusaṅghassa ca āgamaṃ karissāma, bhikkhusaṅghe āgate tepiṭakaṃ buddhavacanaṃ āgatameva bhavissati, satthāraṃ tiyāmarattiṃ amhākaṃ dhammakathaṃ kathāpessāma, iti tīhi ratanehi paribhuttaṃ pacchā mayaṃ paribhuñjissāma, evaṃ no dīgharattaṃ hitāya sukhāya bhavissati”ti sannīṭṭhānaṃ katvā upasaṅkamimsu.

**Yena navam santhāgāraṃ tenupasaṅkamimsūti** taṃdivasaṃ kira santhāgāraṃ kiñcāpi rājakulānaṃ dassanattāya devavimānaṃ viya susajjitaṃ hoti supaṭṭijaggitaṃ, buddhārahaṃ pana katvā apaññattaṃ. Buddhā hi nāma araññajjhāsayā araññārāmā antogāme vaseyyuṃ vā no vā, tasmā “bhagavato manaṃ jānitvāva, paññāpessāmā”ti cintetvā, te bhagavantaṃ upasaṅkamimsu, idāni pana manaṃ labhitvā paññāpetukāmā yena santhāgāraṃ tenupasaṅkamimsu.

**Sabbasantharim santhāgāraṃ santharivāti** yathā sabbameva santhataṃ hoti, evaṃ taṃ santharāpetvā. Sabbapaṭhamaṃ tāva “gomayaṃ nāma sabbamaṅgalesu vaṭṭati”ti sudhāparikammakatampi bhūmim allagomayena opuñjāpetvā, parisukkhabhāvaṃ ñatvā, yathā akkantaṭṭhāne padaṃ paññāyatī, evaṃ catujjātiyagandhehi limpāpetvā upari nānāvaṇṇakaṭasārake santharivā tesam upari mahāpiṭṭhikakoṭṭhāya ādiṃ katvā hatthatharaassattharasīhattharabyagghattharacandattharakasūriyattharakacittattharakādīhi nānāvaṇṇehi attharakehi santharibbayuttakaṃ sabbokāsaṃ santharāpesum. Tena vuttaṃ “sabbasantharim santhāgāraṃ santharivā”ti.

**Āsanāni paññāpetvāti** majjhatṭhāne tāva maṅgalathambhaṃ nissāya mahārahaṃ buddhāsaṃ paññāpetvā, tattha tattha yaṃ yaṃ mudukañca manoramañca paccattharaṇaṃ, taṃ taṃ paccattharivā ubhatolohitakaṃ manuññadassanaṃ upadhānaṃ upadahitvā upari suvaṇṇarajatatārakavicittavitānaṃ bandhitvā gandhadāmapupphadāmapattadāmādīhi alaṅkaritvā samantā dvādasahatthe ṭhāne pupphajālaṃ kāretvā, tiṃsahatthamattaṃ ṭhānaṃ paṭasāniyā parikkhipāpetvā pacchimabhittiṃ nissāya bhikkhusaṅghassa pallaṅkapīṭhaapassayapīṭhamuṇḍapīṭhāni paññāpetvā upari setapaccattharaṇehi

paccattharāpetvā pācīnabhittim nissāya attano attano mahāpiṭṭhikakojave paññāpetvā manoramāni haṃsalomādipūritāni upadhānāni ṭhapāpesuṃ “evaṃ akilamamānā sabbarattim dhammaṃ suṇissāmā”ti. Idaṃ sandhāya vuttaṃ “āsanāni paññāpetvā”ti.

**Udakamaṇikaṃ patiṭṭhāpetvāti** mahākucchikaṃ udakacāṭim patiṭṭhāpetvā “evaṃ bhagavā ca bhikkhusaṅgho ca yathāruciyaṃ hatthe vā dhovissanti pāde vā, mukhaṃ vā vikkhālessanti”ti tesu tesu ṭhānesu maṇivaṇṇassa udakassa pūrāpetvā vāsathāya nānāpupphāni ceva udakavāsacunṇāni ca pakkhipitvā kadalipaṇṇehi pidahitvā patiṭṭhāpesuṃ. Idaṃ sandhāya vuttaṃ “udakamaṇikaṃ patiṭṭhāpetvā”ti.

**Telappadīpaṃ āropetvāti** rajatasuvaṇṇādīmayadaṇḍadīpikāsu yonakarūpakirātarūpakādīnaṃ hatthe ṭhapitasuvaṇṇarajatādīmayakapallikāsu ca telappadīpaṃ jālāpetvāti attho. **Yena bhagavā tenupasaṅkamimsūti** ettha pana te sakyaṛājāno na kevalaṃ santhāgārameva, atha kho yojanāvattaṃ kapilavatthusmiṃ nagaravīthiyopi sammajjāpetvā dhaje ussāpetvā gehadvāresu puṇṇaghaṭe ca kadaliyo ca ṭhapāpetvā sakalanagaraṃ dīpamālādīhi vippakiṇṇatārakaṃ viya katvā “khīrūpage dārake khīraṃ pāyetha, dahare kumāre lahuṃ lahuṃ bhojetvā sayāpetha, uccāsaddaṃ mā karittha, ajja ekarattim sathā antogāme vasissati, buddhā nāma appasaddakāmā hontī”ti bherim carāpetvā sayāṃ daṇḍadīpikā ādāya yena bhagavā tenupasaṅkamimsu.

**Atha kho bhagavā nivāsetvā pattacīvaramādāya saddhim bhikkhusaṅghena yena navaṃ santhāgāraṃ tenupasaṅkamīti** “yassa dāni, bhante, bhagavā kālaṃ maññati”ti evaṃ kira kāle ārocite bhagavā lākhārasatintarattakoviḷārapupphavaṇṇaṃ rattadupaṭṭaṃ kattariyā padumaṃ kantento viya, saṃvidhāya timaṇḍalaṃ paṭicchādentō nivāsetvā suvaṇṇapāmaṅgena padumakalāpaṃ parikkhipanto viya, vijjulatāsassirikaṃ kāyabandhanaṃ bandhitvā rattakambalena gajakumbhaṃ pariyanandhanto viya, ratanasatubbedhe suvaṇṇagghike pavāḷajālaṃ khipamāno viya suvaṇṇacetiye rattakambalakaṅcukaṃ paṭimuṅcanto viya, gacchantaṃ puṇṇacandaṃ rattavaṇṇavalāhakena paṭicchādayamāno viya, kaṅcanapabbatamatthake supakkalākhārasaṃ parisiṅcanto viya, cittakūṭapabbatamatthakaṃ vijjulatāya parikkhipanto viya ca sacakkavāḷasineruyugandharaṃ mahāpathaviṃ saṅcāletvā gahitaṃ nigrodhapallavasamānavāṇṇaṃ rattavarapaṃsukūlaṃ pārūpitvā, gandhakuṭṭidvārato nikkhami kaṅcanaguhato sīho viya udayapabbatakūṭato puṇṇacando viya ca. Nikkhamitvā pana gandhakuṭṭipamukhe aṭṭhāsi.

Athassa kāyato meghamukhehi vijjukalāpā viya rasmiyo nikkhamitvā suvaṇṇarasadhārāparisekapiṅjarapattapupphaphalaviṭape viya ārāmarukkhe kariṃsu. Tāvadeva ca attano attano pattacīvaramādāya mahābhikkhusaṅgho bhagavantaṃ parivāresi. Te pana parivāretvā ṭhitā bhikkhū evarūpā ahesuṃ – appicchā santuṭṭhā pavivittā asaṃsaṭṭhā āradhaviṛiyā vattāro vacanakkhamaṃ codakā pāpāgarahino sīlasampannā samādhisampannā paññāvimuttivimuttīñānadassanasampannā. Tehi parivārito bhagavā rattakambalaparikkhitto viya suvaṇṇakkhandho, rattapadumasaṇḍamajjhagatā viya suvaṇṇanāvā, pavāḷavedikāparikkhitto viya suvaṇṇapāsādo virocittha. Sāriputtamoggallānādayo mahātherāpi naṃ meghavaṇṇaṃ paṃsukūlaṃ pārūpitvā maṇivammavammikā viya mahānāgā parivārayiṃsu vantarāgā bhinnakilesā vijaṭṭajajaṭa chinnabandhanā kule vā gaṇe vā alaggā.

Iti bhagavā sayāṃ vītarāgo vītarāgehi, vītadoso vītadosehi, vītamoho vītamohehi, nittāṇho nittāṇhehi, nikkilesō nikkilesehi, sayāṃ buddho bahussutabuddhehi parivārito pattaparivāritaṃ viya kesaraṃ, kesaraparivāritā viya kaṅṅikā, aṭṭhanāgasahassaparivārito viya chaddanto nāgarājā, navutihaṃsasahassaparivārito viya dhataratṭho haṃsarājā, senāgaparivārito viya cakkavattirājā, marugaṇaparivārito viya sakko devarājā, brahmagaṇaparivārito viya hāritamahābrahmā, tārāgaṇaparivārito viya puṇṇacando asamena buddhavesena aparimāṇena buddhaviḷāsena kapilavatthugāmimaggaṃ paṭipajji.

Athassa puratthimakāyato suvaṇṇavaṇṇā rasmi uṭṭahitvā asītihatthaṭṭhānaṃ aggahesi pacchima-

kāyato, dakkhiṇahatthato, vāmahatthato suvaṇṇavaṇṇā rasmi uṭṭhahitvā asītihatthaṭṭhānaṃ aggahesi. Upari kesantato paṭṭhāya sabbakesāvaṭṭhehi moragīvavaṇṇā rasmi uṭṭhahitvā gaganatale asītihatthaṭṭhānaṃ aggahesi. Heṭṭhā pādatalēhi pavāḷavaṇṇā rasmi uṭṭhahitvā ghanapathaviṃ asītihatthaṭṭhānaṃ aggahesi. Evaṃ samantā asītihatthaṭṭhānaṃ chabbaṇṇā buddharasmiyo vijjotamānā vipphandamānā kañcanaḍaḍḍāpikāhi niccharitvā ākāsaṃ pakkhandajālā viya cātuddīpikamahāmeghato nikkhantavijjulatā viya vidhāvimsu. Sabbadisābhāgā suvaṇṇacampakapupphehi vikiriyamānā viya, suvaṇṇaghaṭato nikkhantasuvaṇṇarasadhārāhi siñcamānā viya, pasāritasuvaṇṇapaṭaparikkhittā viya, verambhavātasamuṭṭhitakimsukakaṇikārapuppacuṇṇasamokiṇṇā viya vippabhāsimsu.

Bhagavatopi asītiyanubyañjanabyāmapabhādvattiṃsavalarakkhaṇasamujjalasarīraṃ samuggatatarakaṃ viya gaganatalaṃ, vikasitamiva padumavanaṃ, sabbapāliphullo viya yojanasatiko pāricchattako, paṭipāṭiyā ṭhapitānaṃ dvattiṃsacandānaṃ dvattiṃsasūriyānaṃ dvattiṃsacakkavattīnaṃ dvattiṃsadevarājānaṃ dvattiṃsamahābrahmānaṃ siriyā sirim abhibhavamaṇaṃ viya virocittha, yathā taṃ dasahi pāramīhi dasahi upapāramīhi dasahi paramatthapāramīhi sammadeva pūritāhi samattiṃsapāramitāhi alaṅkataṃ. Kappasatasahassādhikāni cattāri asaṅkhyeyyāni dinnadānaṃ rakkhitasīlaṃ katakalyāṇakammaṃ ekasmiṃ attabhāve otarivā vipākaṃ dātuṃ ṭhānaṃ alabhamānaṃ sambādhapattaṃ viya ahosi. Nāvāsahassabhaṇḍaṃ ekanāvaṃ āropanakālo viya, sakaṭasahassabhaṇḍaṃ ekasakaṭaṃ āropanakālo viya, pañcavīsatiyā gaṅgānaṃ oghassa sambhijja mukhadvāre ekato rāsibhūtakālo viya ahosi.

Imāya buddhasiriyā obhāsamānassāpi ca bhagavato purato anekāni ḍaḍḍāpikāsahassāni ukkhipimsu, tathā pacchato, vāmapasse, dakkhiṇapasse. Jātisumanacampakavanamallikārattuppala-nīluppala-bakulasīnduvārapuppāni ceva nīlapītādivaṇṇasugandhagandhacuṇṇāni ca cātuddīpikameghavissatṭhā udakavuṭṭhiyo viya vippakiriyimsu. Pañcaṅgikatūriyanigghosā ceva buddhadhammasaṅghaguṇapaṭisaṃyuttā thutiḅhosā ca sabbā disā pūrayimsu. Devamanussanāgasupaṇṇagandhabbayakkhādīnaṃ akkhīni amatapānaṃ viya labhimsu. Imasmiṃ pana ṭhāne ṭhatvā **padasahassena** gamanaṇaṃ vattuṃ vaṭṭati. Tatridaṃ mukhamattaṃ –

“Evaṃ sabbaṅgasampanno, kampaṃyanto vasundharaṃ;  
Aheṭṭhayanto pāṇāni, yāti lokavināyako.

“Dakkhiṇaṃ paṭhamaṃ pādaṃ, uddharanto narāsabho  
Gacchanto sirisampanno, sobhate dvipaduttamo.

“Gacchato buddhasetṭhassa, heṭṭhāpādatalaṃ mudu;  
Samaṃ samphusate bhūmiṃ, rajasā nupalippati.

“Ninnaṭṭhānaṃ unnamati, gacchante lokanāyake;  
Unnatañca samaṃ hoti, pathavī ca acetanā.

“Pāsāṇā sakkharā ceva, kathaḷā khāṇukaṇṭakā;  
Sabbe maggā vivajjanti, gacchante lokanāyake.

“Nātidūre uddharati, naccāsanne ca nikkhipaṃ;  
Aghaṭṭayanto niyyāti, ubho jāṇū ca gopphake.

“Nātisīghaṃ pakkamati, sampannacaraṇo muni;  
Na cāpi saṅikaṃ yāti, gacchamāno samāhito.

“Uddhaṃ adho ca tiriyañca, disañca vidisaṃ tathā;  
Na pekkhamāno so yāti, yugamattañhi pekkhati.

“Nāgavikkantacāro so, gamane sobhate jino;  
Cāruṃ gacchati lokaggo, hāsayinganto sadevake.

“Uḷurājāva sobhanto, catucārīva kesarī;  
Tosayinganto bahū satte, puram seṭṭham upāgamī’ ti.

Vaṇṇakālo nāma kiresa, evaṃvidhesu kālesu buddhassa sarīravaṇṇe vā guṇavaṇṇe vā dhammakathikassa thāmoyeva pamāṇam. Cuṇṇiyapadehi vā gāthābandhena vā yattakaṃ sakkoti, tattakaṃ vattabbaṃ. Dukkathitanti na vattabbaṃ. Appamāṇavaṇṇā hi buddhā. Tesam buddhāpi anavasesato vaṇṇam vattuṃ asamattā, pageva itarā pajāti. Iminā sirivilāsena alaṅkatapaṭiyattaṃ sakyarājakulaṃ pavisitvā bhagavā pasannacittena janena gandhadhūmavāsacuṇṇādīhi pūjijamāno santhāgāraṃ pāvīsi. Tena vuttaṃ “atha kho bhagavā nivāsetvā pattacīvaramādāya saddhiṃ bhikkhusaṅghena yena navaṃ santhāgāraṃ tenupasaṅkamī’ ti.

**Bhagavantamyeva purakkhatvāti** bhagavantaṃ purato katvā. Tattha bhagavā bhikkhūnañceva upāsakānañca majjhe nisinno gandhodakena nhāpetvā dukūlacumbaṭakena vodakaṃ katvā jātiṅgulakena majjitvā rattakambalapaḷiveṭṭhite pīṭhe ṭhapitarattasuvaṇṇaghanapaṭimā viya ativirocittha. Ayaṃ panettha porāṇānaṃ vaṇṇabhaṇanamaggo –

“Gantvāna maṇḍalamāḷam, nāgavikkantacāraṇo;  
Obhāsayinganto lokaggo, nisīdi varamāsane.

“Tahiṃ nisinno naradammaśārathi,  
Devātidevo satapuññalakkhaṇo;  
Buddhāsane majjhagato virocāti,  
Suvaṇṇanekkaṃ viya paṇḍukambale.

“Nekkaṃ jambonadasseva, nikkhattaṃ paṇḍukambale;  
Virocāti vītamalo, maṇiverocano yathā.

“Mahāsālova samphullo, nerurājāva’ laṅkato;  
Suvaṇṇayūpasaṅkāso, padumo kokanado yathā.

“Jalanto dīparukkhova, pabbatagge yathā sikhī;  
Devānaṃ paṛicchattova, sabbaphullo virocāti’ ti.

**Kāpilavatthave sakye bahudeva rattiṃ dhammiyā kathāyāti** ettha dhammakathā nāma santhāgārānumodanāpaṭisaṃyuttā pakiṇṇakakathā vedītabbā. Tadā hi bhagavā ākāsagaṅgaṃ otārento viya pathavojaṃ ākaḍḍhanto viya mahājambuṃ matthake gahetvā cārento viya yojanikaṃ madhubhaṇḍaṃ cakkayantena piḷetvā madhupānaṃ pāyamāno viya kapilavatthuvāsīnaṃ sakyānaṃ hitasukhāvahaṃ pakiṇṇakakathaṃ kathesi. “Āvāsadānaṃ nāmetaṃ, mahārāja, mahantaṃ, tumhākaṃ āvāso mayā paribhutto, bhikkhusaṅghena ca paribhutto, mayā ca bhikkhusaṅghena ca paribhutto pana dhammaratanena paribhutto yevāti tīhi ratanehi paribhutto nāma hoti. Āvāsadānasmīhi dinne sabbadānaṃ dinnameva hoti. Bhummaṭṭhakapaṇṇasālāya vā sākhamāṇḍapassa vāpi ānisaṃso nāma paṛicchindītuṃ na sakkā. Āvāsadānānubhāvena hi bhava bhava nibbattassāpi sambādhitagabbhavāso na hoti, dvādasahattho ovarako viya mātukucchi asambādhova hoti’ ti. Evaṃ nānāyavicittaṃ bahuṃ dhammiṃ kathaṃ kathetvā –

“Sītaṃ uṇhaṃ paṭihanti, tato vālamigāni ca;  
Sirīsape ca makase, sisire cāpi vuṭṭhiyo.

“Tato vātātapo ghorō, sañjāto paṭihaññati;  
Leṇatthañca sukhatthañca, jhāyituñca vipassitum.

“Vihāradānaṃ saṅghassa, aggaṃ buddhena vaṇṇitaṃ;  
Tasmā hi paṇḍito poso, sampassaṃ atthamattano.

“Vihāre kāraye ramme, vāsayettha bahussute;  
Tesaṃ annañca pānañca, vatthasenāsanāni ca.

“Dadeyya ujubhūtesu, vippassanna cetasā;  
Te tassa dhammaṃ desenti, sabbadukkhāpanūdanaṃ;  
Yaṃ so dhammaṃ idhaññāya, parinibbāti anāsavo”ti. (cūlava. 295) –

Evam “ayampi āvāse ānisaṃso, ayampi āvāse ānisaṃso”ti bahudeva rattim atirekataram diyaḍḍhayāmaṃ āvāsānisaṃsakathaṃ kathesi. Tattha imā tāva gāthāva saṅgahaṃ āruḥā, pakiṇṇakadhammadesanā pana saṅgahaṃ nārohati. **Sandassetvāti**ādīni vuttatthāneva.

**Abhikkantā**ti atikkantā dve yāmā gatā. **Yassa dāni kālaṃ maññathā**ti yassa tumhe gamanassa kālaṃ maññatha, gamanakālo tumhākaṃ, gacchathāti vuttaṃ hoti. Kasmā pana bhagavā te uyyojesīti? Anukampāya. Sukhumālā hi te, tiyāmarattim nisīditvā vītināmentānaṃ sarīre ābādho uppajjeyya. Bhikkhusaṅghopi mahā, tassa ṭhānanisajjānaṃ okāso laddhum vaṭṭatīti ubhayānukampāya uyyojesi.

**Vigatathinamidhoti** tatra kira bhikkhū yāmadvayaṃ ṭhitāpi nisinnāpi acālayiṃsu, pacchimayāme pana āhāro pariṇamati, tassa pariṇatattā bhikkhusaṅgho vigatathinamidho jātoti akāraṇametam. Buddhānañhi kathaṃ suṇantassa kāyikacetasikadarathā na honti, kāyacittalahutādayo uppajjanti, tena tesaṃ dve yāme ṭhitānampi nisinnānampi dhammaṃ suṇantānaṃ thinamidham vigataṃ, pacchimayāmepe sampatte tathā vigatameva jātam. Tenāha “vigatathinamidho”ti.

**Piṭṭhi me āgilāyatī**ti kasmā āgilāyati? Bhagavato hi chabbassāni mahāpadhānaṃ padahantassa mahantaṃ kāyadukkhāṃ ahoṣi, athassa aparabhāge mahallakakāle piṭṭhivāto uppajjīti. Akāraṇaṃ vā etaṃ. Pahoti hi bhagavā uppannaṃ vedanaṃ vikkhambhetvā ekampi dvepe sattāhāni ekapallankena nisīditum. Santhāgārasālaṃ pana catūhi iriyāpathehi paribhuñjitukāmo ahoṣi. Tattha pādadhovanaṭṭhānato yāva dhammāsanā agamāsī, ettake ṭhāne gamanaṃ nipphannaṃ. Dhammāsanā pattaṃ thokaṃ ṭhatvā nisīdi, ettake ṭhāne ṭhānaṃ nipphannaṃ. Dveyāmaṃ dhammāsane nisīdi, ettake ṭhāne nisajjā nipphannā. Idāni dakkhiṇena passena thokaṃ nipanne sayanaṃ nipphajjissatīti evaṃ catūhi iriyāpathehi paribhuñjitukāmo ahoṣi. Upādinnakasarīrañca nāma “no āgilāyatī”ti na vattabbaṃ, tasmā ciranisajjāya sañjātaṃ appakampi āgilāyanaṃ gahetvā evamāha.

**Saṅghāṭim paññāpetvā**ti santhāgārassa kira ekapasse te rājāno paṭasāṇim parikkhipāpetvā kappiyamañcakaṃ paññāpetvā kappiyapaccattharaṇena attharivā upari suvaṇṇatārakagandhamālādīdāmapaṭimaṇḍitaṃ vitānaṃ bandhitvā gandhatelappadīpaṃ āropayiṃsu, “appeva nāma satthā dhammāsanato vuṭṭhāya thokaṃ vissamanto idha nipajjeyya, evaṃ no imaṃ santhāgāraṃ bhagavatā catūhi iriyāpathehi paribhuttaṃ dīgharattaṃ hitāya sukhāya bhavissatī”ti. Satthāpi tadeva sandhāya tattha saṅghāṭim paññāpetvā nipajji. **Uṭṭhānasaññaṃ manasi karitvā**ti “ettakaṃ kālaṃ atikkamitvā vuṭṭhahissāmī”ti vuṭṭhānasaññaṃ citte ṭhapetvā, tañca kho aniddāyantova therassa dhammakathaṃ suṇamāno.

**Avassutapariyāyanti** avassutassa pariyaṃ, avassutassa kāraṇanti attho. **Adhimuccatī**ti kilesādhimuccanena adhimuccati, giddho hoti. **Byāpajjatī**ti byāpādasena pūticitto hoti. **Cakkhutoti** cakkhubhāvena. **Māroti** kilesamāropi devaputtamāropi. **Otāranti** vivaraṃ. **Ārammaṇanti** paccayaṃ. Naḷāgāratiṇāgāraṃ viya hi savisevanāni āyatanāni, tiṇukkā viya kilesupattirahaṃ ārammaṇaṃ,



tiṇukkāya ṭhapitaṭhapitaṭṭhāne aṅgārassujjalanaṃ viya ārammaṇe āpāthamāgate kilesānaṃ uppatti. Tena vuttaṃ **labhetha māro otāranti**.

Sukkapakkhe bahalamattikapiṇḍāvalepanaṃ kūṭāgāraṃ viya nibbisevanāni āyatanāni, tiṇukkā viya vuttapakārārammaṇaṃ, tiṇukkāya ṭhapitaṭhapitaṭṭhāne nibbāpanaṃ viya nibbisevanānaṃ āyatanānaṃ ārammaṇe āpāthamāgate kilesapariḷāhassa anuppatti. Tena vuttaṃ **neva labhetha māro otāranti**.

## 7. Dukkhadhammasuttavaṇṇanā

**244.** Sattame **dukkhadhammānanti** dukkhasambhavadhammānaṃ. Pañcasu hi khandhesu sati chedanavadhabandhanādibhedaṃ dukkhaṃ sambhavati, tasmā te dukkhasambhavadhammattā dukkhadhammāti vuccanti. **Tathā kho panassāti** tenākārenassa. **Yathāssa kāme passatoti** yenākārenassa kāme passantassa. **Yathā carantanti** yenākārena cāraṇca vihāraṇca anubandhitvā carantaṃ. **Aṅgārakāsūpamā kāmā diṭṭhā hontīti** pariyetṭhimūlakassa ceva paṭisandhimūlakassa ca dukkhassa vasena aṅgārakāsu viya mahāpariḷāhāti diṭṭhā honti. Kāme pariyesantānaṇhi nāvāya mahāsamuddogāhanaajapathasaṅkupathapaṭipajjanauhatobyūḷhasaṅgāmapakkhandanādivasena pariyetṭhimūlakampi, kāme paribhuñjantānaṃ kāmāparibhogacetanāya catūsu apāyesu dinnapaṭisandhimūlakampi mahāpariḷāhadukkhaṃ uppajjati. Evametassa duvidhassāpi dukkhassa vasena aṅgārakāsu viya mahāpariḷāhāti diṭṭhā honti.

**Dāyanti** aṭavim. **Puratopi kaṇṭakoti** purimāpasse vijjhītukāmo viya āsannaṭṭhāneyeva ṭhitakaṇṭako. **Pacchatoti**ādīsipi eseva nayo. Heṭṭhā pana pādehi akkantaṭṭhānassa santike, na akkantaṭṭhāneyeva. Evaṃ so kaṇṭakagabbhaṃ pavitṭho viya bhāveyya. **Mā maṃ kaṇṭakoti** mā maṃ kaṇṭako vijjhīti kaṇṭakavedhaṃ rakkhamāno.

**Dandho, bhikkhave, satuppādoti** satiyā uppādayeva dandho, uppannamattāya pana tāya kāci kilesā niggaḥitāva honti, na saṅṭhātuṃ sakkonti. Cakkhudvārasmiṇhi rāgādīsū uppannesu dutiyajavanavārena “kilesā me uppannā”ti ṇatvā tatiye javanavāre saṃvarajavanāmyeva javati. Anacchariyañcetaṃ, yaṃ vipassako tatiyajavanavāre kilese niggaṇṭheyya. Cakkhudvāre pana iṭṭhārammaṇe āpāthagate bhavaṅgaṃ āvaṭṭetvā āvajjanādīsū uppannesu voṭṭhabbanānantaraṃ sampattakilesajavanavāraṃ nivattetvā kusalameva uppādeti. Āraddhavipassakānaṇhi ayamānisamso bhāvanāpaṭisaṅkhāne patiṭṭhitabhāvassa.

**Abhihaṭṭhuṃ pavāreyyunti** sudinnattherassa viya raṭṭhapālakulaputtassa viya ca kāyena vā satta ratanāni abhiharitvā vācāya vā “amhākaṃ dhanato yattakaṃ icchasi, tattakaṃ gaṇhā”ti vadantā pavāreyyūṃ. **Anudahantīti** sarīre paliveṭṭhitattā uṇhapariḷāhaṃ janetvā anudahanti. Sañjātasede vā sarīre laggantā anusentītipi attho. **Yaṇhi taṃ, bhikkhave, cittanti** idaṃ yasmā citte anāvaṭṭante puggalassa āvaṭṭanaṃ nāma natthi. Evarūpaṇhi cittaṃ anāvaṭṭanti, tasmā vuttaṃ. Iti imasmiṃ sutte vipassanābalameva dīpitaṃ.

## 8. Kiṃsukopamasuttavaṇṇanā

**245.** Aṭṭhame **dassananti** paṭhamamaggasettaṃ adhivacanaṃ. Paṭhamamaggo hi kilesapahānakiccaṃ sādheṇto paṭhamam nibbānaṃ passati, tasmā dassananti vuccati. Gotrabhuñṇaṃ pana kiñcāpi maggato paṭhamataraṃ passati, passitvā pana kattabbakiccassa kilesapahānassa abhāvena na dassananti vuccati. Apica cattāropi maggā dassanameva. Kasmā? Sotāpattimaggakkhaṇe dassanaṃ visujjhati, phalakkhaṇe visuddhaṃ. Sakadāgāmianāgāmīarahattamaggakkhaṇe visujjhati, phalakkhaṇe visuddhanti evaṃ kathentānaṃ bhikkhūnaṃ sutvā so bhikkhu “ahampi dassanaṃ visodhetvā arahattaphale patiṭṭhito dassanavisuddhikaṃ nibbānaṃ sacchikatvā viharissāmi”ti taṃ bhikkhuṃ upasaṅkamitvā evaṃ pucchi. So phassāyatanakammaṭṭhāniko channaṃ phassāyatanānaṃ vasena rūpārūpadhamme pariggahetvā arahattaṃ patto. Ettha hi purimāni pañca āyatanāni rūpaṃ, manāyatanam

arūpaṃ. Iti so attanā adhigatamaggameva kathesi.

**Asantuṭṭhoti** padesasaṅkhāresu ṭhatvā kathitattā asantuṭṭho. Evaṃ kirassa ahosi – “ayaṃ padesasaṅkhāresu ṭhatvā kathesi. Sakkā nu kho padesasaṅkhāresu ṭhatvā dassanavisuddhikaṃ nibbānaṃ pāpuṇitu”nti? Tato naṃ pucchi – “āvuso, tvamaṃyeva nu kho idaṃ dassanavisuddhikaṃ nibbānaṃ jānāsi, udāhu aññeṇi jānantā atthi”ti. Atthāvuso, asukavihāre asukatthero nāmāti. So tampi upasaṅkamitvā pucchi. Etenupāyena aññampi aññampīti.

Ettha ca dutiyo pañcakkhandhakammaṭṭhāniko rūpakkhandhavasena rūpaṃ, sesakkhandhavasena nāmanti nāmarūpaṃ vavattthapetvā anukkamena arahattaṃ patto. Tasmā sopi attanā adhigatamaggameva kathesi. Ayaṃ pana “imesaṃ aññamaññaṃ na sameti, paṭhamena sappadesasaṅkhāresu ṭhatvāva kathitaṃ, iminā nippadesesū”ti asantuṭṭho hutvā tatheva taṃ pucchitvā pakkāmi.

Tatiyo mahābhūtakammaṭṭhāniko cattāri mahābhūtāni saṅkhepato ca vitthārato ca pariggahetvā arahattaṃ patto, tasmā ayampi attanā adhigatamaggameva kathesi. Ayaṃ pana “imesaṃ aññamaññaṃ na sameti, paṭhamena sappadesasaṅkhāresu ṭhatvā kathitaṃ, dutiyena nippadesesu, tatiyena atisappadesesū”ti asantuṭṭho hutvā tatheva taṃ pucchitvā pakkāmi.

Catuttho tebhūmakakammaṭṭhāniko. Tassa kira samappavattā dhātuyo ahesuṃ, kallasarīraṃ balapattaṃ, kammaṭṭhānānipissa sabbāneva sappāyāni, atītā vā saṅkhārā hontu anāgatā vā paccuppannā vā kāmāvacarā vā rūpāvacarā vā arūpāvacarā vā, sabbepi sappāyāva. Asappāyakammaṭṭhānaṃ nāma natthi. Kālesupī purehattaṃ vā hotu pacchābhattaṃ vā paṭhamayāmādayo vā, asappāyo kālo nāma natthi. Yathā nāma cāribhūmiṃ otiṇṇo mahāhatthi hatthena gahettabbaṃ hattheneva luṅcivā gaṇhāti, pādehi paharivā gahettabbaṃ pādehi paharivā gaṇhāti, evameva sakale tebhūmakadhamme kalāpaggāhena gahetvā sammasanto arahattaṃ patto, tasmā esopi attanā adhigatamaggameva kathesi. Ayaṃ pana “imesaṃ aññamaññaṃ na sameti. Paṭhamena sappadesasaṅkhāresu ṭhatvā kathitaṃ, dutiyena nippadesesu, puna tatiyena sappadesesu, catutthena nippadesesuyevā”ti asantuṭṭho hutvā taṃ pucchi – “kiṃ nu kho, āvuso, idaṃ dassanavisuddhikaṃ nibbānaṃ tumhehi attanova dhammatāya ñātaṃ, udāhu kenaci vo akkhāta”nti? Āvuso, mayaṃ kiṃ jānāma? Atthi pana sadevake loke sammāsambuddho, taṃ nissāyetaṃ amhehi ñātanti. So cintesi – “ime bhikkhū mayhaṃ ajjhāsayaṃ gahetvā kathetuṃ na sakkonti, ahaṃ sabbaññubuddhameva pucchitvā nikkāṅkho bhavissāmi”ti yena bhagavā tenupasaṅkami.

Bhagavā tassa vacanaṃ sutvā “yehi te pañho kathito, te cattāropi khīṇāsavā, sukathitaṃ tehi, tvam pana attano andhabālātāya taṃ na sallakkhesi”ti na evaṃ vihese. Kārahāvaṃ panassa ñatvā “atthagavesako esa, dhammadesanāya eva naṃ bujjhāpessāmi”ti kiṃsukopamaṃ āhari. Tattha bhūtaṃ vatthum katvā evamattho vibhāvetabbo – ekasmiṃ kira mahānagare eko sabbaganthadharo brāhmaṇavejjo paṇḍito paṭivasati. Atheke nagarassa pācīnadvāragāmaṃ paṇḍurogapuriso tassa santikaṃ āgantvā taṃ vanditvā atthāsi. Vejjapaṇḍito tena saddhiṃ sammoditvā “kenatthena āgatosi bhadrāmukhā”ti, pucchi. Rogenamhi, ayya, upadduto, bhesajjaṃ me kathehīti. Tena hi, bho, gaccha, kiṃsukarukkhaṃ chinditvā, sosetvā jhāpetvā, tassa khārodakaṃ gahetvā iminā ciminā ca bhesajjena yojetvā, ariṭṭhaṃ katvā piva, tena te phāsukaṃ bhavissatīti. So tathā katvā nirogo balavā pāsādiko jāto.

Athañño dakkhiṇadvāragāmaṃ puriso teneva rogena āturo “asuko kira bhesajjaṃ katvā arogo jāto”ti sutvā taṃ upasaṅkamitvā pucchi – “kena te, samma, phāsukaṃ jāto”nti. Kiṃsukāriṭṭhena nāma, gaccha tvampi karohīti. Sopi tathā katvā tādisova jāto.

Athañño pacchimadvāragāmaṃ...pe... uttaradvāragāmaṃ puriso teneva rogena āturo “asuko kira bhesajjaṃ katvā arogo jāto”ti taṃ upasaṅkamitvā pucchi “kena te, samma, phāsukaṃ jāto”nti? Kiṃsukāriṭṭhena nāma, gaccha tvampi karohīti. Sopi tathā katvā tādisova jāto.

Athañño paccantavāsī aditṭhapubbakimṣuko eko puriso teneva rogena āturo ciram tāni tāni bhesajjāni katvā roge avūpasamamāne “asuko kira nagarassa pācīnadvāragāmvāsī puriso bhesajjam katvā arogo jāto”ti sutvā “gacchāmahampi, tena katabhesajjam karissāmī”ti daṇḍamolubbha anupubbena tassa santikaṃ gantvā, “kena te, samma, phāsukaṃ jāta”nti pucchi. Kimṣukāritṭhena sammāti. Kīdiso pana so kimṣukoti. Jhāpitagāme tṭhitajhāmathūṇo viyāti. Iti so puriso attanā diṭṭhākāreṇa kimṣukaṃ ācikkhi. Tena hi diṭṭhākāle kimṣuko patitapatto khāṇukakāle diṭṭhattā tādisova hoti.

So pana puriso sutamaṅgalikattā “ayaṃ ‘jhāpitagāme jhāmathūṇo viyā’ti āha, amaṅgalametam. Etasmiñhi me bhesajje katepi rogo na vūpasamissatī”ti tassa veyyākaraṇena asantuṭṭho taṃ pucchi – “kiṃ nu kho, bho, tvaññeva kimṣukaṃ jānāsi, udāhu aññopi atthī”ti. Atthi, bho, dakkhiṇadvāragāme asuko nāmāti. So taṃ upasaṅkamitvā pucchi, svāssa pupphitakāle diṭṭhattā attano dassanānurūpena “lohitako kimṣuko”ti āha. So “ayaṃ purimena viruddham āha, kāḷako lohitakato suvidūradūre”ti tassapi veyyākaraṇena asantuṭṭho “atthi pana, bho, aññopi koci kimṣukadassāvī, yena kimṣuko diṭṭhapubbo”ti? Pucchitvā, “atthi pacchivadvāragāme asuko nāmā”ti vutte tampi upasaṅkamitvā pucchi. Svāssa phalitakāle diṭṭhattā attano dassanānurūpena “ocirakajāto ādinnasipāṭiko”ti āha. Phalitakālasmiñhi kimṣuko olambamānacīrako viya adhomukhaṃ katvā gahitaasikoso viya ca sirīsaruṅkko viya ca lambamānaphalo hoti. So “ayaṃ purimehi viruddham āha, na sakkā imassa vacanaṃ gahetu”nti tassapi veyyākaraṇena asantuṭṭho “atthi pana, bho, aññopi koci kimṣukadassāvī, yena kimṣuko diṭṭhapubbo”ti? Pucchitvā, “atthi uttaradvāragāme asuko nāmā”ti vutte tampi upasaṅkamitvā pucchi. So assa sañchannapattakāle diṭṭhattā attano dassanānurūpena “bahalapattapalāso sandacchāyo”ti āha. **Sandacchāyo** nāma saṃsanditvā tṭhitacchāyo.

So “ayampi purimehi viruddham āha, na sakkā imassa vacanaṃ gahetu”nti tassapi veyyākaraṇena asantuṭṭho taṃ āha, “kiṃ nu kho, bho, tumhe attanova dhammatāya kimṣukaṃ jānātha, udāhu kenaci vo akkhāto”ti? Kiṃ, bho, mayaṃ jānāma? Atthi pana mahānagarassa majjhe amhākaṃ ācariyo vejjapaṇḍito, taṃ nissāya amhehi nītantī. “Tena hi ahampi ācariyameva upasaṅkamitvā nikkāṅkho bhavissāmī”ti tassa santikaṃ upasaṅkamitvā taṃ vanditvā aṭṭhāsi. Vejjapaṇḍito tena saddhiṃ sammoditvā, “kenatthena āgatosi bhadrāmukhā”ti pucchi. Rogenamhi, ayya, upadduto, bhesajjam me kathethāti. Tena hi, bho, gaccha, kimṣukaruṅkhaṃ chinditvā sosetvā jhāpetvā tassa khārodakaṃ gahetvā iminā ciminā ca bhesajjena yojetvā ariṭṭhaṃ katvā piva, etena te phāsukaṃ bhavissatīti. So tathā katvā nirogo balavā pāsādiko jāto.

Tattha mahānagaraṃ viya nibbānagaraṃ daṭṭhabbaṃ. Vejjapaṇḍito viya sammāsambuddho. Vuttampi ce taṃ “bhisakko sallakattoti kho, sunakkhatta, tathāgatassetam adhivacanaṃ arahato sammāsambuddhassā”ti (ma. ni. 3.65) catūsu dvāragāmesu cattāro vejjantevāsikā viya cattāro dassanavisuddhipattā khīṇāsavā. Paccantavāsī paṭhamapuriso viya pañhapucchako bhikkhu. Paccantavāsino catunnaṃ vejjantevāsikānaṃ kathāya asantuṭṭhassa ācariyameva upasaṅkamitvā pucchanakālo viya imassa bhikkhuno catunnaṃ dassanavisuddhipattānaṃ khīṇāsavānaṃ kathāya asantuṭṭhassa sathhāraṃ upasaṅkamitvā pucchanakālo.

**Yathā yathā adhimuttānanti** yena yenākāreṇa adhimuttānaṃ. **Dassanaṃ suvisuddhanti** nibbānadassanaṃ suṭṭhu visuddham. **Tathā tathā kho tehi sappurisehi byākatanti** tena tenevākāreṇa tuyhaṃ tehi sappurisehi kathitaṃ. Yathā hi “kāḷako kimṣuko”ti kathento na aññaṃ kathesi, attanā diṭṭhanayena kimṣukameva kathesi, evameva chaphassāyatanānaṃ vasena dassanavisuddhipattakhīṇāsavopi imaṃ pañhaṃ kathento na aññaṃ kathesi, attanā adhigatamaggena dassanavisuddhikaṃ nibbānameva kathesi.

Yathā ca “lohitako ocirakajāto bahalapattapalāso kimṣuko”ti kathentopi na aññaṃ kathesi, attanā diṭṭhanayena kimṣukameva kathesi, evameva pañcupādānakkhandhavasena catumahābhūtavasena tebhūmakadhamavasena dassanavisuddhipattakhīṇāsavopi imaṃ pañhaṃ kathento na aññaṃ kathesi,

attanā adhigatamaggena dassanavisuddhikaṃ nibbānameva kathesi.

Tattha yathā kālakakāle kiṃsukadassāvinopi taṃ dassanaṃ bhūtaṃ tacchaṃ na tena aññaṃ diṭṭhaṃ, kiṃsukova diṭṭho, evameva chaphassāyatanavasena dassanavisuddhipattassāpi khīṇāsavassa dassanaṃ bhūtaṃ tacchaṃ, na tena aññaṃ kathitaṃ, attanā adhigatamaggena dassanavisuddhikaṃ nibbānameva kathitaṃ. Yathā ca lohitakāle ocirakajātakāle bahalapattapalāsakāle kiṃsukadassāvinopi taṃ dassanaṃ bhūtaṃ tacchaṃ, na tena aññaṃ diṭṭhaṃ, kiṃsukova diṭṭho, evameva pañcupādānakkhandhavasena catumahābhūtavasena tebhūmakadhammavasena dassanavisuddhipattassāpi khīṇāsavassa dassanaṃ bhūtaṃ tacchaṃ, na tena aññaṃ kathitaṃ, attanā adhigatamaggena dassanavisuddhikaṃ nibbānameva kathitaṃ.

**Seyyathāpi, bhikkhu rañño paccantimaṃ nagaranti** idaṃ kasmā āraddhaṃ? Sace tena bhikkhunā taṃ sallakkhitaṃ, athassa dhammadesanattaṃ āraddhaṃ. Sace na sallakkhitaṃ, athassa iminā nagaropamena tassevatthassa dīpanatthāya āvibhāvanatthāya āraddhaṃ. Tattha yasmā majjhimapadese nagarassa pākārādīni thirāni vā hontu dubbalāni vā, sabbaso vā mā hontu, corāsankā na honti, tasmā taṃ aggahetvā “paccantimaṃ nagara”nti āha. **Dalhuddhāpanti** thirapākāraṃ. **Dalhapākāratoraṇanti** thirapākārañceva thiratoraṇaṇca. Torāṇāni nāma hi purisubbedhāni nagarassa alaṅkāratthaṃ karīyanti, coranivāraṇatthānīpi hontiyeva. Atha vā toraṇanti piṭṭhasaṅghāsettaṃ nāmaṃ, thirapiṭṭhasaṅghātantipi attho. **Chadvāranti** nagaradvāraṃ nāma ekampi hoti dvepi satampi sahasampi, idha pana satthā chadvārikanagaraṃ dassento evamāha. **Paṇḍitoti** paṇḍiccena samannāgato. **Byattoti** veyyattiyena samannāgato visadañño. **Medhāvūti** ṭhānuppattikapañāsankhātāya medhāya samannāgato.

**Puratthimāya disāyāti**ādimhi bhūtamattaṃ katvā evamattho vedītabbo – samiddhe kira mahānagare sattaratanasampanno rājā cakkavatti rajjaṃ anusāsati, tassettaṃ paccantanagaraṃ rājāyuttavirahitaṃ, atha purisā āgantvā “amhākaṃ, deva, nagare āyuttako natthi, dehi no kiñci āyuttaka”nti āhaṃsu. Rājā ekaṃ puttaṃ datvā “gacchatha, etaṃ ādāya tattha abhisiñcivā vinicchayaṭṭhānādīni katvā vasathā”ti. Te tathā akaṃsu. Rājaputto pāpamittasamsaggena katipāheyeva surāsoṇḍo hutvā, sabbāni vinicchayaṭṭhānādīni hāretvā, nagaramajjhe dhuttehi parivārito suraṃ pivanto naccagītādiratiyā vītināmeti. Atha rañño āgantvā ārocayīṃsu.

Rājā ekaṃ paṇḍitaṃ amaccaṃ āṇāpesi – “gaccha kumāraṃ ovaditvā, vinicchayaṭṭhānādīni kāretvā, puna abhisekaṃ katvā, ehi”ti. Na sakkā, deva, kumāraṃ ovadituṃ, caṇḍo kumāro ghāteyyāpi manti. Athekaṃ balasampannaṃ yodhaṃ āṇāpesi – “tvaṃ iminā saddhiṃ gantvā sace so ovāde na tiṭṭhati, sīsamassa chindāhi”ti. Iti so amacco yodho cāti idaṃ sīghaṃ dūtayugaṃ tattha gantvā dovārikaṃ pucchi – “kahaṃ, bho, nagarassa sāmī kumāro”ti. Eṣa majjhesiṅghātake suraṃ pivanto dhuttaparivārito gītādiratiṃ anubhonto nisinnoti. Atha taṃ dūtayugaṃ gantvā amacco tāvettha, “sāmī, vinicchayaṭṭhānādīni kira kāretvā sādhukaṃ rajjaṃ anusāsā”ti āha. Kumāro asuṇanto viya nisīdi. Atha naṃ yodho sīse gahetvā, “sace rañño āṇaṃ karosi, kara, no ce, ettheva te sīsaṃ pātessāmī”ti khaggaṃ abbāhi. Paricārakā dhuttā tāvadeva disāsu palāyīṃsu. Kumāro bhīto sāsanaṃ sampaṭicchi. Athassa te tattheva abhisekaṃ katvā setacchattaṃ ussāpetvā “sammā rajjaṃ anusāsāhi”ti raññā vuttaṃ yathābhūtavacanaṃ niyyātetvā yathāgatamaggameva paṭipajjīṃsu. Imamatthaṃ āvikaronto bhagavā “puratthimāya disāyā”ti āha.

Tatridaṃ opammasaṃsandanaṃ – samiddhamahānagaraṃ viya hi nibbānagaraṃ datṭhabbaṃ, sattaratanasamannāgato rājā cakkavatti viya satabojjhaṅgaratanasamannāgato dhammarājā sammāsambuddho, paccantimanagaraṃ viya sakkāyanagaraṃ, tasmīṃ nagare kūṭarājaputto viya imassa bhikkhuno kūṭacittuppādo, kūṭarājaputtassa dhuttehi parivāritakālo viya imassa bhikkhuno pañcahi nīvaraṇehi samaṅgikālo, dve sīghadūtā viya samathakammaṭṭhānaṇca vipassanākammaṭṭhānaṇca, mahāyodhena sīse gahitakālo viya uppannapaṭhamajjhānasamādhinā niccalaṃ katvā cittaggahitakālo, yodhena sīse gahitamatte dhuttānaṃ disāsu palāyitvā dūrībhāvo viya paṭhamajjhānamhi uppannamatte

nīvaraṇānaṃ dūrībhāvo, “karissāmi rañño sāsana”nti sampajicchitamatte vissatṭhakālo viya jhānato vuṭṭhitakālo, amaccena rañño sāsanaṃ ārocitakālo viya samādhinā cittaṃ kammaniyaṃ katvā vipassanākammaṭṭhānassa vaḍḍhitakālo, tatthevassa tehi dvīhi dūtehi katābhisekassa setacchattaussāpanaṃ viya samathavipassanākammaṭṭhānaṃ nissāya arahattappattassa vimuttisetacchattussāpanaṃ veditabbaṃ.

**Nagaranti kho bhikkhu imassetam cātumahābhūtikassa kāyassa adhivacananti**ādīsu pana **cātumahābhūtikassā**tiādīnaṃ padānaṃ attho heṭṭhā vitthāritova. Kevalaṃ pana viññānarājaputtassa nivāsaṭṭhānattā ettha kāyo “nagara”nti vutto, tasseva dvārabhūtattā cha āyatanāni “dvārāni”ti, tesu dvāresu niccaṃ suppatiṭṭhitattā sati “dovāriko”ti, kammaṭṭhānaṃ ācikkhantena dhammarājena pesitattā samathavipassanā “sīghaṃ dūtayuga”nti. Ettha mahāyodho viya samatho, paṇḍitāmacco viya vipassanā veditabbā.

**Majjhe siṅghātakoti** nagaramajjhe siṅghātakoti. **Mahābhūtānanti** hadayavatthussa nissayabhūtānaṃ mahābhūtānaṃ. Vatthurūpassa hi paccayadassanattamevetam cātumahābhūtaggahaṇaṃ kataṃ. Nagaramajjhe pana so rājakumāro viya sarīramajjhe hadayarūpasīghātake nisinna samathavipassanādūtehi arahattābhisekena abhisīcītabbo vipassanāvīññānarājaputto daṭṭhabbo. Nibbānaṃ pana yathābhūtasabhāvaṃ akuppaṃ adhikārīti katvā **yathābhūtaṃ vacananti** vuttaṃ. Ariyamaggo pana yādisova pubbabhāgavipassanāmaggo, ayampi aṭṭhaṅgasamannāgatattā tādisoyevāti katvā **yathāgatamaggoti** vutto. Idaṃ tāvettha dhammadesanattamaṃ ābhatāya upamāya saṃsandanaṃ.

Tassevatthassa pākāṭikaraṇattamaṃ ābhatapakke pana idaṃ saṃsandanaṃ – ettha hi chadvārūpamā chaphassāyatanavasena dassanavisuddhipattaṃ khīṇāsavaṃ dassetuṃ ābhatā, nagarasāmiupamā pañcakkhandhavasena, siṅghātakūpamā cātumahābhūtavasena, nagarūpamā tebhūmakadhammavasena dassanavisuddhipattaṃ khīṇāsavaṃ dassetuṃ ābhatā. Saṅkhepato paṇimasmiṃ sutte catusaccameva kathitaṃ. Sakalenapi hi nagarasambhārena dukkhasaccameva kathitaṃ, yathābhūtavacanena nirodhasaccaṃ, yathāgatamaggena maggasaccaṃ, dukkhassa pana pabhāvikā taṇhā samudayasaccaṃ. Desanāpariyosāne pañhapucchako bhikkhu sotāpattiphale patiṭṭhitoti.

## 9. Viṇopamasuttavaṇṇanā

**246.** Navame **yassa kassaci, bhikkhave, bhikkhussa vā bhikkhuniyā vāti** idaṃ sathā yathā nāma mahākuṭumbiko mahantaṃ kasikammaṃ katvā, nipphannasasso gharadvāre maṇḍapaṃ katvā, ubhatośaṅghassa dānaṃ pavatteyya. Kiñcāpi tena ubhatośaṅghassa dānaṃ paṭṭhapitaṃ, dvīsu pana parisāsu santappitāsu sesajanampi santappetiyyeva, evameva bhagavā samadhikāni cattāri asaṅkhyeyyāni pāramiyo pūretvā bodhimaṇḍe sabbaññutaññānaṃ adhigantvā pavattitavaradhammacakko jetavanamahāvihāre nisinna bhikkhuparisāya ceva bhikkhuniparisāya ca mahādharmayāgaṃ yajanto viṇopamasuttaṃ ārabhi. Taṃ penetaṃ kiñcāpi dve parisā sandhāya āradham, catunnampi pana parisānaṃ avāritaṃ. Tasmā sabbehipi sotabbañceva saddhātābbañca, pariyogāhitvā cassa attharaso vinditabboti.

Tattha **chandoti**ādīsu **chando** nāma pubbuppattikā dubbalataṇhā, so rañjetuṃ na sakkoti. Aparāparaṃ uppajjamānā pana balavataṇhā **rāgo** nāma, so rañjetuṃ sakkoti. Daṇḍādānādīni kātuṃ asamatto pubbuppattiko dubbalakodho **doso** nāma. Tāni kātuṃ samatto aparāparuppattiko balavakodho **paṭighaṃ** nāma. **Moho** pana mohanasammohanavasena uppannaṃ aññānaṃ. Evamettha pañcahihi padehi tīṇi akusalamūlāni gahitāni. Tesu gahitesu sabbehi tammūlakā kilesā gahitāva honti. “Chando rāgo”ti vā padadvayena aṭṭhalobhasahagatacittuppādā, “doso paṭigha”nti padadvayena dve domanassasahagatacittuppādā, mohapadena lobhadosarahitā dve uddhaccavicikicchāsahagatacittuppādā gahitāni. Evaṃ sabbehi dvādasa cittuppādā dassitāva honti.

**Sabhayoti** kilesacorānaṃ nivāsattḥānattā sabhayo. **Sappaṭibhayoti** vadhabandhanādīnaṃ kāraṇattā sappaṭibhayo. **Sakaṇṭakoti** rāgādīhi kaṇṭakehi sakaṇṭako. **Sagahanoti** rāgagahanādīhi sagahano. **Ummaggoti** devalokaṃ vā manussalokaṃ vā nibbānaṃ vā gacchantassa amaggo. **Kummaggoti** kucchitajegucchibhūtaṭṭhānagamanaekapadikamaggo viya apāyasampāpakattā kummaggo. **Duhitikoti** ettha ihitī iriyanā, dukkhā ihiti etthāti, **duhitiko**. Yasmiñhi magge mūlaphalādikhādanīyaṃ vā sāyanīyaṃ vā natthi, tasmim̐ iriyanā dukkhā hoti, na sakkā taṃ paṭipajjitvā icchitaṭṭhānaṃ gantum̐. Kilesamaggampi paṭipajjitvā na sakkā sampattibhavaṃ gantunti kilesamaggo duhitikoti vutto. Dvīhitikotipi pāṭho, esevatto. **Asappurisasevitoti** kokālikādīhi asappurisehi sevito.

**Tato cittaṃ nivārayeti** tehi cakkhuviññeyyehi rūpehi taṃ chandādivasena pavattacittaṃ asubhāvajjanādīhi upāyehi nivāraye. Cakkhudvārasmiñhi iṭṭhārammaṇe rāge uppanne asubhato āvajjantassa cittaṃ nivattati, aniṭṭhārammaṇe dose uppanne mettato āvajjantassa cittaṃ nivattati, majjhārammaṇe mohe uppanne uddesaparipucchaṃ garuvāsaṃ āvajjantassa cittaṃ nivattati. Evaṃ asakkontena pana sathumahattataṃ dhammassa svākkhātataṃ saṅghassa suppaṭipatti ca āvajjitabbā. Sathumahattataṃ paccavekkhatopi hi dhammassa svākkhātataṃ saṅghassa suppaṭipattiṃ paccavekkhatopi cittaṃ nivattati. Tena vuttaṃ “asubhāvajjanādīhi upāyehi nivāraye”ti.

**Kitṭhanti** kiṭṭhaṭṭhāne uppannasassaṃ. **Sampannanti** paripuṇṇaṃ sunipphannaṃ. **Kitṭhādoti** sassakhādako. **Evameva khoti** ettha sampannakiṭṭhaṃ viya pañca kāmagaṇā daṭṭhabbā, kiṭṭhādo goṇo viya kūtācittaṃ, kiṭṭhārakkhassa pamādakālo viya bhikkhuno chasu dvāresu satim̐ pahāya vicaraṇakālo, kiṭṭhārakkhassa pamādamāgamaṃ goṇena gahitagabbhassa kiṭṭhassa khādītattā sassasāmino sassaphalānadhigamo viya chadvārarakkhikāya satiyā vipavāsamāgamaṃ pañcakāmagaṇaṃ assādentena cittaṃ kusalapakkhassa nāsītattā bhikkhuno sāmāññaphalādhigamābhāvo vedītabbo.

**Upariḡaṭāyanti** dvinnaṃ siṅgānaṃ antare. **Suniggahitaṃ niggaṇḡheyāti** ghaṭāyaṃ paṭiṭṭhite nāsārajjuke suṭṭhu niggaṇḡhitam̐ katvā niggaṇḡheyya. **Daṇḡdenāti** muggarasadisena thūladaṇḡakena. **Evañhi so bhikkhave goṇoti** evaṃ so kiṭṭhārakkhassa pamādamānvāya yasmiṃ yasmiṃ khaṇe kiṭṭhaṃ otaritukāmo hoti, tasmim̐ tasmim̐ khaṇe evaṃ niggaṇḡhitvā tāletvā osajjanena nibbisevanabhāvaṃ upanīto goṇo.

**Evameva khoti** idhāpi sampannakiṭṭhamiva pañca kāmagaṇā daṭṭhabbā, kiṭṭhādo viya kūtācittaṃ, kiṭṭhārakkhassa appamādo viya imassa bhikkhuno chasu dvāresu satiyā avissajjanaṃ, daṇḡo viya suttanto, goṇassa kiṭṭhābhimukhakāle daṇḡena tāḷanaṃ viya cittaṃ bahiddhā puthuttārammaṇābhimukhakāle anamataggiyadevadūtaādītāāsīvisūpamaanāgatabhayādīsū taṃ taṃ suttam̐ āvajjetvā cittuppādassa puthuttārammaṇato nivāretvā mūlakammaṭṭhāne oṭāraṇaṃ vedītabbam̐. Tenāhu porāṇā –

“Subhāsitaṃ sutvā mano pasīdati,  
Dameti naṃ pītisukhañca vindati;  
Tadassa ārammaṇe tiṭṭhate mano,  
Goṇova kiṭṭhādako daṇḡatajjito”ti.

**Udujīnti** tajjitaṃ. **Sudujiṇṇanti** sutajjitaṃ, sujīnti attho. Udu, sudūti idaṃ pana nipātamattameva. **Ajjhātanti** gocarajjhāttaṃ. **Santiṭṭhatīti**ādīsū paṭhamajjhānavasena santiṭṭhati, dutiyajjhānavasena sannisīdati, tatiyajjhānavasena ekodī hoti, catutthajjhānavasena samādhīyati. Sabbampi vā etaṃ paṭhamajjhānavasena vedītabbam̐. Ettāvātā hi sammāsambuddhena samathānurakkhaṇāndriyaṃ varasīlaṃ nāma kathitaṃ.

**Raṇṇo vāti** kassacideva paccantaraṇṇo vā. **Saddam̐ suṇeyyāti** paccūsakāle pabuddho kusalena viṇāvādakena vādiyamānāya madhurasaddam̐ suṇeyya. **Rajaniyoti**ādīsū cittaṃ raṇṇetīti **rajanīyo**. Kāmetabbatāya **kamanīyo**. Cittaṃ madayatīti **madanīyo**. Cittaṃ mucchitaṃ viya karaṇato mucchīyatīti

**mucchanīyo.** Ābandhitvā viya gahaṇato bandhatīti **bandhanīyo.** **Alaṃ me, bhoti** vīṇāya saṅghānaṃ disvā taṃ anicchanto evamaḥa. **Upadhāraṇeti** vetṭhake. **Koṇanti** caturassam sāradaṇḍakam.

**So taṃ vīṇanti** so rājā “āharatha naṃ vīṇaṃ, ahamassā saddaṃ pasissāmī”ti taṃ vīṇaṃ gahetvā. **Dasadhā vāti**ādīsu paṭhamam tāva dasadhā phāleyya, athassā saddaṃ apassanto satadhā phāleyya, tathāpi apassanto sakalikaṃ sakalikaṃ kareyya, tathāpi apassanto “sakalikā jhāyissanti, saddo pana nikkhamitvā palāyissati, tadā naṃ passissāmī”ti agginā ḍaheyya. Tathāpi apassanto “sallahukāni masicuṇṇāni vātena bhassissanti, saddo sāradaḥāṇṇaṃ viya pādamaṇḍale patissati, tadā naṃ passissāmī”ti mahāvāte vā ophuneyya. Tathāpi apassanto “masicuṇṇāni yathodakam gamissanti, saddo pana pāraṃ gacchanto puriso viya nikkhamitvā tarissati, tadā naṃ passissāmī”ti nadiyā vā sīghasotāya pavāheyya.

**Evam vadeyyāti** sabbehipimehi upāyehi apassanto te manusse evaṃ vadeyya. **Asatī kirāyanti** asatī kira ayaṃ vīṇā, lāmikāti attho. Asatīti lāmakaḍhivacanametam. Yathāha –

“Asā lokitthiyo nāma, velā tāsam na vijjati;  
Sārattā ca pagabbhā ca, sikhī sabbaghaso yathā”ti. (jā. 1.1.61);

**Yathevaṃ yaṃkiñci vīṇā nāmāti** na kevalaṅca vīṇāyeva lāmikā, yatheva pana ayaṃ vīṇā nāma, evaṃ yaṃkiñci añṇampi tantibaddham, sabbam taṃ lāmakamevāti attho. **Evameva khoti** ettha vīṇā viya pañcakkhandhā daṭṭhabbā, rājā viya yogāvacarō. Yathā so rājā taṃ vīṇaṃ dasadhā phālanato paṭṭhāya vicinanto saddaṃ adisvā vīṇāya anattiko hoti, evaṃ yogāvacarō pañcakkhandhe sammāsanto ahanti vā mamanti vā gahetabbam apassanto khandhehi anattiko hoti. Tenassa taṃ khandhasammasanaṃ dassento **rūpaṃ samanvesati yāvatā rūpassa gatīti**ādīmāha.

Tattha **samanvesatīti** pariyesati. **Yāvatā rūpassa gatīti** yattakā rūpassa gati. Tattha **gatīti** gatigati, sañjātigati, salakkhaṇagati, vibhavagati, bhedagati pañcavidhā honti. Tattha idaṃ rūpaṃ nāma heṭṭhā avīcipariyantaṃ katvā upari akaniṭṭhabrahmalokaṃ anto katvā etthantare saṃsarati vattati, ayamassa **gatigati** nāma.

Ayaṃ pana kāyo neva padumagabbhe, na puṇḍarīkanīluppalādīsu sañjāyati, āmāsayaṃpakāsayaṇaṃ pana antare bahalandhakāre duggandhapavanavicarite paramajegucche okāse pūtimacchādīsu kimi viya sañjāyati, ayaṃ rūpassa **sañjātigati** nāma.

Duvidham pana rūpassa lakkhaṇaṃ, “ruppatīti kho, bhikkhave, tasmā rūpa”nti (saṃ. ni. 3.79) evaṃ vutta rupanasaṅkhātaṃ paccatalakkhaṇaṅca aniccātibhedam sāmāññalakkhaṇaṅca, ayamassa **salakkhaṇagati** nāma.

“Gati migānaṃ pavanaṃ, ākāso pakkhinaṃ gati;  
Vibhavo gati dhammaṇaṃ, nibbānaṃ arahato gatī”ti. (pari. 339) –

Evaṃ vutto rūpassa abhāvo **vibhavagati** nāma. Yo panassa bhedo, ayaṃ **bhedagati** nāma. Vedanādīsupi eseṃ nayo. Kevalaṅhettha upari yāva bhavaggā tesam sañjātigati, salakkhaṇagatiyaṅca vedayitasañjānanaabhisaṅkharānavijānanaṃ avasena paccatalakkhaṇaṃ veditabbam.

**Tampi tassa na hotīti** yadetam rūpādīsu ahanti vā mamanti vā asmīti vā evaṃ niddiṭṭham diṭṭhitaṅghāmanaggāhattayaṃ, tampi tassa khīṇāsavassa na hotīti yathānusandhināva suttāgataṃ. Tena vuttaṃ mahāaṭṭhakathāyaṃ –

“Ādimhi sīlaṃ kathitaṃ, majjhe samādhībāvanā;  
Pariyosāne ca nibbānaṃ, esā vīṇopamā kathā”ti.

## 10. Chappāṇakopamasuttavaṇṇanā

247. Dasame **arugattoti** vaṇasarīro. Tesameveva arūnaṃ pakkattā **pakkagatto**. **Saravananti** kaṇḍavanaṃ. **Evameva khoti** arugatto puriso viya dussīlapuggalo veditabbo. Tassa kusakaṇṭakehi viddhassa sarapattehi ca asidhārūpamehi vilikhitagattassa bhiiyosomattāya dukkhadomanassaṃ viya tattha tattha sabrahmacārīhi “ayaṃ so imesaṅca imesaṅca kammānaṃ kārako”ti vuccamānassa uppajjanadukkhaṃ veditabbaṃ.

**Labhati vattāranti** labhati codakaṃ. **Evamkārīti** evarūpānaṃ vejjakammadūtakammādīnaṃ kārako. **Evamsamācāroti** vidhavā gocarādivasena evarūpagocarō. **Asucigāmakaṇṭakoti** asuddhaṭṭhena asuci, gāmaṃvāsīnaṃ vijjhanaṭṭhena kaṇṭakoti gāmakaṇṭako.

**Pakkhinti** hatthisoṇḍasakuṇaṃ. **Ossajjeyyāti** vissajjeyya. **Āviñcheyyunti** ākaḍḍheyyuṃ. **Pavekkhāmīti** pavississāmi. **Ākāsaṃ ḍessāmīti** ākāsaṃ uppatissāmi.

Etesu pana ahi “bhogehi maṇḍalaṃ bandhitvā supissāmī”ti vammikaṃ pavisitukāmo hoti. Susumāro “dūre bilaṃ pavisitvā nipajjissāmī”ti udakaṃ pavisitukāmo hoti. Pakkhī “ajaṭākāse sukhaṃ vicarissāmī”ti ākāsaṃ ḍetukāmo hoti. Kukкуро “uddhanaṭṭhāne chārikaṃ byūhitvā usumaṃ gaṇhanto nipajjissāmī”ti gāmaṃ pavisitukāmo hoti. Siṅgālo “manussamaṃsaṃ khādītva piṭṭhiṃ pasāretvā sayissāmī”ti āmakasusānaṃ pavisitukāmo hoti. Makkaṭo “uce rukkhe abhiruhitvā disādisaṃ pakkhandissāmī”ti vanaṃ pavisitukāmo hoti.

**Anuvidhāyeyyunti** anugaccheyyuṃ, anuvidhiyeyyuntipi pāṭho, anuvidhānaṃ āpajjeyyunti attho. Yattha so yāti, tattheva gaccheyyuntī vuttaṃ hoti. **Evamevāti** ettha cha pāṇakā viya chāyatanāni daṭṭhabbāni, daḷharajju viya taṇhā, majjhe gaṇṭhi viya avijjā. Yasmim yasmim dvāre ārammaṇaṃ balavaṃ hoti, taṃ taṃ āyatanāṃ tasmim tasmim ārammaṇe āviñchati.

Imaṃ pana upamaṃ bhagavā sarikkhakena vā āhareyya āyatanānaṃ vā nānattadassanavasena. Tattha **sarikkhakena** tāva visuṃ appanākkiccaṃ natthi, pāḷiyameveva appitā. **Āyatanānaṃ nānattadassanena** pana ayaṃ appanā – ahi nāmesa bahi sittasammaṭṭhe ṭhāne nābhiramati, saṅkāraṭṭhānatiṇapaṇṇagahanavammikāniyeva pana pavisitvā nipannakāle abhiramati, ekaggataṃ āpajjati. Evameva cakkhupetaṃ visamajjhāsayaṃ, maṭṭhāsu suvaṇṇabhittiādīsū nābhiramati, oloketumpi na icchati, rūpacittapupphalatādivicittesuyeva pana abhiramati. Tādisesu hi ṭhānesu cakkhumhi appahonte mukhampi vivaritvā oloketukāmo hoti.

Susumāropi bahi nikkhanto gahetabbaṃ na passati, akkhiṃ nimīletvā carati. Yadā pana byāmasatamattaṃ udakaṃ ogāhitvā bilaṃ pavisitvā nipanno hoti, tadā tassa cittaṃ ekaggaṃ hoti, sukhaṃ supati. Evameva sotampetaṃ bilajjhāsayaṃ ākāsasannissitaṃ, kaṇṇacchiddakūpakeyeva ajjhāsayaṃ karoti, kaṇṇacchiddākāsoyeva tassa saddasavane paccayo hoti. Ajaṭākāsopi vaṭṭatiyeva. Antoleṇasmiñhi sajjhāye kayiramāne na leṇacchadanaṃ bhinditvā saddo bahi nikkhamati, dvāravātapānachiddehi pana nikkhamitvā dhātuparamparā ghaṭṭento āgantvā sotapasādaṃ ghaṭṭeti. Atha tasmim kāle “asukāṃ nāma sajjhāyati”ti leṇapiṭṭhe nisinnā jānanti.

Evam sante sampattagocarātā hoti, kiṃ panetaṃ sampattagocaranti? Āma sampattagocaraṃ. Yadi evam dūre bheriādīsū vajjamānesu “dūre saddo”ti jānanaṃ na bhavyeyyāti. No na bhavati. Sotapasādasmiñhi ghaṭṭite “dūre saddo, āsanne saddo, paratīre orimatīre”ti tathā tathā jānanākāro hoti, dhammatā esāti. Kiṃ etāya dhammatāya? Yato yato chiddaṃ, tato tato savanaṃ hoti candimasūriyādīnaṃ dassanaṃ viyāti asampattagocaramevetam.

Pakkhīpi rukkhe vā bhūmiyaṃ vā na ramati. Yadā pana ekaṃ vā dve vā leḍḍupāte atikkamma ajaṭākāsaṃ pakkhando hoti, tadā ekaggacittataṃ āpajjati. Evameva ghānampi ākāsaajjhāsayaṃ



vātūpanissayagandhagocaraṃ. Tathā hi gāvo navavutṭhe deve bhūmiṃ ghāyitvā ghāyitvā ākāśābhimukho hutvā vātaṃ ākaḍḍhanti. Aṅgulīhi gandhapinḍaṃ gahetvāpi ca upasiṅghanakāle vātaṃ anākaḍḍhanto neva tassa gandhaṃ jānāti.

Kukkuropi bahi caranto khemaṭṭhānaṃ na passati, leḍḍudaṇḍādīhi upadduto hoti. Antogāmaṃ pavisitvā uddhanaṭṭhāne chārikaṃ byūhitvā nipannassa panassa phāsu hoti. Evameva jivhāpi gāmajjhāsaya āposannissitarasārammaṇā. Tathā hi tiyāmarattiṃ samaṇadhammaṃ katvāpi pātova pattacīvaramādāya gāmaṃ pavisitabbaṃ hoti. Sukkhakhādanīyassa ca na sakkā kheḷena atemitassa rasaṃ jānituṃ.

Siṅgālopi bahi caranto ratiṃ na vindati, āmakasusāne manussamaṃsaṃ khādītva nipannasseva panassa phāsu hoti. Evameva kāyopi upādiṇṇakajjhāsayo pathavīsannissitaphoṭṭhabbārammaṇo. Tathā hi aññaṃ upādiṇṇakaṃ alabhamānā sattā attanova hatthatale sīsaṃ katvā nipajjanti. Ajjhattikabāhirā cassa pathavī ārammaṇaggahaṇe paccayo hoti. Susanthatassāpi hi sayanassa heṭṭhāṭṭhitānampi vā phalakānaṃ na sakkā anisīdantena vā anuppiḷantena vā thaddhamudubhāvo jānitunti ajjhattikabāhirā pathavī etassa phoṭṭhabbajānane paccayo hoti.

Makkaṭopi bhūmiyaṃ vicaranto nābhīramati, hatthasatubbedhaṃ panassa rukkhaṃ āruya viṭapapiṭṭhe nisīditvā disāvidisā oloketasseva phāsuko hoti. Evaṃ manopi nānajjhāsayo bhavaṅgapaccayo, diṭṭhapubbepi nānārammaṇajjhāsayaṃ karotiyeva mūlabhavaṅgaṃ panassa paccayo hotīti ayamettha saṅkhepo, vitthārena pana āyatanānaṃ nānattaṃ visuddhimagge āyatananiddese vuttameva.

**Taṃ cakkhu nāvīñchatīti** taṇhārajjukānaṃ āyatanapāṇakānaṃ kāyagatāsatiṭṭhambhe baddhānaṃ nibbisevanabhāvaṃ āpannattā nākaḍḍhatīti imasmiṃ sutte pubbabhāgavipassanāva kathitā.

## 11. Yavakalāpisuttavaṇṇanā

**248.** Ekādasame **yavakalāpīti** lāyitvā ṭhapitayavapuñjo. **Byābhaṅghatthāti** kājahatthā. **Chahi byābhaṅgīhi haneyyunti** chahi puthulakājadaṇḍakehi potheyyūṃ. **Sattamoti** tesu chasu janesu yave pothetvā pasibbake pūretvā ādāya gatesu añño sattamo āgaccheyya. **Suhatarā assāti** yaṃ tattha avasiṭṭhaṃ atthi bhusapalāpamattampi, tassa gahaṇatthaṃ suṭṭhutaṃ hatā.

**Evameva khoti** ettha catumahāpatho viya cha āyatanāni daṭṭhabbāni, catumahāpathe nikkhattayavakalāpī viya satto, cha byābhaṅgiyo viya iṭṭhāniṭṭhamajjhattavasena aṭṭhārasa ārammaṇāni, sattamā byābhaṅgī viya bhavapatthanā kilesā. Yathā catumahāpathe ṭhapitā yavakalāpī chahi byābhaṅgīhi haññati, evamime sattā aṭṭhārasahi ārammaṇadaṇḍakehi chasu āyatanesu haññanti. Yathā sattamena suhatatarā honti, evaṃ sattā bhavapatthanakilesehi suhatatarā honti bhavemūlakaṃ dukkhaṃ anubhavamānā.

Idāni nesaṃ taṃ bhavapatthanakilesaṃ dassetuṃ **bhūtapubbaṃ, bhikkhavi**tiādīmāha. **Tatrāti** sudhammāyaṃ bhummaṃ, sudhammāya devasabhāya dvāreti attho. **Dhammikā kho devāti** dhammikā ete devā nāma, yehi mādisaṃ asurādhipatiṃ gahetvā mayhaṃ bhedanamattampi na katanti sandhāya vadati. **Adhammikā devāti** adhammikā ete devā nāma, ye mādisaṃ asurādhipatiṃ navagūthasūkaraṃ viya kaṇṭhapañcamehi bandhanehi bandhitvā nisīdāpentī. **Evaṃ sukhumaṃ kho, bhikkhave, vepacittibandhananti** taṃ kira padumañālasuttaṃ viya makkaṭajālasuttaṃ viya ca sukhumāṃ hoti, chettuṃ pana neva vāsiyā na pharasunā sakkā. Yasmā pana citteneva bajjhati, cittena muccati, tasmā ‘‘vepacittibandhana’’nti vuttaṃ.

**Tato sukhumataraṃ mārabandhananti** kilesabandhanaṃ panesaṃ tatopi sukhumataraṃ, neva cakkhussa āpāthaṃ gacchati, na iriyāpathaṃ nivāreti. Tena hi baddhā sattā pathavitalepi ākāsepi

yojanasatampi yojanasahassampi gacchantipi āgacchantipi. Chijjamānaṃ panetaṃ ñāṇeneva chijjati, na aññenāti “ñāṇamokkhaṃ bandhana”ntipi vuccati.

**Maññamānoti** taṇhādīṭṭhimānānaṃ vasena khandhe maññanto. **Baddho mārassāti** mārabandhanena baddho. Karaṇatthe vā etaṃ sāmivacanaṃ, kilesamārena baddhoti attho. **Mutto pāpimatoti** mārassa bandhanena mutto. Karaṇattheyeva vā idaṃ sāmivacanaṃ, pāpimatā kilesabandhanena muttoti attho.

**Asmīti** padena taṇhāmaññitaṃ vuttaṃ. **Ayamahasmīti** diṭṭhimaññitaṃ. **Bhavissanti** sassatavasena diṭṭhimaññitameva. **Na bhavissanti** ucchedavasena. **Rūpītiādīni** sassatasseva pabhedadīpanāni. **Tasmāti** yasmā maññitaṃ ābādhaṃ antodosanikantanavasena rogo ceva gaṇḍo ca sallaṅca, tasmā. **Iñjantiādīni** yasmā imehi kilesehi sattā iñjanti ceva phandanti ca papañcitā ca honti pamattākārapattā, tasmā tesam ākāradassanattaṃ vuttāni.

Mānagatavāre pana mānassa gataṃ **mānagataṃ**, mānapavattīti attho. Mānoyeva mānagataṃ gūthagataṃ muttagataṃ viya. Tattha **asmīti** idaṃ taṇhāya sampayuttamānavasena vuttaṃ. **Ayamahasmīti** diṭṭhivasena. Nanu ca diṭṭhisampayutto nāma māno natthīti? Āma natthi, mānassa pana appahīnattā diṭṭhi nāma hoti. Mānamūlakaṃ diṭṭhiṃ sandhāyetaṃ vuttaṃ. Sesam sabbattha uttānamevāti.

Āsīvisavaggo.

Catuttho paṇṇāsako.

Saḷāyatanasaṃyuttavaṇṇanā niṭṭhitā.

## 2. Vedanāsaṃyuttaṃ

### 1. Sagāthāvaggo

#### 1. Samādhisuttavaṇṇanā

249. Vedanāsaṃyutte sagāthāvaggassa paṭhame **samāhitoti** upacārena vā appanāya vā samāhito. **Vedanā ca pajānātīti** vedanā dukkhasaccavasena pajānāti. **Vedanānaṅca sambhavanti** tāsāmyeva sambhavaṃ samudayasaccavasena pajānāti. **Yattha cetāti** yatthetā vedanā nirujjhanti, taṃ nibbānaṃ nirodhasaccavasena pajānāti. **Khayagāminanti** tāsāmyeva vedanānaṃ khayagāminaṃ maggaṃ maggasaccavasena pajānāti. **Nicchāto parinibbutoti** nittaṇho hutvā kilesaparinibbānena parinibbuto. Evamettha sutte sammasanacāravedanā kathitā. Gāthāsu dvīhi padehi samathavipassanā kathitā, sesehi catusaccaṃ kathitaṃ. Evamettha sabbasaṅgāhiko catubhūmakadhammaparicchedo vutto.

#### 2. Sukhasuttavaṇṇanā

250. Dutiye **adukkhamasukhaṃ sahāti** adukkhamasukhaṅca sukhadukkhehi saha. **Ajjhattaṅca bahiddhā cāti** attano ca parassa ca. **Mosadhammanti** nassanasabhāvaṃ. **Palokinanti** palujjanakaṃ bhijjanasabhāvaṃ. **Phussa phussa vayaṃ passantī** ñāṇena phusitvā phusitvā vayaṃ passanto. **Evam tattha virajjatīti** evaṃ tāsū vedanāsū virajjati. Idhāpi sutte sammasanacāravedanā kathitā, gāthāsu ñāṇaphusaṃ.

#### 3. Pahānasuttavaṇṇanā

**251.** Tatiye **acchecchi taṇhanti** sabbampi taṇhaṃ chindi samucchindi. **Vivattayi saṃyojananti** dasavidhampi saṃyojanaṃ parivattayi nimmūlakamakāsi. **Sammāti** hetunā kāraṇena. **Mānābhisamayāti** mānassa dassanābhisamayā, pahānābhisamayā ca. Arahattamaggo hi kiccavasena mānaṃ sampassati, ayamassa dassanābhisamayo. Tena diṭṭho pana so tāvadeva pahiyati, diṭṭhavisena diṭṭhasattānaṃ jīvitam viya. Ayamassa pahānābhisamayo.

**Antamakāsi dukkhassāti** evaṃ arahattamaggena mānassa diṭṭhattā ca pahīnattā ca ye ime “kāyabandhanassa anto jīrati (cūlava. 278) haritantam vā”ti (ma. ni. 1.304) evaṃ vuttaantimamariyādanto ca, “antamidam, bhikkhave, jīvikāna”nti (itivu. 91; saṃ. ni. 3.80) evaṃ vuttalāmakanto ca, “sakkāyo eko anto”ti (a. ni. 6.61; cūḷani. tissametteyyamānavapucchānidessa 11) evaṃ vuttakoṭṭhāsanto ca, “esevanto dukkhassa sabbapaccayasāṅkhayā”ti (saṃ ni. 2.51; 2.4.71; udā. 71) evaṃ vuttakoṭṭanto cāti cattāro antā, tesu sabbasseva vaṭṭadukkhassa aduṃ catutthakoṭṭisāṅkhātāṃ antamakāsi, paricchedam parivaṭṭumam akāsi, antimasamussayamattāvasesam dukkhamakāsīti vuttam hoti.

**Sampajaññaṃ na riñcatīti** sampajaññaṃ na jahati. **Saṅkhyam nopetīti** ratto duṭṭho mūlhoti paññattim na upeti, tam paññattim pahāya khīṇāsavo nāma hotīti attho. Imasmim sutte ārammaṇanusayo kathito.

#### 4. Pātālasuttavaṇṇanā

**252.** Catutthe **pātāloti** pātassa alaṃ pariyatto, natthi ettha patiṭṭhāti **pātālo**. **Asantam avijjamānanti** asambhūtataṃ apaññāyamānattaṃ. **Evaṃ vācam bhāsati**ti atthi mahāsamudde pātāloti evaṃ vācam. So hi yaṃ tam balavāmukhaṃ mahāsamuddassa udakaṃ vegena pakkhanditvā cakkavāḷam vā sineruṃ vā āhacca yojanadvijojanadasayojanappamāṇampi uggantvā puna mahāsamudde patati, yassa patitaṭṭhāne mahānarakapapāto viya hoti, yaṃ loke balavāmukhanti vuccati. Tam sandhāya evaṃ vadati.

Yasmā pana tattha tathārūpānaṃ macchakacchapadevadānavānaṃ patiṭṭhāpi hoti sukhanivāsopi, tasmā asantam asaṃvijjamānaṃ tam tam vācam bhāsati nāma. Yasmā pana sabbaputhujjanā sārīrikāya dukkhavedanāya patiṭṭhātum na sakkonti, tasmā pātassa alanti atthena ayameva pātāloti dassento **sārīrikānaṃ kho etaṃ bhikkhavetiādīmāha**.

**Pātāle na paccuṭṭhāsīti** pātālasimam na patiṭṭhāsi. **Gādhanti** patiṭṭham. **Akkandatīti** anibaddham vipalāpaṃ vilapanto kandati. **Dubbaloti** dubbalaññaṃ. **Appathāmakoti** ñāṇathāmassa parittatāya parittathāmakoti. Imasmim sutte ariyasāvakoṭi sotāpanno. Sotāpanno hi ettha dhuraṃ, balavavipassako na tikkhābuddhi uppannaṃ vedanaṃ ananuvattivā patiṭṭhātum samattho yogāvacaropi vaṭṭati.

#### 5. Daṭṭhabbasuttavaṇṇanā

**253.** Pañcame **dukkhato daṭṭhabbāti** vipariṇāmanavasena dukkhato daṭṭhabbā. **Sallatoti** dukkhāpanavinivijjanaṭṭhena sallāti daṭṭhabbā. **Aniccatoti** adukkhamasukhā hutvā abhāvākārena aniccato daṭṭhabbā. **Addāti** addasa. **Santanti** santasabhāvaṃ.

#### 6. Sallasuttavaṇṇanā

**254.** Chaṭṭhe **tatrāti** tesu dvīsu janesu. **Anuvedham vijjheyāti** tasseva vaṇamukhassa aṅgulantare vā dvaṅgulantare vā āsannapadese anugatavedham. Evaṃ viddhassa hi sā anuvedhā vedanā paṭhamavedanāya balavatarā hoti, pacchā uppajjamānā domanassavedanāpi evameva purimavedanāya balavatarā hoti. **Dukkhāya vedanāya nissaraṇanti** dukkhāya vedanāya hi samādhimaggaḥphalāni nissaraṇam, tam so na jānāti, kāmasukhameva nissaraṇanti jānāti. **Tāsam vedanānanti** tāsam

sukhadukkhavedanānaṃ. **Saññutto naṃ vedayatīti** kilesehi sampayuttova hutvā taṃ vedanaṃ vedayati, na vippayutto. **Saññutto dukkhasmāti** karaṇatthe nissakkaṃ, dukkhena sampayuttoti attho. **Saṅkhātadhammassāti** veditadhammassa tulitadhammassa. **Bahussutassāti** pariyattibahussutassa paṭivedhabahussutassa ca. **Sammā pajānāti bhavassa pāragūti** bhavassa pāraṃ nibbānaṃ gato, tadeva nibbānaṃ sammā pajānāti. Imasmimpi sutte ārammaṇānusayova kathito. Ariyasāvakesu ca khīṇāsavo ettha dhuraṃ, anāgāmīpi vaṭṭatīti vadanti.

## 7. Paṭhamagelaṅṅasuttavaṇṇanā

**255.** Sattame yena gilānasālā tenupasaṅkamīti “sadevake loke aggapuggalo tathāgatopi gilānupaṭṭhānaṃ gacchati, upaṭṭhātabbayuttakā nāma gilānāti bhikkhū saddahitvā okappetvā gilāne upaṭṭhātabbe maññissanti”ti ca “ye tattha kammaṭṭhānasappāyā, tesam kammaṭṭhānaṃ kathessāmi”ti ca cintetvā upasaṅkami. **Kāye kāyānupassīti**ādīsu yaṃ vattabbaṃ, taṃ parato vakkhāma. **Aniccānupassīti** aniccatam anupassanto. **Vayānupassīti** vayaṃ anupassanto. **Virāgānupassīti** virāgaṃ anupassanto. **Nirodhānupassīti** nirodhaṃ anupassanto. **Paṭinissaggānupassīti** paṭinissaggaṃ anupassanto.

Ettāvatā kiṃ dassitaṃ hoti? Imassa bhikkhuno āgamanīyapaṭipadā, satipaṭṭhānāpi hi pubbhāgāyeva, sampajaññepi aniccānupassanā vayānupassanā virāgānupassanāti ca imāpi tisso anupassanā pubbhāgāyeva, nirodhānupassanāpi paṭinissaggānupassanāpi imā dve missakā. Ettāvatā imassa bhikkhuno bhāvanākālo dassitoti. Sesam vuttanayameva.

## 8-9. Dutiyagelaṅṅasuttādivaṇṇanā

**256-257.** Aṭṭhame imameva phassaṃ paṭiccāti vutte bujjanakānaṃ ajjhāsayena vuttaṃ, atthato panetaṃ ninnānākaraṇaṃ. Kāyova hi ettha phassoti vutto. Navamaṃ uttānameva.

## 10. Phassamūlakasuttavaṇṇanā

**258.** Dasame **sukhavedaniyanti** sukhavedanāya paccayabhūtaṃ. Sesesupi eseva nayo. Anupadavaṇṇanā panettha heṭṭhā vitthāritāva. Imasmim suttadvaye sammasanacāravedanā kathitā.

Sagāthāvaggo paṭhamo.

### 2. Rahogatavaggo

#### 1. Rahogatasuttavaṇṇanā

**259.** Rahogatavaggassa paṭhame yaṃ kiñci vedayitaṃ, taṃ dukkhasminti yaṃ kiñci vedayitaṃ, taṃ sabbam dukkhanti attho. **Saṅkhārānaṃyeva aniccanti**ādīsu yā esā saṅkhārānaṃ aniccataṃ khayadhammatā vayadhammatā vipariṇāmadhammatā, etaṃ sandhāya yaṃ kiñci vedayitaṃ, taṃ dukkhanti mayā bhāsanti dīpeti. Yā hi saṅkhārānaṃ aniccataṃ, vedanānampi sā aniccataṃ eva. Aniccataṃ ca nāmesā maraṇaṃ, maraṇato uttari dukkhaṃ nāma natthīti iminā adhippāyena sabbā vedanā dukkhāti vuttā. **Atha kho pana bhikkhu mayāti** idaṃ na kevalaṃ ahaṃ vedanānaṃyeva nirodhaṃ paññāpemi, imesampi dhammānaṃ nirodhaṃ paññāpemiṭi dassanattaṃ āradhaṃ. Vūpasamo ca passaddhiyo ca evarūpāya desanāya bujjanakānaṃ ajjhāsayena vuttā. Saññāvedayitanirodhaggaṇaṇena cettha cattāro āruppā gahitāva hontīti veditabbā.

## 2-3. Paṭhamaākāsasuttādivaṇṇanā

**260-261.** Dutīye **puthū vāyanti mālutāti** bahū vātā vāyanti. Sesam uttānatthamevāti. Tatiyaṃ vinā

gāthāhi bujjhantānaṃ ajjhāsayena vuttaṃ.

#### 4. Agārasuttavaṇṇanā

262. Catutthe **puratthimā**ti puratthimāya. Evaṃ sabbattha. **Sāmisāpi sukhā vedanā**tiādīsu **sāmisā sukhā** nāma kāmāmisapaṭisaṃyuttā vedanā. **Nirāmisā sukhā** nāma paṭhamajjhānādivasena vipassanāvasena anussativasena ca uppannā vedanā. **Sāmisā dukkhā** nāma kāmāmiseneva sāmisā vedanā, **nirāmisā dukkhā** nāma anuttaresu vimokkhesu pihaṃ upaṭṭhāpayato pihapaccayā uppannadomanassavedanā. **Sāmisā adukkhamasukhā** nāma kāmāmiseneva sāmisā vedanā. **Nirāmisā adukkhamasukhā** nāma catutthajjhānavasena uppannā adukkhamasukhā vedanā.

#### 5-8. Paṭhamaānandasuttādivaṇṇanā

263-266. Pañcamādīni cattāri heṭṭhā kathitanayāneva. Purimāni panettha dve paripuṇṇapassaddhikāni, pacchimāni upaḍḍhapassaddhikāni. Desanāya bujjhanakānaṃ ajjhāsayena vuttāni.

#### 9-10. Pañcakaṅgasuttādivaṇṇanā

267-268. Navame **pañcakaṅgo thapatīti pañcakaṅgoti** tassa nāmaṃ, vāsipharasunikhādanadaṇḍamuggarakālasuttanālisānkhātehi vā pañcahi aṅgehi samannāgatattā so pañcakaṅgoti paññāto. **Thapatīti** vadḍhakījeṭṭhako. **Udayīti** paṇḍitauḍāyitthero. **Pariyāyanti** kāraṇaṃ. **Dvepānandā**ti dvepi, ānanda, **pariyāyenā**ti kāraṇena. Ettha ca kāyikacetasikavasena dve veditabbā, sukhādivasena tissopi, indriyavasena sukhindriyādikā pañca, dvāravasena cakkhusamphassajādikā cha, upavicāravasena “cakkhunā rūpaṃ disvā somanassaṭṭhāniyaṃ rūpaṃ upavicarati”tiādikā aṭṭhārasa, cha gehasitāni somanassāni, cha nekkhammasitāni, cha gehasitāni domanassāni, cha nekkhammasitāni, cha gehasitā upekkhā, cha nekkhammasitāti evaṃ chattimsa. Tā atīte chattimsa, anāgate chattimsa, paccuppanne chattimsāti evaṃ aṭṭhasatam vedanā veditabbā.

**Pañcime ānanda kāmagaṇṇā**ti ayaṃ pāṭiyekko anusandhi. Na kevalaṅhi dve ādiṃ katvā vedanā bhagavatā paññattā, pariyāyena ekāpi vedanā kathitā, taṃ dassento pañcakaṅgassa thapatino vādaṃ upatthambhetuṃ imaṃ desanaṃ ārabhi. **Abhikkantataranti** sundarataraṃ. **Pañītataraṃ** atappakataraṃ. Ettha ca catutthajjhānato paṭṭhāya adukkhamasukhā vedanā, sāpi santatṭhena pañītatṭhena ca sukhanti vuttā. Nirodho avedayitasukhavasena sukhaṃ nāma jāto. Pañcakāmagaṇṇavasena hi aṭṭhasamāpattivasena ca uppannaṃ vedayitaṃ sukhaṃ nāma, nirodho avedayitasukhaṃ nāma. Iti vedayitasukhaṃ vā hotu avedayitasukhaṃ vā, niddukkhabhāvasānkhātena sukhatṭhena ekantasukhameva jātaṃ.

**Yattha yatthāti** yasmim yasmim ṭhāne. **Sukhaṃ upalabbhatī**ti vedayitaṃ sukhaṃ vā avedayitaṃ sukhaṃ vā upalabbhati. **Taṃ taṃ tathāgato sukhasmim paññapeti**, taṃ sabbam tathāgato niddukkhabhāvaṃ sukhasmimyeva paññapetīti idha bhagavā nirodhasamāpattiṃ sīsaṃ katvā neyyapuggalassa vasena arahattanikūṭeneva desanaṃ niṭṭhāpesi. Dasamaṃ uttānatthamevāti.

Rahogatavaggo dutiyo.

### 3. Aṭṭhasatapariyāyavaggo

#### 1. Sīvakasuttavaṇṇanā

269. Tatiyavagassa paṭhame **moḷiyasīvakoti sīvakoti** tassa nāmaṃ. Cūḷā panassa atthi, tasmā

moḷiyasīvakoti vuccati. **Paribbājakoti** channaparibbājako. **Pittasamuṭṭhānānīti** pittapaccayāni. **Vedayitānīti** vedanā. Tattha pittapaccayā tisso vedanā uppajjanti. Kathaṃ? Ekacco hi “pittam me kupitam dujjānam kho pana jīvita”nti dānam deti, sīlam samādiyati uposathakammaṃ karoti, evamassa kusalavedanā uppajjati. Ekacco “pittabhesajjam karissāmī”ti pānam hanati, adinnaṃ ādiyati, musā bhaṇati, dasa dussīlyakammāni karoti, evamassa akusalavedanā uppajjati. Ekacco “ettakenapi me bhesajjakaraṇena pittam na vūpasammati, alam yaṃ hoti. taṃ hotū”ti majjhatto kāyikavedanam adhivāsento nipajjati, evaṃ assa abyākatavedanā uppajjati.

**Sāmampi kho etanti** taṃ taṃ pittavikāraṃ disvā attanāpi etaṃ veditabbaṃ. **Saccasammantanti** bhūtasammataṃ. Lokopi hissa sarīre sabalavaṇṇatādipittavikāraṃ disvā “pittamassa kupita”nti jānāti. **Tasmāti** yasmā sāmāñca viditaṃ lokassa ca saccasammataṃ atidhāvanti, tasmā. **Semhasamuṭṭhānādīsupi** eseva nayo. Ettha pana **sannipātikānīti** tiṇṇampi pittādīnam kopena samuṭṭhitāni. **Utupariṇāmajānīti** visabhāgututo jātāni. Jaṅgaladesavāsīnañhi anupadesa vasantānaṃ visabhāgo utu uppajjati, anupadesavāsīnañca jaṅgaladeseti evaṃ malayasamuddatīrādivasenāpi utuvisabhāgatā uppajjatiyeva. Tato jātāti utupariṇāmajātāni nāma.

**Visamaparihārājānīti** mahābhāravahanasudhākoṭṭanādito vā avelāya carantassa sappadaṃsakūpapātādito vā visamaparihārato jātāni. **Opakkamikānīti** “ayaṃ coro vā pāradāriko vā”ti gahetvā jaṇṇukakapparamuggarādīhi nippothanaupakkamaṃ paccayaṃ katvā uppannāni. Etaṃ bahi upakkamaṃ labhitvā koci vuttanayeneva kusalam karoti, koci akusalam, koci adhivāsento nipajjati. **Kammavipākajānīti** kevalam kammavipākato, jātāni. Tesupi hi uppannesu vuttanayeneva koci kusalam karoti, koci akusalam, koci adhivāsento nipajjati. Evaṃ sabbavāresu tividhāva vedanā honti.

Tattha purimehi sattahi kāraṇehi uppannā sārīrikā vedanā sakkā paṭibāhituṃ, kammavipākajānaṃ pana sabbabhesajjānīpi sabbaparittānīpi nālam paṭighātāya. Imasmiṃ sutte lokavohāro nāma kathitoti.

## 2-10. Aṭṭhasatasuttādivaṇṇanā

**270-278.** Dutiye **aṭṭhasatapariyāyanti** aṭṭhasatassa kāraṇabhūtaṃ. **Dhammapariyāyanti** dhammakāraṇaṃ. **Kāyikā ca cetāsikā cāti** ettha kāyikā kāmāvacareyeva labbhanti, cetāsikā catubhūmikāpi. **Sukhātiādīsu** sukhā vedanā arūpāvacare natthi, sesāsu tīsu bhūmīsu labbhanti, dukkhā kāmāvacarāva, itarā catubhūmikā. Pañcake sukhindriyadukkhindriyadomanassindriyāni kāmāvacarāneva, somanassindriyaṃ tebhūmakam, upekkhindriyaṃ catubhūmakam. Chakke pañcasu dvāresu vedanā kāmāvacarāva, manodvāre catubhūmikā, aṭṭhārasake chasu iṭṭhārammaṇesu somanassena saha upavicarantīti **somanassūpavicārā**. Sesadvayepi eseva nayo. Iti ayaṃ desanā vicāravasena āgatā, taṃsampayuttānaṃ pana somanassādīnaṃ vasena idha aṭṭhārasa vedanā veditabbā.

**Cha gehasitāni somanassānīti**ādīsu “cakkhuvīññeyyānaṃ rūpānaṃ iṭṭhānaṃ kantānaṃ manāpānaṃ manoramānaṃ lokāmisapaṭisaṃyuttānaṃ paṭilābhaṃ vā paṭilābhato samanupassato pubbe vā paṭiladdhapubbaṃ atītaṃ niruddhaṃ vipariṇataṃ samanussarato uppajjati somanassaṃ. Yaṃ evarūpaṃ somanassaṃ, idaṃ vuccati gehasitaṃ somanassa”nti (ma. ni. 3.306). Evaṃ chasu dvāresu vuttakāmaguṇanissitāni somanassāni **cha gehasitasomanassāni** nāma.

“Rūpānaṃ tveva aniccatam viditvā vipariṇāmaṃ virāganīrodham ‘pubbe ceva rūpā etarahi ca, sabbe te rūpā aniccā dukkhā vipariṇāmadhammā’ti evametam yathābhūtaṃ sammappaññāya passato uppajjati somanassaṃ. Yaṃ evarūpaṃ somanassaṃ, idaṃ vuccati nekkhammasitaṃ somanassa”nti (ma. ni. 3.306) evaṃ chasu dvāresu iṭṭhārammaṇe āpāthagate aniccatādivasena vipassanaṃ paṭṭhapetvā ussukkāpetuṃ sakkontassa “ussukkitā me vipassanā”ti somanassajātassa uppannasomanassāni **cha nekkhammasitasomanassāni** nāma.

“Cakkhuvīññeyyānaṃ rūpānaṃ iṭṭhānaṃ kantānaṃ manāpānaṃ manoramānaṃ

lokāmisapaṭisaṃyuttānaṃ appaṭilābhāṃ vā appaṭilābhato samanupassato pubbe vā paṭiladdhapubbāṃ atītaṃ niruddhaṃ vipariṇātaṃ samanussarato uppajjati domanassaṃ. Yaṃ evarūpaṃ domanassaṃ, idaṃ vuccati gehasitaṃ domanassa”nti. Evaṃ chasu dvāresu “iṭṭhārammaṇaṃ nānubhavissāmi nānubhavāmi”ti vitakkayato uppannāni kāmagaṇanissitadomanassāni **cha gehasitadomanassāni** nāma.

“Rūpānaṃ tveva aniccataṃ viditvā vipariṇānavirāganīrodhaṃ ‘pubbe ceva rūpā etarahi ca, sabbe te rūpā aniccā dukkhā vipariṇāmadhammā’ti evametaṃ yathābhūtaṃ sammappaññāya disvā anuttaresu vimokkhesu pihaṃ upaṭṭhāpeti ‘kudāssu nāmāhaṃ tadāyatanāṃ upasampajja viharissāmi, yadariyā etarahi āyatanāṃ upasampajja viharanti’ti. Iti anuttaresu vimokkhesu pihaṃ upaṭṭhāpayato uppajjati pihapaccayā domanassaṃ. Yaṃ evarūpaṃ domanassaṃ, idaṃ vuccati nekkhammasitaṃ domanassanti; evaṃ chasu dvāresu iṭṭhārammaṇe āpāthagate anuttaravimokkhasaṅkhātaariyaphaladhammesu pihaṃ upaṭṭhāpetvā tadadhigamāya aniccātādivasena vipassanaṃ paṭṭhāpetvā ussukkāpetuṃ asakkontassa “imampi pakkhaṃ imampi māsaṃ imampi saṃvaccharaṃ vipassanaṃ ussukkāpetvā ariyabhūmiṃ pāpuṇituṃ nāsakkhi”nti anusocato uppannāni domanassāni **cha nekkhammasitadomanassāni** nāma.

“Cakkhunā rūpaṃ disvā uppajjati upekkhā bālassa mūlhasa puthujjanassa anodhijinassa avipākajinassa anādīnavadassāvino assutavato puthujjanassa. Yā evarūpā upekkhā, rūpaṃ sā nātivattati, tasmā sā upekkhā gehasitāti vuccatī”ti; evaṃ chasu dvāresu iṭṭhārammaṇe āpāthagate guḷapiṇḍake nilīnamakkhikā viya rūpādīni anativattamānā tattheva laggā laggitā hutvā uppannakāmagaṇanissitā upekkhā **cha gehasitaupekkhā** nāma.

“Rūpānaṃ tveva aniccataṃ viditvā vipariṇānavirāganīrodhaṃ pubbe ceva rūpā etarahi ca, ‘sabbe te rūpā aniccā dukkhā vipariṇāmadhammā’ti evametaṃ yathābhūtaṃ sammappaññāya passato uppajjati upekkhā. Yā evarūpā upekkhā, rūpaṃ sā ativattati, tasmā sā upekkhā nekkhammasitāti vuccatī”ti; evaṃ chasu dvāresu iṭṭhādiārammaṇe āpāthagate iṭṭhe arajjantassa anitṭhe adussantassa asamapekkhane amuyhantassa uppannā vipassanāññasampayuttā upekkhā **nekkhammasitaupekkhā** nāma. Imasmiṃ sutte sabbasaṅgāhako catubhūmakadhammaparicchedo kathito. Tatiyādīni uttānatthāneva.

## 11. Nirāmisasuttavaṇṇanā

279. Ekādasame **sāmisāti** kilesāmisena sāmisā. **Nirāmisatarāti** nirāmisāyapi jhānapītiyā nirāmisatarāva. Nanu ca dvīsu jhānesu pīti mahaggaṭāpi hoti lokuttarāpi, paccavekkhaṇapīti lokiyāva, sā kasmā nirāmisatarā jātāti? Santapaṇītadhammapaccavekkhaṇavasena uppannattā. Yathā hi rājavallabho cūḷupaṭṭhāko appaṭihārikaṃ yathāsukhaṃ rājakulaṃ pavisanto seṭṭhisenāpatiādayo pādena paharantopi na gaṇeti. Kasmā? Rañño āsannaparicārakattā. Iti so tehi uttaritaro hoti, evamayampi santapaṇītadhammapaccavekkhaṇavasena uppannattā lokuttarapītitopi uttaritarāti veditabbā. Sesavāresupi eseva nayo.

Vimokkhavāre pana rūpapaṭisaṃyutto vimokkho attano ārammaṇabhūtena rūpāmisavaseneva sāmisō nāma, arūpapaṭisaṃyutto rūpāmisābhāvena nirāmisō nāmāti.

Vedanāsaṃyuttavaṇṇanā niṭṭhitā.

## 3. Mātugāmasaṃyuttaṃ

### 1. Paṭhamapeyyālavaggo

#### 1-2. Mātugāmasuttādivaṇṇanā

**280-281.** Mātugāmasaṃyuttassa paṭhame **aṅgehīti** aguṇaṅgehi. **Na ca rūpavāti** na rūpasampanno virūpo duddasiko. **Na ca bhogavāti** na bhogasampanno niddhano. **Na ca silavāti** na silasampanno dussīlo. **Alaso cāti** kantanapacanādīni kammāni kātuṃ na sakkoti, kusīto ālasiyo nisinnaṭṭhāne nisinnova, ṭhitathāne ṭhitova niddāyati eva. **Pajañcassa na labhatīti** assa purisassa kulavamsapatiṭṭhāpakam puttam na labhati, vañjhitthī nāma hoti. Sukkapakkho vuttavipariyāyena veditabbo. Dutiyam paṭhame vuttanayeneva parivattetabbam.

### 3. Āveṇikadukkhasuttavaṇṇanā

**282.** Tatiye **āveṇikānīti** pāṭipuggalikāni purisehi asādhāraṇāni. **Pāricariyanti** paricārikabhāvaṃ.

### 4. Tīhidhammehisuttādivaṇṇanā

**283-303.** Catutthe **maccheramalapariyuṭṭhitenāti** pubbaṇhasamayasmañhi mātugāmo khīradadhisaṅgopananarandhanapacanādīni kātuṃ āraddho, puttakehipi yāciyamāno kiñci dātuṃ na icchati. Tenetaṃ vuttaṃ “pubbaṇhasamayam maccheramalapariyuṭṭhitena cetasā”ti. Majjhanhikasamaye pana mātugāmo kodhābhībhūtova hoti, antoghare kalahaṃ alabhanto paṭivissakagharampi gantvā kalahaṃ karoti, sāmikassa ca ṭhitanisinnaṭṭhānāni vilokento vicarati. Tena vuttaṃ “majjhanhikasamayam issāpariyuṭṭhitena cetasā”ti. Sāyanhe panassā asaddhammapaṭisevanāya cittaṃ namati. Tena vuttaṃ “sāyanhasamayam kāmarāgapariyuṭṭhitena cetasā”ti. Pañcamādīni uttānatthāneva.

### 3. Balavaggo

#### 1. Visāradasuttavaṇṇanā

**304.** Dasame **rūpabalantiādīsu** rūpasampatti **rūpabalaṃ**, bhogasampatti **bhogabalaṃ**, ñātisampatti **ñātibalaṃ**, puttasampatti **puttabalaṃ**, silasampatti **silabalaṃ**. Pañcasīladasasīlāni akhaṇḍāni katvā rakkhantassa hi silasampattiyeva silabalaṃ nāma hoti. **Imāni kho bhikkhave pañca balānīti** imāni pañca upatthambhanaṭṭhena balāni nāma vuccanti.

#### 2-10. Pasayhasuttādivaṇṇanā

**305-313.** **Pasayhāti** abhibhavitvā. **Abhibhuyya vattatīti** abhibhavati ajjhottharati. **Neva rūpabalaṃ tāyatīti** neva rūpabalaṃ tāyituṃ rakkhituṃ sakkoti. **Nāsenteva naṃ, kule na vāsentīti** “dussīlā saṃbhinnācārā atikkantamariyādā”ti gīvāyam gahetvā nīharanti, na tasmim kule vāsenti. **Vāsenteva naṃ kule, na nāsentīti** “kiṃ rūpena bhogādīhi vā, parisuddhasīlā esā ācārasampannā”ti ñatvā ñatakā tasmim kule vāsentiyeva, na nāsenti. Sesam sabbattha uttānatthamevāti.

Mātugāmasaṃyuttavaṇṇanā niṭṭhitā.

## 4. Jambukhādakasamṃyuttaṃ

### 1. Nibbānapañhāsuttavaṇṇanā

**314.** Jambukhādakasamṃyutte **jambukhādako paribbājakoti** evaṃnāmo therassa bhāgineyyo channaparibbājako. **Yo kho āvuso rāgakkhayoti** nibbānaṃ āgamma rāgo khīyati, tasmā nibbānaṃ rāgakkhayoti vuccati. **Dosamohakkhayesupi** eseva nayo.

Yo pana imināva suttena kilesakkhayamattaṃ nibbānanti vadeyya, so vattabbo “kassa kilesānaṃ



khayo, kiṃ attano, udāhu pasesa’nti? Addhā “attano”ti vakkhati. Tato pucchitabbo “gotrabhuñāṇassa kiṃ ārammaṇa’nti? Jānamāno “nibbāna’nti vakkhati. Kiṃ pana gotrabhuñāṇakkhaṇe kilesā khīṇā khīyanti khīyissantīti? “Khīṇā”ti vā “khīyantī”ti vā na vattabbā, “khīyissantī”ti pana vattabbāti. Kiṃ pana tesu akhīṇesuyeva kilesesu gotrabhuñāṇaṃ kilesakkhayaṃ ārammaṇaṃ karotīti? Addhā evaṃ vutte niruttaro bhavissati.

Maggañāṇenāpi cetam yojettabbaṃ. Maggakkhaṇepi hi kilesā “khīṇā”ti vā “khīyissantī”ti vā na vattabbā, “khīyantī”ti pana vattabbā, na ca akhīṇesuyeva kilesesu kilesakkhayaṃ ārammaṇaṃ hoti, tasmā sampaṭicchitabbametaṃ. Yaṃ āgamma rāgādayo khīyanti, taṃ nibbānaṃ. Taṃ panetaṃ “rūpino dhammā arūpino dhammā”tiādīsu (dha. sa. dukamātikā 11) dukesu arūpino dhammāti saṅgahitattā na kilesakkhayaṃmattamevāti.

## 2. Arahattapañhāsuttavaṇṇanā

315. Arahattapañhabyākaraṇe yasmā arahattaṃ rāgadosamohānaṃ khīṇante uppajjati, tasmā “rāgakkhayaṃ dosakkhayaṃ mohakkhayaṃ”ti vuttaṃ.

### 3-15. Dhammavādīpañhāsuttādivaṇṇanā

316-328. **Te loke sugatāti** te rāgādayo pahāya gatattā suṭṭhu gatāti sugatā. **Dukkhasa kho āvuso pariññatthanti** vaṭṭadukkhasa pariññanattaṃ. **Dukkhatāti** dukkhasabhāvo. **Dukkhadukkhatāti**tiādīsu dukkhasaṅkhāto dukkhasabhāvo dukkhadukkhatā. Sesapadadvayepi eseva nayo.

## 16. Dukkarapañhāsuttavaṇṇanā

329. **Abhiratīti** pabbajjāya anukkaṇṭhanatā. **Naciraṃ āvusoti** āvuso dhammānudhammappaṭipanno bhikkhu “pāto anusitṭho sāyaṃ visesamadhigamissati, sāyaṃ anusitṭho pāto visesamadhigamissati”ti (ma. ni. 2.345) vuttattā ghaṭento vāyamanto nacirassaṃ lahuyeva arahaṃ assa, arahatte patiṭṭhaheyyāti dasseti. Sesam sabbattha uttānatthamevāti.

Jambukhādakasamṃyuttavaṇṇanā niṭṭhitā.

## 5. Sāmaṇḍakasamṃyuttavaṇṇanā

330-331. Sāmaṇḍakasamṃyuttepi imināva nayena attho veditabbo.

Sāmaṇḍakasamṃyuttavaṇṇanā niṭṭhitā.

## 6. Moggallānasamṃyuttaṃ

### 1-8. Paṭhamajjhānapañhāsuttādivaṇṇanā

332-339. Moggallānasamṃyutte **kāmasahagatāti** pañcanīvaraṇasahagatā. Tassa hi paṭhamajjhānavuṭṭhitassa pañca nīvaraṇāni santato upaṭṭhahimsu. Tenassa taṃ paṭhamajjhānaṃ hānabhāgiyaṃ nāma ahoṣi. Taṃ pamādaṃ ñatvā satthā “mā pamādo”ti ovādaṃ adāsi. Dutiyajjhānādīsopi imināva nayena attho veditabbo. Ārammaṇasahagatameva hettha “sahagata”nti vuttaṃ.

## 9. Animittapañhāsuttavaṇṇanā

**340. Animittam cetosamādhinti** niccanimittādīni pahāya pavattam vipassanāsamādhimyeva sandhāyetaṃ vuttanti. **Nimittānusāri viññāṇam hotīti** evaṃ iminā vipassanāsamādhivihārena viharato vipassanāñāṇe tikkhe sūre vahamāne. Yathā nāma purisassa tikkiṇena pharasunā rukkham chindantassa “suṭṭhu vata me pharasu vahatī” ti khaṇe khaṇe pharasudhāram oloketassa chejjakiccaṃ na nipphajjati, evaṃ therassāpi “sūram vata me hutvā ñāṇam vahatī” ti vipassanam ārabba nikanti uppajjati. Atha vipassanākiccaṃ sādhetum nāsakkhi. Tam sandhāya vuttam “nimittānusāri viññāṇam hotī” ti. **Sabbanimittānam amanasikārā animittam cetosamādhim upasampajja vihāsinti** sabbesaṃ nicasukhaattanimittānam amanasikārena animittam vuṭṭhānagāminivipassanāsampayuttaṃ cetosamādhim nibbānārammaṇam uparimaggaphalasaṃdhim upasampajja vihāsim.

## 10-11. Sakkasuttādivaṇṇanā

**341-342. Aveccappasādenāti** acalappasādena. **Dasahi ṭhānehīti** dasahi kāraṇehi. **Adhigaṇhantīti** abhibhavanti, atikkamitvā tiṭṭhanti. Sesam sabbattha uttānatthamevāti.

Moggallānasamuyuttavaṇṇanā niṭṭhitā.

## 7. Cittasamuyuttaṃ

### 1. Saṃyojanasuttavaṇṇanā

**343. Cittasamuyuttassa paṭhame macchikāsaṇḍeti** evaṃnāmake vanasaṇḍe. **Ayamantarākathā udapādīti** porāṇakattherā atiracchānakathā hontī, nisinnanisinnaṭṭhāne pañham samuṭṭhāpetvā ajānantā pucchanti, jānantā vissajjenti, tena nesam ayaṃ kathā udapādi. **Migapathakanti** evaṃnāmakam attano bhogagāmaṃ. So kira ambātakārāmassa piṭṭhibhāge hoti. **Tenupasaṅkamīti** “therānam pañham vissajjetvā phāsuvihāram katvā dassāmī” ti cintetvā upasaṅkami. **Gambhīre buddhavacaneti** atthagambhīre ceva dhammagambhīre ca buddhavacane. **Paññācakkhu kamatīti** ñāṇacakkhu vahati pavattati.

### 2. Paṭhamaisidattasuttavaṇṇanā

**344. Dutiye āyasmantaṃ theranti** tesu theresu jeṭṭhakaṃ mahātheraṃ. **Tuṇhī ahoṣīti** jānantopi avisāradattā na kiñci byāhari. **Byākaromahaṃ bhanteti** “ayaṃ thero neva attanā byākaroti, na aññe ajjhesati, upāsakopi bhikkhusaṅgham viheseti, ahametaṃ byākaritvā phāsuvihāram katvā dassāmī” ti cintetvā āsanato vuṭṭhāya therassa santikaṃ gantvā evaṃ okāsamakāsi, katāvakaṃ pana attano āsane nisīditvā byākāsi.

**Sahatthāti** sahatthena. **Santappesīti** yāvadicchakaṃ dento suṭṭhu tappesi. **Sampavāresīti** “alam ala” nti hatthasaññāya ceva vācāya ca paṭikkhipāpesi. **Onītapattapāṇinoti** pāṇito apanītapattā dhovitvā thavikāya osāpetvā aṃse laggitapattāti attho.

### 3. Dutiyaaisidattasuttavaṇṇanā

**345. Tatiye avantiyāti** dakkhiṇāpathe avantiraṭṭhe. **Kalyāṇam vuccatīti** “catūhi paccayehi paṭijaggissāmī” ti vacanam niddosaṃ anavajjam vuccati tayā upāsakāti adhippāyena vadati.

### 4. Mahakapāṭihāriyasuttavaṇṇanā

**346. Catutthe sesakam vissajjethāti** tassa kira therehi saddhimyeva kaṃsathālam pamajjitvā pāyasaṃ vaḍḍhetvā adamsu. So bhuttapāyāso therehiyeva saddhim gantukāmo cintesi “ghare tāva

upāsikā sesakaṃ vicāreti, idha panime dāsakammakārā mayā avuttā na vicāressanti, evāyaṃ pañītapāyāso nassissatī”ti tesam anujānanto evamāha. **Kuthitanti** kudhitam, heṭṭhā santattāya vālikāya upari ātapaṇa ca atitikhiṇanti attho. Idaṃ pana tepiṭake buddhavacane asambhinnapadaṃ. **Paveliyamānenāti** paṭilīyamānena **sādhu khvassa bhanteti** “phāsuvihāraṃ karissāmi nesa”nti cintevā evamāha.

**Iddhābhisāṅkhāraṃ abhisāṅkharīti** adhiṭṭhāniddhiṃ akāsi. Ettha ca “mandamando sītakavāto vāyatu, abbhamaṇḍapaṃ katvā devo ekamekaṃ phusāyatū”ti evaṃ nānāparikammaṃ – “savāto devo vassatū”ti evaṃ adhiṭṭhānaṃ ekatopi hoti. “Savāto devo vassatūti ekatoparikammaṃ, mandamando sītakavāto vāyatu, abbhamaṇḍapaṃ katvā devo ekamekaṃ phusāyatū”ti evaṃ nānāadhiṭṭhānaṃ hoti. Vuttanayeneva nānāparikammaṃ nānādhiṭṭhānaṃ, ekato parikammaṃ ekato adhiṭṭhānampi hotiyeva. Yathā tathā karontassa pana pādakajjhānato vuṭṭhāya kataparikammaṃ parikammānantarena mahaggataadhiṭṭhānacitteneva taṃ ijjhati. **Okāsesīti** vippakiri.

### 5. Paṭhamakāmaḥsuttavaṇṇanā

**347.** Pañcame **nelaṅgoti** niddoso. **Setapacchādoti** setapaṭicchādano. **Anīghanti** niddukkhaṃ. **Muhuttaṃ tuṇhī hutvāti** tassa atthapekkhanatthaṃ tīṇi piṭakāni kaṇṇe kuṇḍalaṃ viya sañcāleno “ayaṃ imassa attho, ayaṃ imassa attho”ti upaparikkhanatthaṃ muhuttaṃ tuṇhī hutvā. **Vimuttiyāti** arahattaphalavimuttiyā. Imaṃ pana pañhaṃ kathento upāsako dukkaraṃ akāsi. Sammāsambuddho hi “passatha no tumhe, bhikkhave, etaṃ bhikkhuṃ āgacchantam odātaṃ tanukaṃ tuṅganāsika”nti (saṃ. nī. 2.245) attano diṭṭhena kathesi. Ayaṃ pana nayaggāhena “arahato etaṃ adhivacana”nti āha.

### 6. Dutiyakāmaḥsuttavaṇṇanā

**348.** Chaṭṭhe **kati nu kho bhante saṅkhārāti** ayaṃ kira, gahapati, nirodhaṃ valañjeti, tasmā “nirodhapādaḥ saṅkhāre pucchissāmī”ti cintevā evamāha. Theropissa adhippāyaṃ ñatvā puññābhisāṅkhārādīsu anekesu saṅkhāresu vijjamānesupi kāyasāṅkhārādayova ācikkhanto **tayo kho gahapatīti**ādīmāha. Tattha kāyappaṭibaddhattā kāyena saṅkharīyati nibbattiyatīti **kāyasāṅkhāro**. Vācāya saṅkharoti nibbattetīti **vacīsaṅkhāro**. Cittappaṭibaddhattā cittaena saṅkharīyati nibbattiyatīti **cittasaṅkhāro**.

**Katamo pana bhanteti** idha kiṃ pucchati? “Ime saṅkhārā aññamaññaṃ missā āluḷitā avibhūtā duddīpanā. Tathā hi kāyadvāre ādānaggahaṇamuñcanacopanāni pāpetvā uppannā aṭṭha kāmāvacarakusalacetanā dvādasa akusalacetanāti evaṃ kusalākusalā vīsati cetanāpi, assāsapassāsāpi **kāyasāṅkhārotveva** vuccanti. Vacīdvāre hanusañcapanam vacībhedaṃ pāpetvā uppannā vuttappakārāva vīsati cetanāpi vitakkavicārāpi **vacīsaṅkhārotveva** vuccanti. Kāyavacīdvāresu copanam apatvā raho nisinnassa cintayato uppannā kusalākusalā ekūnatimsacetanāpi, saññā ca vedanā cāti ime dve dhammāpi **cittasaṅkhārotveva** vuccanti. Evaṃ ime saṅkhārā aññamaññaṃ missā āluḷitā avibhūtā duddīpanā, te pākaṭe vibhūte katvā kathāpessāmī”ti pucchi.

**Kasmā pana bhanteti** idha kāyasāṅkhārādīnamassa padatthaṃ pucchati. Tassa vissajjane **kāyappaṭibaddhāti** kāyanissitā. Kāye sati hontī, asatī na hontī. **Cittappaṭibaddhāti** cittanissitā. Citte sati hontī, asatī na hontī.

Idāni “kiṃ nu kho esa saññāvedayitanirodhaṃ valañjeti, no valañjeti, ciṇṇavasī vā tattha no ciṇṇavasī”ti jānanatthaṃ pucchanto **kathaṃ pana bhante saññāvedayitanirodhasamāpatti hotīti** āha. Tassa vissajjane **samāpajjissanti** vā **samāpajjāmīti** vā padadvayena nevasaññānāsaññāyatanasamāpattikālo kathito. **Samāpannoti** padena antonirodho. Tathā purimehi dvīhi padehi sacittakakālo kathito, pacchimena acittakakālo.

**Pubbeva tathā cittaṃ bhāvitaṃ hotīti** nirodhasamāpattito pubbe addhānaparicchedakāleyeva “**ettakaṃ kālaṃ acittako bhavissāmī**”ti addhānaparicchedaṃ cittaṃ bhāvitaṃ hoti. **Yaṃ taṃ tathattāya upanetīti** yaṃ pana evaṃ bhāvitaṃ cittaṃ, taṃ puggalaṃ tathattāya acittakabhāvāya upaneti. **Vacīsaṅkhāro paṭhamam nirujjhatīti** sesasaṅkhārehi paṭhamam dutiyajjhāneyeva nirujjhati. **Tato kāyasaṅkhāro** tato paraṃ kāyasaṅkhāro catutthajjhāne nirujjhati. **Tato cittasaṅkhāro** tato paraṃ cittasaṅkhāro antonirodhe nirujjhati. **Āyūti rūpajīvitindriyaṃ. Viparibhinnānīti** upahatāni vīnaṭṭhāni.

Tattha keci “nirodhasamāpanna ‘cittasaṅkhāro ca niruddho’ti vacanato cittaṃ aniruddhaṃ hoti, tasmā sacittakāpi ayaṃ samāpattī”ti vadanti. Te vattabbā – “vacīsaṅkhāropissa niruddho”ti vacanato vācā aniruddhā hoti, tasmā nirodhasamāpanna dhammampi kathentena sajjhāyampi karontena nisīditabbaṃ siyā. Yo cāyaṃ mato kālaṅkato, tassāpi cittasaṅkhāro niruddhoti vacanato cittaṃ aniruddhaṃ bhaveyya, tasmā kālaṅkate mātāpitaro vā arahante vā jhāpentena ānantariyakammaṃ kataṃ bhaveyya. Iti byañjane abhinivesaṃ akatvā ācariyānaṃ naye ṭhatvā attho upaparikkhitabbo. Attho hi paṭisaraṇaṃ, na byañjanaṃ.

**Indriyāni vippasannānīti** kiriyamayapavattasmiñhi vattamāne bahiddhārammaṇesu pasāde ghaṭṭentesu indriyāni kilamanti, upahatāni makkhittāni viya honti vātādīhi uṭṭhitarajena catumahāpathe ṭhapitāādāso viya. Yathā pana thavikāya pakkhipivā mañjūsādīsu ṭhapito ādāso antoyeva virocati, evaṃ nirodhasamāpanna bhikkhuno antonirodhe pañca pasādā ativiya virocanti. Tena vuttaṃ “indriyāni vippasannānī”ti.

**Vuṭṭhahissanti vā vuṭṭhahāmīti** vā padadvayena antonirodhakālo kathito, **vuṭṭhitoti** padena phalasaṃpattikālo. Tathā purimehi dvīhi padehi acittakakālo kathito, pacchimena sacittakakālo. **Pubbeva tathā cittaṃ bhāvitaṃ hotīti** nirodhasamāpattito pubbe addhānaparicchedakāleyeva “**ettakaṃ kālaṃ acittako hutvā** tato paraṃ sacittako bhavissāmī”ti addhānaparicchedaṃ cittaṃ bhāvitaṃ hoti. **Yaṃ taṃ tathattāya upanetīti** yaṃ evaṃ bhāvitaṃ cittaṃ, taṃ puggalaṃ tathattāya sacittakabhāvāya upaneti. Iti heṭṭhā nirodhasamāpajjannakālo gahito, idha nirodhato vuṭṭhānakālo.

Idāni nirodhakathaṃ kathetuṃ kāloti nirodhakathā kathetabbā siyā. Sā panesā “dvīhi balehi samannāgatattā tayo ca saṅkhārānaṃ paṭipassaddhiyā soḷasahi nāṇacariyāhi navahi samādhicariyāhi vasībhāvātāpaññā nirodhasamāpattiyā nāṇa”nti mātikaṃ ṭhapetvā sabbākārena visuddhimagge kathitā, tasmā tattha kathitanayeneva gahetabbā. Ko panāyaṃ nirodho nāma? Catunnaṃ khandhānaṃ paṭisaṅkhā appavatti. Atha kimatthametaṃ samāpajjantīti? Saṅkhārānaṃ pavatte ukkaṅṭhitā sattāhaṃ acittakā hutvā sukhaṃ viharissāma, diṭṭhadhammanibbānaṃ nāmetaṃ yadidaṃ nirodhoti etadatthaṃ samāpajjanti.

**Cittasaṅkhāro paṭhamam uppajjatīti** nirodhā vuṭṭhahantassa hi phalasaṃpatticittaṃ paṭhamam uppajjati. Taṃsampayuttaṃ saññañca vedanañca sandhāya “cittasaṅkhāro paṭhamam uppajjatī”ti āha. **Tato kāyasaṅkhāro** tato paraṃ bhavaṅgasamaye kāyasaṅkhāro uppajjati.

Kim pana phalasaṃpatti assāsapassāse na samuṭṭhāpetīti? Samuṭṭhāpeti. Imassa pana catutthajjhānikā phalasaṃpatti, sā na samuṭṭhāpeti. Kim vā etena? Phalasaṃpatti paṭhamajjhānikā vā hotu dutiyatatiyacatutthajjhānikā vā, santasaṃpattito vuṭṭhitassa bhikkhuno assāsapassāsā abbohārikā honti, tesam abbohārikabhāvo **sañjīvattheravatthunā** veditabbo. Sañjīvattherassa hi samāpattito vuṭṭhāya kiṃsukapupphasadise vītaccitaṅgāre maddamānassa gacchato cīvare aṃsumattampi na jhāyi, usmākāramattampi nāhosi. Samāpattibalaṃ nāmetanti vadanti. Evameva santāya phalasaṃpattiyā vuṭṭhitassa bhikkhuno assāsapassāsā abbohārikā hontīti bhavaṅgasamayenevetam kathitanti veditabbaṃ.

**Tato vacīsaṅkhāro** tato paraṃ kiriyamayapavattavalañjanakāle vacīsaṅkhāro uppajjati. Kim bhavaṅgaṃ vitakkavicāre na samuṭṭhāpetīti? Samuṭṭhāpeti. Taṃsamuṭṭhānā pana vitakkavicārā vācaṃ abhisāṅkhātuṃ na sakkontīti kiriyamayapavattavalañjanakālenevetam kathitaṃ.

**Suññato phassoti**ādāyo saḡuṇenāpi ārammaṇenāpi kathetabbā. **Saḡuṇena** tāva suññatā nāma phalasaṁpatti, tāya saḡajātapḡassaṁ sandhāya “suññato phasso”ti vuttaṁ. Animittappaṇihitesupi eseva nayo. **Ārammaṇena** pana nibbānaṁ rāḡādāhi suññatā suññatā nāma, rāḡanimittādānaṁ abhāvā animittaṁ, rāḡadosamohappaṇidhānaṁ abhāvā appaṇihitaṁ, suññataṁ nibbānaṁ ārammaṇaṁ katvā uppānaphalasaṁpattisaṁphasso suññato nāma. Animittappaṇihitesupi eseva nayo.

Aparā āḡamaniyakathā nāma hoti. Suññataanimittaappaṇihitāti hi vipassanāpi vuccati. Tattha yo bhikkhu saṅkhāre aniccatō pariggahetvā aniccatō disvā aniccatō vuṭṭhāti, tassa vuṭṭhānaḡāminivipassanā animittā nāma hoti. Yo dukkhato pariggahetvā dukkhato disvā dukkhato vuṭṭhāti, tassa appaṇihitā nāma. Yo anattato pariggahetvā anattato disvā anattato vuṭṭhāti, tassa suññatā nāma. Tattha animittavipassanāya magḡo animitto nāma, animittamagḡassa phalaṁ animittaṁ nāma, animittaphalasaṁpattisaḡajāte phasse phusante “animitto phasso phusati”ti vuccati. Appaṇihitasuññatesupi eseva nayo. Āḡamaniyena kathite pana suññato vā phasso animitto vā phasso appaṇihito vā phassoti vikappo āpajjeyya, tasmā saḡuṇena ceva ārammaṇena ca kathetabbāṁ. Evaṁhi tayo phassā phusantīti sameti.

**Vivekaninna**ntiādāsu nibbānaṁ viveko nāma. Tasmīṁ viveke ninnaṁ onatanti vivekaninnaṁ. **Viveka**poṇanti aññato aḡantvā yena viveko, tena vaṅkaṁ viya hutvā ṭṭhitaṁti vivekaḡoṇaṁ. Yena viveko, tena patamānaṁ viya ṭṭhitaṁti **viveka**pabbhāraṁ.

## 7. Godattasuttavaṅḡanā

**349.** Sattame **nānattā ceva nānābyañjanā cāti** byañjanaṁpi nesaṁ nānaṁ, atthopi. Tattha byañjanaṁ nānatā pākaṭā. Attho pana appamāṇā cetovimutti bhūmantarato mahagḡatā hoti rūpāvacaṛā, ārammaṇato sattapaṇṇattīārammaṇā. Ākiṅcaññā bhūmantarato mahagḡatā arūpāvacaṛā, ārammaṇato navattabbārammaṇā. Suññatā bhūmantarato kāmāvacaṛā, ārammaṇato saṅkhārārammaṇā. Vipassanā hi ettha suññatāti adhippetā. Animittā bhūmantarato lokuttarā, ārammaṇato nibbānārammaṇā.

**Rāḡo kho bhante pamāṇakaraṇoti**ādāsu yathā pabbatapāde pūtipaṇṇakasaṭaḡaudakaṁ nāma hoti kālavaṅḡaṁ, olokaṅtānaṁ byāmasataḡambhīraṁ viya khāyati, yaṭṭhiṁ vā rajjūṁ vā gaḡetvā minantassa piṭṭhipādottharaṇaṁattampi na hoti; evameva yāva rāḡādāyo nuppajjanti, tāva puḡḡalaṁ saṅḡānitūṁ na sakkā hoti, sotāpanno viya sakadāḡāṁi viya anāḡāṁi viya ca khāyati. Yādā panassa rāḡādāyo uppajjanti, tadā ratto duṭṭho mūḡhoti paññāyati. Iti te “ettako aya”nti puḡḡalassa pamāṇaṁ dassentāva uppajjantīti pamāṇakaraṇā nāma vuttā.

**Yāvatā kho bhante appamāṇā cetovimuttiyoti** yattakā appamāṇā cetovimuttiyo. Kittakā pana tā? Cattāro brahmavihārā, cattāro magḡā, cattāri phalaṅnīti dvādasa. Tatra brahmavihārā pharaṇaappamāṇatāya appamāṇā, sesā pamāṇakāraḡanaṁ kilesānaṁ abhāvena nibbānaṁpi appamāṇameva, cetovimutti pana na hoti, tasmā na gaḡitaṁ. **Akuppāti** arahattaphalacetovimutti. Sā hi tāsāṁ sabbajēṭṭhikā, tasmā “aḡḡamaḡkhāyati”ti vuttā. **Rāḡo kho bhante kiṅcaṅanti** rāḡo uppajjitvā puḡḡalaṁ kiṅcāti maddati palibundhati, tasmā kiṅcaṅanti vutto. Manussā kira goṅchi khalāṁ maddāpentā “kiṅcehi kapila kiṅcehi kālaka”ti vadanti. Evaṁ maddanaṭṭho kiṅcaṅaṭṭhoti veditabbo. **Dosamo**hesupieseva nayo.

**Ākiṅcaññā cetovimuttiyo** nāma nava dhammā ākiṅcaññāyatanaṁ magḡaphalaṅi ca. Tattha ākiṅcaññāyatanaṁ kiṅcaṅaṁ ārammaṇaṁ assa natthīti **ākiṅcaññāṁ**. Magḡaphalaṅi kiṅcaṅanaṁ maddanaḡalibundhanakilesānaṁ natthitāya ākiṅcaññāni, nibbānaṁpi ākiṅcaññāṁ, cetovimutti pana na hoti, tasmā na gaḡitaṁ.

**Rāḡo kho bhante nimittakaraṇoti**ādāsu yathā nāma dvinnaṁ kulānaṁ sadisā dve vacchakā honti. Yāva tesāṁ lakkhaṇaṁ na kataṁ hoti, tāva “ayaṁ asukakulassa vacchako, ayaṁ asukakulassā”ti na

sakkā hoti jānituṃ. Yadā pana tesaṃ tisulādīsu aññataraṃ lakkhaṇaṃ kataṃ hoti, tadā sakkā hoti jānituṃ. Evameva yāva puggalassa rāgo nuppajjati, tāva na sakkā hoti jānituṃ “ariyo vā puthujjano vā”ti. Rāgo panassa uppajjamānova “sarāgo nāma ayaṃ puggalo”ti saññānananimittaṃ karonto viya uppajjati, tasmā nimittakaraṇoti vutto. **Dosamohesupi** eseva nayo.

**Animittā cetovimuttiyo** nāma terasa dhammā vipassanā, cattāro āruppā, cattāro maggā, cattāri phalāni. Tattha vipassanā niccanimittaṃ sukhanimittaṃ attanimittaṃ ugghāṭetīti **animittā** nāma. Cattāro āruppā rūpanimittassa abhāvā animittā nāma. Maggaphalāni nimittakarānaṃ kilesānaṃ abhāvena animittāni, nibbānampi animittameva, taṃ pana cetovimutti na hoti, tasmā na gahitaṃ. Atha kasmā suññatā cetovimutti na gahitāti? Sā “suññā rāgenā”tiādivacanato sabbattha anupaviṭṭhāva, tasmā visuṃ na gahitāti.

**Ekattāti** ārammaṇavasena ekattā “appamāṇaṃ ākiñcaññaṃ suññataṃ animitta”nti hi sabbānetāni nibbānasseva nāmāni. Iti iminā pariyāyena ekattā. Aññasmiṃ pana ṭhāne appamāṇāpi hoti, aññasmiṃ ākiñcaññā, aññasmiṃ suññatā, aññasmiṃ animittāti iminā pariyāyena nānābyañjanāti.

## 8. Nigaṇṭhanāṭaputtasuttavaṇṇanā

**350.** Aṭṭhame **tenupasaṅkamīti** sayam āgatāgamo viññātasāsano anāgāmī ariyasāvako samāno kasmā naggabhoggaṃ nissirikaṃ nigaṇṭhaṃ upasaṅkamīti? Upavādamocanattaṃhañceva vādāropanattaṃhañca. Nigaṇṭhā kira “samaṇassa gotamassa sāvakaṃ thaddhakhadirakhāṇukasadisā, kenaci saddhiṃ paṭisanthārampi na karontī”ti upavadanti, tassa upavādassa mocanattaṃhañca, “vādañcassa āropessāmī”ti upasaṅkami. **Na khvāhaṃ ettha bhante bhagavato saddhāya gacchāmīti** yassa ñāṇena asacchikataṃ hoti. So “evaṃ kireta”nti aññassa saddhāya gaccheyya, mayā pana ñāṇenetam sacchikataṃ, tasmā nāhaṃ ettha bhagavato saddhāya gacchāmīti dīpento evamāha.

**Ulloketvāti** kāyaṃ unnāmetvā kucchiṃ nīharitvā gīvaṃ paggayha sabbaṃ disaṃ pekkhamāno ulloketvā. **Bādhetabbaṃ maññeyyāti** yathā vinivijjhivā na nikkhamati, evaṃ paṭibāhitabbaṃ maññeyya bandhitabbaṃ vā. **Sahadhammikāti** sakāraṇā. **Atha maṃ paṭihareyyāsi saddhiṃ nigaṇṭhāparisāyāti** etesaṃ atthe ñāte atha me nigaṇṭhāparisāya saddhiṃ abhigaccheyyāsi, paṭihārassa me santikaṃ āgantvā attano āgatabhāvaṃ jānāpeyyāsīti attho. **Eko pañhoti** eko pañhamaggo, ekaṃ pañhagavesananti attho. **Eko uddesoti** ekaṃ nāma kinti? Ayaṃ eko uddeso. **Ekaṃ veyyākaraṇanti** “sabbe sattā āhāraṭṭhitikā”ti (khu. pā. 4.1; a. ni. 10.27) idaṃ ekaṃ veyyākaraṇaṃ. Evaṃ sabbattha attho veditabbo.

## 9. Acelakassapasuttavaṇṇanā

**351.** Navame **kīvaciraṃ pabbajitassāti** kīvaciro kālo pabbajitassāti attho. **Uttari manussadhammāti** manussadhammo nāma dasakusalakammapathā, tato manussadhammato uttari. **Alamariyaññadassanavisesoti** ariyabhāvaṃ kātuṃ samatthātāya alamariyoti sañkhāto ññadassanaviseso. **Naggeyyāti** naggabhāvato. **Muṇḍeyyāti** muṇḍabhāvato. **Pavāḷanipphoṭanāyāti** pavāḷanipphoṭanato, bhūmiyaṃ nisīdantassa ānisadaṭṭhāne laggānaṃ paṃsurajavālikānaṃ phoṭanattaṃ gahitamorapiñchamattatoti attho.

## 10. Gilānadassanasuttavaṇṇanā

**352.** Dasame **ārāmadevatāti** pupphārāmaphalārāmesu adhivatthā devatā. **Vanadevatāti** vanasaṇḍesu adhivatthā devatā. **Rukkhadevatāti** mattarājakāle vessavaṇo ca devatāti evaṃ tesu tesu rukkhesu adhivatthā devatā. **Osadhitiṇavanappatisūti** haritakāmalakādīsu muñjapabbajādīsu vanajeṭṭharukkhesu ca adhivatthā devatā. **Samgammāti** sannipativā. **Samāgammāti** tato tato samāgantvā. **Papīdhehīti** patthanāvasena ṭhāpehi. **Ijjhissati sīlavato cetopaṇidhīti** samijjhissati

sīlavantassa cittapatthanā. **Dhammikoti** dasakusaladhammasamannāgato agatigamanarahito. **Dhammarājāti** tasseva vevacanāṃ, dhammena vā laddharajjattā dhammarājā. **Tasmāti** “yasmā tena hi, ayyaputta, amhepi ovaḍāhī”ti vadatha, tasmā. **Appaṭivibhattanti** “idaṃ bhikkhūnaṃ dassāma, idaṃ attanā bhuñjissāma”ti evaṃ avibhattaṃ bhikkhūhi saddhiṃ sādharānameva bhavissatīti.

Cittasaṃyuttavaṇṇanā niṭṭhitā.

## 8. Gāmaṇisaṃyuttaṃ

### 1. Caṇḍasuttavaṇṇanā

**353.** Gāmaṇisaṃyuttassa paṭhame **caṇḍo gāmaṇīti** dhammasaṅgāhakattherehi caṇḍoti gahitanāmo eko gāmaṇi. **Pātukarotīti** bhaṇḍantaṃ paṭibhaṇḍanto akkosantaṃ paccakkosanto paharantaṃ paṭipaharanto pākaṭaṃ karotīti dasseti. **Na pātukarotīti** akkuṭṭhopi pahaṭopi kiñci paccanīkaṃ akarontoti dasseti.

### 2. Tālapuṭasuttavaṇṇanā

**354.** Dutiye **tālapuṭoti** evaṃnāmakō. Tassa kira bandhanā pamuttatālapakkavaṇṇo viya mukhavaṇṇo vipasanno ahosi, tenassa tālapuṭoti nāmaṃ akaṃsu. Svāyaṃ abhinīhārasampanno pacchimabhavikapuggalo. Yasmā pana paṭisandhi nāma aniyatā ākāse khittadaṇḍasadisā, tasmā esa naṭakule nibbatti. Vuḍḍhippatta pana naṭasippe aggo hutvā sakalajambudīpe pākaṭo jāto. Tassa pañca sakaṭasatāni pañca mātugāmasatāni parivāro, bhariyāyapissa tāvatakāvāti mātugāmasahassena ceva sakaṭasahassena ca saddhiṃ yaṃ yaṃ nagaraṃ vā nigamaṃ vā pavisati, tatthassa puretameva satahassamaṃ denti. Samajjavesaṃ gaṇhitvā pana mātugāmasahassena saddhiṃ kīlaṃ karontassa yaṃ hatthūpagapādūpagādiābharaṇajātamaṃ khipanti, tassa pariyaṇto natthi. So taṃdivasaṃ mātugāmasahassaparivārito rājagahe kīlaṃ katvā paripakkañāṇattā saparivārova yena bhagavā tenupasaṅkami.

**Saccālikenāti** saccena ca alikena ca. **Tiṭṭhatetanti** tiṭṭhatu etaṃ. **Rajanīyāti** rāgappaccayā mukhato pañcavaṇṇasuttanīharaṇavātavuṭṭhidassanādayo aññe ca kāmassādasamūttākāradassanakā abhinayā. **Bhiyyosomattāyāti** adhikappamāṇattāya. **Dosanīyāti** dosappaccayā hatthapādachedādidassanākārā. **Mohanīyāti** mohappaccayā udakaṃ gahetvā telakaraṇaṃ, telaṃ gahetvā udakakaraṇanti evamādayo māyāpabhedā.

**Pahāso nāma nirayoti** visuṃ pahāsanāmakō nirayo nāma natthi, avīcisseva pana ekasmiṃ koṭṭhāse naccantā viya gāyantā viya ca naṭavesaṃ gahetvāva paccanti, taṃ sandhāyetaṃ vuttaṃ. **Nāhaṃ, bhante, etaṃ rodāmīti** ahaṃ, bhante, etaṃ bhagavato byākaraṇaṃ na rodāmīti evaṃ sakammakavasenettha attho veditabbo, na assuvimocanamattena. “Matamaṃ vā ammarodanti”tiādayo cettha aññepi vohārā veditabbā.

### 3-5. Yodhājīvasuttādivaṇṇanā

**355-357.** Tatiye **yodhājīvoti** yuddhena jīvikaṃ kappanako dhammasaṅgāhakattherehi evaṃ gahitanāmo. **Ussahati vāyamatīti** ussāhaṃ vāyamaṃ karoti. **Pariyāpādentīti** maraṇaṃ paṭipajjāpentī. **Dukkaṭanti** duṭṭhu kataṃ. **Duppaṇihanti** duṭṭhu ṭhapitaṃ. **Parajito nāma nirayoti** ayampi na visuṃ eko nirayo, avīcisseva pana ekasmiṃ koṭṭhāse pañcāvudhasannaddhā phalakahatthā hatthiassarathe āruya saṅgāme yujjhantā viya paccanti, taṃ sandhāyetaṃ vuttaṃ. Catutthapañcomesupi eseva nayo.

### 6. Asibandhakaputtasuttavaṇṇanā

**358.** Chaṭṭhe **pacchābhūmakāti** pacchābhūmivāsino. **Kāmaṇḍalukāti** sakamaṇḍaluno. **Sevālamālikāti** pātova udakato sevālañceva uppalādīni ca gahetvā udakasuddhikabhāvajānanatthāya mālaṃ katvā piḷandhanakā. **Udakorohakāti** sāyampātaṃ udakaṃ orohanakā. **Uyyāpentīti** upari yāpenti. **Saññāpentīti** sammā ñāpenti. **Saggaṃ nāma okkāmentīti** parivāretvā ʔhitā “gaccha, bho, brahmalokaṃ, gaccha, bho, brahmaloka”nti vadantā saggaṃ pavesenti. **Anuparisakkeyyāti** anuparigaccheyya. **Ummujjāti** ummujja utṭhaha. **Thalamuplavāti** thalamabhiruha. **Tatra yāssāti** tatra yā bhaveyya. **Sakkharā vā kaṭhalā vāti** sakkharā ca kaṭhalā ca. **Sā adhogāmī assāti** sā adho gaccheyya, heṭṭhāgāmī bhaveyya. **Adhogacchāti** heṭṭhā gaccha.

## 7. Khettūpamasuttavaṇṇanā

**359.** Sattame **jaṅgalanti** thaddhaṃ na mudu. **Ūsaranti** sañjātaḷoṇaṃ. **Pāpabhūmīti** lāmakabhūmibhāgaṃ. **Maṃḍipāti**ādīsu ahaṃ dīpo patiṭṭhā etesanti maṃḍipā. Ahaṃ leṇo allīyanaṭṭhānaṃ etesanti **maṃleṇā**. Ahaṃ tāṇaṃ rakkhā etesanti **maṃtāṇā**. Ahaṃ saraṇaṃ bhayaṇāsaṇaṃ etesanti **maṃsaraṇā**. **Viharantīti** maṃ evaṃ katvā viharanti.

**Gobhattampīti** dhaññaphalassa abhāvena lāyitvā kalāpakalāpaṃ bandhitvā ʔapitaṃ gimhakāle gunnaṃpi khādanaṃ bhavissatīti attho. **Udakamaṇikoti** kucchiyaṃ maṇikamekhalāya evaṃ laddhanāmo bhājanaviseso. **Ahārī aparihārīti** udakaṃ na harati na pariharati, na pariyādiyatīti attho. Iti imasmiṃ sutte sakkaccadhammadesanāva kathitā. Buddhānañhi asakkaccadhammadesanā nāma natthi. Sīhasamānavuttino hi buddhā, yathā sīho pabhinnavaravāraṇassapi sasabīlārādīnaṃpi gahaṇatthāya ekasadisameva veḡaṃ karoti, evaṃ buddhāpi ekassa desentāpi dvinnaṃ bahūnaṃ bhikkhuparisāya bhikkhuniupāsakaupāsikāparisāyapi titthiyānaṃpi desentā sakkaccameva desenti. Catasso pana parisā saddahitvā okappetvā suṇantīti tāsāṃ desanā sakkaccadesanā nāma jātā.

## 8. Saṅkhadhamasuttavaṇṇanā

**360.** Aṭṭhame **yambahulaṃ yambahulanti** iminā nigaṇṭho attanāva attano vādaṃ bhindati. Tasmā bhagavā **evaṃ sante na koci āpāyikoti**ādīmāha. Purimāni pana cattāri padāni diṭṭhiyā paccayā honti. Tasmā tesupī ādīnavāṃ dassento **idha, gāmaṇi, ekacco satthā evaṃvādī hotīti**ādīmāha. Tattha **ahampambhīti** ahampi amhi.

**Mettāsahagatenāti**ādīsu yaṃ vattabbaṃ, taṃ sabbaṃ saddhiṃ bhāvanāyena visuddhimagge vuttameva. **Seyyathāpi, gāmaṇi, balavā saṅkhadhamoti**ādī pana idha apubbaṃ. Tattha **balavāti** balasampanno. **Saṅkhadhamoti** saṅkhadhamako. **Appakasirenāti** akicchena adukkheṇa. Dubbalo hi saṅkhadhamo saṅkhaṃ dhamantopi na sakkoti catasso disā sareṇa viññāpetuṃ, nāssa saṅkhasaddo sabbato pharati, balavato pana vipphāriko hoti, tasmā “balavā”ti āha.

**Mettāya cetovimuttiyāti** ettha “mettā”ti vutte upacāropi appanāpi vaṭṭati, “cetovimuttī”ti vutte pana appanāva vaṭṭati. **Yaṃ pamāṇakataṃ kammanti** pamāṇakataṃ kammaṃ nāma kāmāvacaraṃ vuccati, appamāṇakataṃ kammaṃ nāma rūpāvacaraṃ. Tañhi pamāṇaṃ atikkamitvā odhisakaanodhisakadisāpharaṇavasena vaḍḍhetvā katattā appamāṇakatanti vuccati.

**Na taṃ tatrāvasissati, na taṃ tatrāvatiṭṭhatīti** taṃ kāmāvacarakammaṃ tasmim rūpārūpāvacarakamme na ohīyati na tiṭṭhati. Kiṃ vuttaṃ hoti? Taṃ kāmāvacarakammaṃ tassa rūpārūpāvacarakammassa antarā laggituṃ vā ʔhātuṃ vā rūpārūpāvacarakammaṃ pharitvā pariyādiyitvā attano okāsaṃ gahetvā patiṭṭhātuṃ vā na sakkoti. Atha kho rūpārūpāvacarakammameva kāmāvacaraṃ mahogho viya parittaṃ udakaṃ pharitvā pariyādiyitvā attano okāsaṃ katvā tiṭṭhati, tassa vipākaṃ paṭibāhitvā sayameva brahmasahabyataṃ upanetīti. Iti idaṃ suttaṃ ādimhi kilesavasena vuṭṭhāya avasāne brahmavihāravasena gahitattā yathānusandhināva gataṃ.



## 9. Kulassuttavaṇṇanā

**361.** Navame **dubbhikkhā**ti dullabhabhikkhā. **Dvīhitikā**ti “jīvissāma nu kho na nu kho”ti evaṃ pavattāhitikā. “Duhitikā”tipi pāṭho. Ayameva attho. Dukkā ṭhiti ettha na sakkā koci payogo sukkena kātunti **duhitikā**. Tattha tattha matamanussānaṃ vippakiṇṇāni setāni aṭṭhikāni etthāti **setaṭṭhikā**. **Salākāvuttā**ti salākamattavuttā, yaṃ tattha vuttaṃ vāpitaṃ, taṃ salākamattameva ahosi, phale na janayātīti attho.

**Uggilitunti** dve ante mocetvā kathetuṃ asakkonto uggilituṃ bahi nīharituṃ na sakkhīti. **Ogilitunti** pucchāya dosaṃ disvā hāretuṃ asakkonto ogilituṃ anto pavesetuṃ na sakkhīti.

**Ito so gāmaṇi ekanavutikappeti** bhagavā kathayamānova yāva nikkhanto nāsikavāto na puna pavisati, tāvatakena kālena ekanavutikappe anussari “atthi nu kho kiñci kule pakkabhikkhādānena upahatapubba”nti pariṇānantaṃ. Athekampi apassanto “ito so, gāmaṇi”tiādimāha. Idāni dānādīnaṃ ānisaṃsaṃ kathento **atha kho yāni tāni kulāni aḍḍhānīti** dhammadesanaṃ ārabhi. Tattha **dānasambhūtānīti** dānena sambhūtāni nibbattāni. Sesapadadvayepi eseva nayo. Ettha pana **saccaṃ nāma** saccavādītā. **Sāmaññaṃ nāma** sesasīlaṃ. **Vikiratīti** ayogena vaḷaṅjento vippakirati. **Vidhamatīti** dhamento viya nāseti. **Viddhamsetīti** nāseti. **Aniccatāti** hutvā abhāvo bahunāpi kālena saṅgatānaṃ khaṇeṇeva antaradhānaṃ.

## 10. Maṇicūḷakasuttavaṇṇanā

**362.** Dasame **taṃ parisam etadvocāti** tassa kira evaṃ ahosi “kulaputtā pabbajantā puttadārañceva jātarūparajatañca pahāyeva pabbajanti, na ca sakkā yaṃ pahāya pabbajitā, taṃ tehi gahetu”nti nayaggāhe ṭhatvā “mā ayyo”tiādivacanaṃ avoca. **Ekamsenetanti** etaṃ pañcakāmaguṇakappaṇaṃ assamaṇadhammo asakyaputtiyadhammoti ekamsena dhāreyyāsi.

**Tiṇanti** senāsanaḥchadanatiṇaṃ. **Pariyesitabbanti** tiṇacchadane vā iṭṭhakacchadane vā gehe palujjante yehi taṃ kāritaṃ, tesam santikaṃ gantvā “tumhehi kāritasenāsanaṃ ovassati, na sakkā tattha vasitu”nti ācikkhitabbaṃ. Manussā sakkontā karissanti, asakkontā “tumhe vaḍḍhakim gahetvā kārapetha, mayaṃ te saññāpessāmā”ti vakkhanti. Evaṃ vutte kāretvā tesam ācikkhitabbaṃ. Manussā vaḍḍhakīnaṃ dātābbaṃ dassanti. Sace āvāsasāmikā natthi, aññesampi bhikkhācāravattena ārocetvā kāretuṃ vaṭṭati. Idaṃ sandhāya “pariyesitabba”nti vuttaṃ.

**Dārunti** senāsane gopānasiādīsū palujjamānesu tadatthāya dāruṃ. **Sakaṭanti** gihivikataṃ katvā tāvakālikasakaṭaṃ. Na kevalaṅca sakaṭameva, aññampi vāsipharasukuddālādiupakaraṇaṃ evaṃ pariyesituṃ vaṭṭati. **Purisoti** hatthakammavasena puriso pariyesitabbo. Yaṃkiñci hi purisaṃ “hatthakammaṃ, āvuso, katvā dassasī”ti vatvā “dassāmi, bhante,”ti vutte “idañcidañca karohī”ti yaṃ icchati, taṃ kāretuṃ vaṭṭati. **Na tvevāhaṃ, gāmaṇi, kenaci pariyaṇenāti** jātarūparajataṃ panāhaṃ kenacipi kāraṇena pariyesitabbanti na vadāmi.

## 11. Bhadrakasuttavaṇṇanā

**363.** Ekādasame **mallesūti** evaṃnāmake janapade. **Vadhenāti** māraṇena. **Jāniyāti** dhanajāniyā. **Ākālikena pattenāti** na kālantarena pattena, kālaṃ anatikkamitvāva pattenāti attho. **Ciravāsī nāma kumāroti** evaṃnāmake tassa putto. **Bahi āvasathe paṭivasatīti** bahinagare kiñciveva sippaṃ uggaṇhanto vasati. Imasmiṃ sutte vaṭṭadukkhaṃ kathitaṃ.

## 12. Rāsiyasuttavaṇṇanā

**364.** Dvādasame **rāsiyoti** rāsiṃ katvā pañhassa pucchitattā rāsiyoti evaṃ dhammasaṅgāhakattherehi gahitanāmo. **Tapassinti** tapanissitakaṃ. **Lūkhajivinti** lūkhajīvikakaṃ. **Antāti** koṭṭhāsā. **Gāmoti** gāmmo. Gammotipi pāṭho, gāmaṃvāsīnaṃ dhammoti attho. **Attakilamathānuyogoti** attano kilamathānuyogo, sarīradukkhakaraṇanti attho.

Kasmā panettha kāmasukhallikānuyogo gahito, kasmā attakilamathānuyogo, kasmā majjhimā paṭipadāti? Kāmasukhallikānuyogo tāva kāmabhogīnaṃ dassanattamaṃ gahito, attakilamathānuyogo tapanissitakānaṃ, majjhimā paṭipadā tiṇṇaṃ nijjaravatthūnaṃ dassanattamaṃ gahitā. Kiṃ etesaṃ dassane payojananti? Ime dve ante pahāya tathāgato majjhimāya paṭipadāya sammāsambodhiṃ patto. So kāmabhoginopi na sabbe garahati na pasamsati, tapanissitakepi na sabbe garahati na pasamsati, garahitabbayuttakeyeva garahati, pasamsitabbayuttake pasamsatīti imassatthassa pakāsaṇaṃ etesaṃ dassane payojananti veditabbaṃ.

Idāni tamattamaṃ pakāseto **tayo khome, gāmaṇi, kāmabhoginoti**ādimāha. Tattha **sāhasenāti** sāhasikakammena. **Na saṃvibhajātīti** mittasahāyasandiṭṭhasambhattānaṃ saṃvibhāgaṃ na karoti. **Na puññāni karotīti** anāgatabhavassa paccayabhūtāni puññāni na karoti. **Dhammādhammenāti** dhammena ca adhammena ca. **Ṭhānehīti** kāraṇehi. **Sacchikarotīti** kathaṃ attānaṃ ātāpento paritāpento sacchikaroti? Caturaṅgavīriyavasena ca dhutaṅgavasena ca. **Tisso sandiṭṭhikā nijjarāti** ettha ekopi maggo tiṇṇaṃ kilesānaṃ nijjaraṇatāya tisso nijjarāti vuttoti.

### 13. Pāṭaliyasuttavaṇṇanā

**365.** Terasame **dūteyyānīti** dūtakammāni paṇṇāni ceva mukhasāsanāni ca. **Pāṇātipātañcāhanti** idaṃ kasmā āradhamaṃ? Na kevalaṃ ahaṃ māyaṃ jānāmi, aññampi idañcidañca jānāmīti sabbaññubhāvadassanattamaṃ āradhamaṃ. **Santi hi, gāmaṇi, eke samaṇabrāhmaṇāti** idaṃ sesasamaṇabrāhmaṇānaṃ laddhiṃ dassetvā tassā pajahāpanattamaṃ āradhamaṃ.

**Mālī kuṇḍalīti** mālāya mālī, kuṇḍalehi kuṇḍalī. **Itthikāmeḥīti** itthīhi saddhiṃ kāmā itthikāmā, tehi itthikāmehi. **Āvasathāgāranti** kulagharassa ekasmiṃ ṭhāne ekekasseva sukhanivāsattāya kataṃ vāsāgāraṃ. **Tenāhaṃ yathāsatti yathābalaṃ saṃvibhajāmīti** tassāhaṃ attano sattianurūpena ceva balānurūpena ca saṃvibhāgaṃ karomi. **Alanti** yuttaṃ. **Kaṅkhaniye ṭhāneti** kaṅkhitaḥ kāraṇe. **Cittasamādhinti** tasmiṃ dhammasamādhismiṃ ṭhito tvaṃ saha vipassanāya catunnaṃ maggānaṃ vasena cittasamādhim sace paṭilabheyyāsīti dasseti. **Apaṇṇakatāya mayhanti** ayaṃ paṭipadā mayhaṃ apaṇṇakatāya anaparādhakatāya eva saṃvattatīti attho. **Kaṭaggāhoti** jayaggāho.

**Ayaṃ kho, gāmaṇi, dhammasamādhī, tatra ce tvaṃ cittasamādhim paṭilabheyyāsīti** ettha **dhammasamādhīti** dasakusalakammamapathadhammā, **cittasamādhīti** saha vipassanāya cattāro maggā. Atha vā “pāmojjaṃ jāyati, pamuditassa pīti jāyati” ti (a. ni. 5.26) evaṃ vuttā pāmojjapītipassaddhisukhasamādhisaṅkhātā pañca dhammā dhammasamādhī nāma, cittasamādhī pana saha vipassanāya cattāro maggāva. Atha vā dasakusalakammamapathā cattāro brahmavihārā cāti ayaṃ dhammasamādhī nāma, taṃ dhammasamādhim pūrentassa uppannā cित्तेkaggatā cittasamādhī nāma. **Evaṃ tvaṃ imaṃ kaṅkhādhammaṃ pajaheyyāsīti** evaṃ tvaṃ imasmiṃ vuttappabhede dhammasamādhismiṃ ṭhito sace evaṃ cittasamādhim paṭilabheyyāsīti, ekaṃsenetaṃ kaṅkhaṃ pajaheyyāsīti attho. Sesāṃ sabbattha vuttanayamevāti.

Gāmaṇisaṃyuttavaṇṇanā niṭṭhitā.

## 9. Asaṅkhatasaṃyuttaṃ

### 1. Paṭhamavaggo

## 1-11. Kāyagatāsatisuttādivaṇṇanā

**366-376.** Asaṅkhatasaṃyutte **asaṅkhatanti** akataṃ. **Hitesināti** hitaṃ esantena. **Anukampakenāti** anukampamānena. **Anukampaṃ upādāyāti** anukampaṃ cittena pariggahetvā, paṭiccātipi vuttaṃ hoti. **Kataṃ vo taṃ mayāti** taṃ mayā imaṃ asaṅkhatāṅca asaṅkhatamaggaṅca desentena tumhākaṃ kataṃ. Ettakameva hi anukampakassa satthu kiccaṃ, yadidaṃ aviparītadhammadesanā. Ito paraṃ pana paṭipatti nāma sāvakaṇaṃ kiccaṃ. Tenāha **etāni, bhikkhave, rukkhamūlāni...pe... amhākaṃ anusāsanīti** iminā rukkhamūlasenāsanāṃ dasseti. **Suññāgārānīti** iminā janavivittaṃ ṭhānaṃ. Ubhayena ca yogānurūpaṃ senāsanāṃ ācikkhati, dāyajjaṃ niyyātetī.

**Jhāyathāti** ārammaṇūpaniṃjhānena aṭṭhatimsārammaṇāni, lakkhaṇūpaniṃjhānena ca aniccādito khandhāyatanādīni upaniṃjhāyatha, samathaṅca vipassanaṅca vaḍḍhethāti vuttaṃ hoti. **Mā pamādatthāti** mā pamajjīṭṭha. **Mā pacchā vippaṭṭisārino ahuvatthāti** ye hi pubbe daharakāle arogakāle sattasappāyādisampattikāle satthu sammukhībhāvakāle ca yonisomanasikārahitā rattindivaṃ maṅkulabhattaṃ hutvā seyyasukhaṃ middhasukhaṃ anubhontā pamajjanti, te pacchā jarākāle rogakāle maraṇakāle vipattikāle satthu parinibbutakāle ca taṃ pubbe pamādavihāraṃ anussarantā sappaṭṭisandhikālakiriyaṅca bhāriyaṃ sampassamānā vippaṭṭisārino honti. Tumhe pana tādīsā mā ahuvatthāti dassento āha “mā pacchā vippaṭṭisārino ahuvatthā”’ti.

**Ayaṃ vo amhākaṃ anusāsanīti** ayaṃ amhākaṃ santikā “jhāyatha mā pamādatthā”’ti tumhākaṃ anusāsanī, ovādoti vuttaṃ hoti.

## 2. Dutiyavaggo

### 1-33. Asaṅkhatasuttādivaṇṇanā

**377-409.** Kāye kāyānupassītiādīsu yaṃ vattabbaṃ, taṃ parato vakkhāma.

**Anatantiādīsu** taṇhānatiyā abhāvena anataṃ. Catunnaṃ āsavānaṃ abhāvena **anāsavaṃ**. Paramatthasaccatāya **saccaṃ**. Vaṭṭassa parabhāgaṭṭhena **pāraṃ**. Saṅhaṭṭhena **nipuṇaṃ**. Suṭṭhu duddasatāya **sududdasaṃ**. Jarāya ajaritattā **ajajjaraṃ**. Thiraṭṭhena **dhuvaṃ**. Apalujjanatāya **apalokitaṃ**. Cakkhuviññāṇena apassitabbattā **anidassanaṃ**. Taṇhāmānadiṭṭhipapañcānaṃ abhāvena **nippapañcaṃ**.

Santabhāvaṭṭhena **santaṃ**. Maraṇābhāvena **amataṃ**. Uttamaṭṭhena **paṇītaṃ**. Sassirikaṭṭhena **sivaṃ**. Nirupaddavatāya **khemamaṃ**. Taṇhākkhayassa paccayattā **taṇhakkhayaṃ**.

Vimhāpanīyaṭṭhena accharaṃ paharitabbayuttakanti **acchariyaṃ**. Abhūtameva bhūtaṃ ajātaṃ hutvā atthīti vā **abbhutaṃ**. Niddukkhattā **anītikaṃ**. Niddukkhasabhāvattā **anītikadhammaṃ**. Vānābhāvena **nibbānaṃ**. Byābajjhābhāveneva **abyābajjhaṃ**. Virāgādhigamassa paccayato **virāgaṃ**. Paramatthasuddhitāya **suddhi**. Tīhi bhavehi muttatāya **mutti**. Kāmālayānaṃ abhāvena **anālayaṃ**. Patiṭṭhaṭṭhena **dīpaṃ**. Allīyitabbayuttatṭhena **leṇaṃ**. Tāyanaṭṭhena **tānaṃ**. Bhayasaraṇaṭṭhena **saraṇaṃ**, bhayanāsananti attho. Paraṃ ayanāṃ gati patiṭṭhāti **parāyaṇaṃ**. Sesamettha vuttanayaṃevāti.

Asaṅkhatasaṃyuttavaṇṇanā niṭṭhitā.

## 10. Abyākatasamāyuttaṃ

### 1. Khemāsuttavaṇṇanā

**410.** Abyākatasaṃyuttassa paṭhame **khemāti** gihikāle bimbisārassa upāsikā saddhāpabbajitā mahātherī “etadaggaṃ, bhikkhave, mama sāvikanāṃ bhikkhunīnaṃ mahāpaññānaṃ yadidaṃ khemā” ti evaṃ bhagavatā mahāpaññatāya etadagge ṭhapitā. **Paṇḍitāti** paṇḍiccena samannāgatā. **Viyattāti** veyyattiyena samannāgatā. **Medhāvinīti** medhāya paññāya samannāgatā. **Bahussutāti** pariyaṭṭibāhusaccenapi paṭivedhabāhusaccenapi samannāgatā.

**Gaṇakoti** acchiddakagaṇanāya kusalo. **Muddikoti** aṅgulimuddāya gaṇanāya kusalo. **Saṅkhāyakoti** piṇḍagaṇanāya kusalo. **Gambhīroti** caturāsītiyojanasahassagambhīro. **Appameyyoti** āḷhakagaṇanāya appameyyo. **Duppariyogāhoti** āḷhakagaṇanāya pamāṇagahaṇatthaṃ durogāho. **Yena rūpena tathāgatanti** yena rūpena dīgho rasso sāmo odātoti sattasaṅkhātāṃ tathāgataṃ paññapeyya. **Taṃ rūpaṃ tathāgatassa pahīnanti** taṃ vuttappakārarūpaṃ samudayappahānena sabbaññutathāgatassa pahīnaṃ. **Rūpasāṅkhāya vimuttoti** āyatiṃ rūpassa anuppattiyā rūpārūpakoṭṭhāsenapi evarūpo nāma bhavissatīti vohārassapi paṭipassaddhattā rūpapaṇṇattiyāpi vimutto. **Gambhīroti** ajjhāsaya gambhīratāya ca guṇagambhīratāya ca gambhīro. Tassa evaṃ guṇagambhīrassa sato sabbaññutathāgatassa yaṃ upādāya sattasaṅkhāto tathāgatoti paññatti hoti, tadabhāvena tassā paññattiyā abhāvaṃ passantassa ayaṃ sattasaṅkhāto **hoti tathāgato paraṃ maraṇāti** idaṃ vacanaṃ na upeti na yujjati, **na hoti tathāgato paraṃ maraṇāti**ādivacanaṃ na upeti na yujjatīti attho.

**Samsandissatīti** ekaṃ bhavissati. **Samessatīti** nirantaraṃ bhavissati. **Na virodhayissatīti** na viruddhaṃ padaṃ bhavissati. **Aggapadasminti** desanāya. Desanā hi idha aggapadanti adhippetā.

## 2. Anurādhasuttavaṇṇanā

**411.** Dutiyaṃ **khandhiyavagge** vitthāritameva, abyākatādihikārato pana idha vuttaṃ.

## 3-8. Paṭhamasāriputtakoṭṭhikasuttādivaṇṇanā

**412-417.** Tatiye **rūpagatametanti** rūpamattametaṃ. Ettha rūpato añño koci satto nāma na upalabbhati, rūpe pana sati nāmamattaṃ etaṃ hotīti dasseti. **Vedanāgatametanti**ādisupi eseva nayo. **Ayaṃ kho āvuso hetūti** ayaṃ rūpādīni muñcivā anupalabbhiyasabhāvo hetu, yenetāṃ abyākatāṃ bhagavatāti. Catutthādīni uttānatthāneva.

## 9. Kutūhalasālāsuttavaṇṇanā

**418.** Navame **kutūhalasālāyanti** kutūhalasālā nāma paccekasālā natthi, yattha pana nānātittiyā samaṇabrāhmaṇā nānāvidhaṃ kathaṃ pavattenti, sā bahūnaṃ “ayaṃ kiṃ vadati, ayaṃ kiṃ vadatī” ti kutūhaluppavattitṭhānato kutūhalasālāti vuccati. **Dūrampi gacchatīti** yāva ābhassarabrahmalokā gacchati. **Imañca kāyaṃ nikkhipatīti** cuticittena nikkhipati. **Anupapanno hotīti** cutikkhaṇeyeva paṭisandhicittassa anuppannattā anupapanno hoti.

## 10. Ānandasuttavaṇṇanā

**419.** Dasame **tesametaṃ saddhiṃ abhavissāti** tesāṃ laddhiyā saddhiṃ etaṃ abhavissa. **Anulomaṃ abhavissa nāṇassa uppādāya sabbe dhammā anattāti** yaṃ etaṃ “sabbe dhammā anattā” ti vipassanāñānaṃ uppajjati, api nu me tassa anulomaṃ abhavissāti attho.

## 11. Sabhiyakaccānasuttavaṇṇanā

**420.** Ekādasame **etamettakena ettakamevāti** āvuso yassāpi etaṃ ettakena kālena “hetumhi sati rūpītiādi paññāpanā hoti, asati na hotī” ti byākaraṇaṃ bhavēyya, tassa ettakameva bahu. **Ko pana vādo**

**atikkanteti** atikkante pana atimanāpe dhammadesanānaye vādoyeva ko, natthi vādo, chinnā kathāti.

Abyākatasam̐yuttavaṇṇanā niṭṭhitā.

Iti sārathhappakāsiniyā sam̐yuttanikāya-aṭṭhakathāya

Saḷāyatanavaggavaṇṇanā niṭṭhitā.